

للمزيد من الكتب الحصرية
زوروا موقع عصير الكتب
www.bookjuices.com



كما نتظر ارائكم في الرواية
على جروب عصير الكتب
fb.com/groups/Book.juice

عَلَاقَاتُ خَطِرَةٌ

د. مُحَمَّد طَه

عنوان الكتاب : علاقات خطيرة

المؤلف : د. محمد طه

المراجعة اللغوية : عبد الهادي عباس

تصميم الغلاف والإخراج الداخلي :

رشا عبدالله

رقم الإيداع : ٢٣٢٤٤ / ٢٠١٦

ردمك : ٩٧٨-٩٧٧-٦٥٤٩-١٨-٠

الطبعة الثانية: مايو ٢٠١٧



المدير العام : هالة البشبيشي

المدير التنفيذي : شريف الليثي



دار تويما للنشر والتوزيع



dartoya2015@gmail.com



دار تويما للنشر و التوزيع



@Dar_Toya



Dar.toya



(+2) 01140899887 - (+2) 01000706014



٣٣ شارع النصر - المعادي - القاهرة - مصر

عَلَاقَاتُ خَطْرَةٌ

د. مُحَمَّد طَه

دار توبَا للنشر والتوزيع

د. محمد طه صديق

- استشاري وُمدرس الطب النفسي - كلية الطب - جامعة
المنيا - مصر
- نائب رئيس الجمعية المصرية للعلاج النفسي الجماعي
(سابقاً)
- زميل الكلية الملكية البريطانية للأطباء النفسيين
- عضو الجمعية الأمريكية للعلاج النفسي الجماعي
- عضو الجمعية العالمية للعلاج النفسي الجماعي

كُلُّ ما هو مكتوبٌ في هذا الكتابِ هو اجتهاداتٌ وتحليلاتٌ ورؤى شخصية بحثة، مبنيةٌ على تجربتي الحياتيَّة الخاصة (إنسان)، وعلى خبرتي العلميَّة والتعليميَّة والعلاجيَّة المتواضعة (طبيبٌ نفسيٌّ وعضوٌ في هيئة تدريس جامعي)..

كُلُّ كلمةٍ هنا تحتملُ الخطأ والصَّواب.. وتُخضعُ للنقد والتفسير.. ويُؤخذُ منها ويُرددُ عليها.. وليس لها أيُّ هدفٍ سوى نشر التوعية النفسيَّة باستخدام لغةٍ سهلةٍ ومفرداتٍ بسيطةٍ، اجتهدتُ في فهمها واستيعابها وتوصيلها قدر المُستطاع.

مُحَمَّد طه

إهداء ..

إلى

كريم ..

والى سلمى ..

لكل عمرى .. وحياتى .. ورحلتى ..

الفِهْرِس

١٣	المقدمة
١٩	اسمع جسمك
٣١	يا رجال.. ما تحرموش نفسكم من أنوثتكم
٤٥	الثلاثة اللي عايشين جواك
٥٩	إنت شاييفني؟
٦٧	إوعى تلبس
٧٥	أنا إنتي؟
٨٣	انتبه.. أنت ترجع إلى الخلف
٩١	أنا بعشق البحر
٩٩	أنت تكرهني.. إذن أنا موجود
١٠٩	كرياج (لازم).. وحبل (اطفروض)
١١٥	الحزن الأزرق الدافي
١٣١	قبول الموت.. حياة
١٤٣	ثقوب نفسية

١٤٩	الصندوق	-١٤
١٥٠	ما تصدقش كل حاجة إنت مصدقها	-١٥
١٥٩	الكارير شيفت	-١٦
١٦٧	إنت مين؟	-١٧
١٧٣	الصورة الكاملة	-١٨
١٨٥	جهاد الجنات	-١٩
١٩٥	علاقات خطرة	-٢٠
١٩٩	العلاقة مع شخص نرجسي	-١
٢٠٢	العلاقة مع شخص اعتمادي	-٢
٢٠٤	علاقة التقديس	-٣
٢٠٦	علاقة العمى	-٤
٢٠٨	العلاقة مع حد موسوس	-٥
٢١٠	العلاقة مع اللا شيء	-٦
٢١٢	العلاقة اللي تحرير	-٧
٢١٤	العلاقة اللي تجنن	-٨
٢١٦	العلاقة مع سيكوباث	-٩
٢١٨	العلاقة اللي ما تسماش	-١٠
٢٢٠	علاقة الضحية والجاني والمنفذ	-١١
٢٢٣	العلاقة اللي تكون فيها دايمًا متهم	-١٢
٢٢٥	العلاقة مع مدمن	-١٣
٢٢٧	العلاقة الجزئية	-١٤
٢٢٩	علاقة الجبل السري	-١٥
٢٣٢	العلاقة مع شخص تمثيلي	-١٦
٢٣٤	علاقة التقمص	-١٧

٢٣٦	العلاقة مع مجموعة	-١٨
٢٣٩	علاقة كبش الفداء	-١٩
٢٤١	علاقة تحقيق النبوة	-٢٠
٢٤٣	علاقة البلع	-٢١
٢٤٥	العلاقة مع شخص انطوائي	-٢٢
٢٤٧	العلاقة مع نسخة قديمة من نفس الشخص	-٢٣
٢٤٩	علاقتك بدورك في المجتمع	-٢٤
٢٥٣	العلاقة مع شخص مستغل	-٢٥
٢٥٥	علاقة التقمص الإسقاطي	-٢٦
٢٥٨	علاقة الزواج	-٢٧
٢٦٢	العلاقة الجنسية	-٢٨
٢٦٦	إيه فيك اللي بيعمل علاقة؟	-٢٩
٢٦٩	العلاقة الحقيقية	-٣٠

مُقدّمة

ممكِن تكون أعقد حاجة في الدنيا هي العلاقات بين البشر..
مش بس أعقد.. لا.. هي كمان أخطر، وطبعاً أصعب..

العلاقات بين البشر زي ما هي أحد الأسباب المهمة للسعادة
والبهجة والإقبال على الحياة.. ساعات بتكون أحد أهم مصادر
التعاسة والألم.. ممكِن علاقة تطلعك سبع سماء، وعلاقة تانية
تنزلك سبع أرض.. اللي بييظ وييشوه ويؤدي الناس علاقة..
واللي بيصلح ويغير ويعالج الناس برضه علاقة.. إحنا بنكبر من
خلال علاقاتنا مع بعض..

فيه دراسة اتعملت في جامعة هارفارد واتنشرت قريب.. الدراسة
دي استمرت ٧٥ سنة، أجیال من الباحثين وأجيال من البشر..
كانوا بيشفوفوا هو إيه اللي فرق في حياة الناس بعد السنين
الطويلة اللي عاشوها هما وأولادهم وأحفادهم.. معظمهم
كانوا متصرورين في الأول إن اللي هايفرق في حياتهم هو الفلوس
والشهرة وغيرها..

بس اكتشف الباحثون في آخر الدراسة إن أكثر حاجة فرق ت في صحة الناس النفسية والجسدية، وطول عمرهم ومدى سعادتهم وقدرتهم على مقاومة الأمراض والأحزان والشيخوخة وغيرها.. هي وجود علاقات طيبة في حياتهم.. علاقات فيها قرب وحب وترابط وتفاهم.. علاقات كان الطرف الثاني فيها متاح موجود في عز الأوقات الصعبة.. وعلى العكس.. الناس اللي ما كانت عندهم علاقات بالشكل ده في حياتهم.. أعمارهم كانت أقصر.. نسبة إصابتهم بالأمراض المختلفة كانت أكثر.. قدرتهم على تحمل الألم النفسي والجسدي كانت أقل.. وجالهم كمان أرذهايمير فيشيخوختهم..

العلاقات الطيبة هي أكسير الحياة.. وهي الترياق الوحيد ضد الذبول الروحي.. والموت النفسي..

في كتاب (علاقات خطيرة) هانتكلم عن أنواع وأشكال كتير من العلاقات.. بدءاً من علاقتك بنفسك.. وانتهاء بعلاقتك بكل اللي حواليك.. علشان كده الكتاب مقسم إلى خمسة أقسام..

القسم الأول (الفصول من ١ إلى ٣) يخص تركيبتك أنت شخصياً.. اللي مهم تعرفها وتبقى واعي بيها قبل ما تعمل أي علاقة مع أي حد.. هانتكلم عن علاقتك بجسمك.. وعن تكوينك النفسي الرجولي والأنثوي.. وعن التلات أشخاص اللي عايشين جواك..

القسم الثاني (الفصول من ٤ إلى ٦) عن بعض الحاجات المهمة جداً في علاقتك الآخرين.. هو إنت في العلاقة دي بتكون نفسك واللا بتكون حد تاني؟ طيب هو إنت شايف اللي قدامك زي ما هو واللا بتعامل مع حد غيره في صورته؟ طيب اللي قدامك نفسه بيعامل معاك كما أنت، واللا بيلبسك صورة حد غيرك؟

القسم الثالث (الفصول من ٧ إلى ١٠) هانشوف فيه نتيجة اضطراب ولخطبة بعض علاقاتنا مع الآخرين.. خاصة القريبين مننا.. وإزاي ده ممكن يخلينا نرجع في تاريخنا النفسي للخلف بحثاً عن لحظة واحدةٍ كنا حاسين فيها بالأمان، أو نغرق في خيالات وأوهامٍ أو أفكار ووساوس مالهاش أي علاقة بالواقع، أو نتمنى حتى الرجوع للرحم وحياة الجنين علشان نفصل عن الدنيا، ونبعد عن أذى الناس.

القسم الرابع (الفصول من ١١ إلى ١٩) عن التغيير.. عن الشفاء والالئتمان النفسي.. عن قبول كل مشاعرك وأجزاءك من غير نقص أو تشويه أو اختزال.. عن قبول الحياة وقبول الموت.. عن امتلاء كل الفراغات النفسية اللي جواك.. والخروج من الصندوق الضيق المظلم المغلق عليك من سنين.. عن إنك تكون نفسك.. وتسيب كمان أثر طيب وراك.. وطبعاً التغيير ده مش هايحصل من غير ما تشو夫 الصورة الكاملة لكل اللي فات من حياتك قدام عينيك، وتقرر إنك تفضل طول عمرك في جهاد نفسي شريف لا يتوقف، في مواجهة كل ما قد يصيب نفسك بسوء.. حتى لو كانت جيناتك..

وأخيرًا.. وبعد ما شوفت وحسيت واتحركت واتغيرت.. وبعد ما اتفكيت واتجمعت واتلملمت والتآمنت.. هانستعرض في الفصل العشرين والأخير بعض أنواع وأشكال العلاقات اللي مهم تأخذ بالك منها في رحلة حياتك.. علشان تبقى واعي بيها، وتعرف تلقطها وتشوفها كوييس، وتحمي نفسك منها بكل شجاعة ومسئولة.. مهما كان التمن..

الكتاب عبارة عن وجبةٍ نفسيةٍ دسمةٍ، يُفضل تناولها على فتراتٍ وبجرعاتٍ مناسبةٍ. ولو حسيت في أي لحظة بمشاعر زيادة مش عارف تتصرف فيها، أو لقيت جواك أسئلة صعبة مش لاقى ليها إجابة، أو اكتشفت إن عندك مشكلة نفسية تحتاجة علاج.. أنصحك وقتها إنك تقدعد تفضض مع أقرب طبيب نفسـي.. زي ما بيحصل في كل دول العالم المتقدم.

وزي كتاب (الخروج عن النص) اللي ما كنتش متوقع نجاحه الكبير ولا متصور انتشاره الواسع.. (علاقات خطرة) مكتوب بالعامية المصرية، للتيسير والتيسير، وتوصيل الأفكار والمعلومات النفسية العميقـة والمعقدـة في بعض الأحيـان، باستخدام لغـة سهلـة ومفردات بسيطة وقريبة.. أنا بكتبـك وكأنـي قاعد معـاك.. وبكلـمـك بنفسـ طرـيقـتـي، ونفسـ لهـجـتـي، ونفسـ كلامـي..

عاوز أقولكم حاجة مهمة.. كل الفضل في هذا الكتاب وفي كل ما سبقه أو تلاه من كتب أو مقالات أو محاضرات يرجع للراجل اللي علمـنى وربـاف وساعدـنى إـنـي أـتـغيـر خطـوة ورا خطـوة ويـوم بعدـ يوم.. الراـجل اللي علمـآلاف الناسـ غـيرـي، وعالـجـ آلافـ أخرىـ بأـشكـالـ وطـرقـ مـخـتلفـةـ مـباـشرـةـ وغـيرـ مـباـشرـةـ.. وـصـنـعـ حـرـكةـ علمـيـةـ عـلـاجـيـةـ نـفـسـيـةـ حـقـيقـيـةـ وـعـمـيقـةـ فيـ مصرـ وـالـعـامـ العـرـبـيـ خلالـ الكـامـ سـنةـ الليـ فـاتـواـ.. وأـنـاـ فـقـطـ.. أحدـ نـوـاتـجـهاـ، ولـستـ أحـسـنـهاـ.. الـراـجلـ دـهـ أـنـاـ مـدـيـنـ لـيـهـ بـعـمـرـيـ وـحـيـاتـيـ وـعـلـمـيـ وـكـلـ عمـلـيـ الحـقـيقـيـ الطـيـبـ.. لأنـيـ اـتـعـلـمـتـ مـنـهـ يـعـنـىـ إـيـهـ حـيـاةـ، وـيـعـنـىـ إـيـهـ عـلـمـ، وـيـعـنـىـ إـيـهـ عـملـ..

كل ما تقرروا كلمة من كلامي أو تسمعوا منى محاضرة أو ندوة أو لقاء في أي سياق.. اعرفوا إنى بالظبط زى (البوسطجى).. مش باعمل أي حاجة أكتر من إنى أوصل رسالة من صاحبها إلى مستقبلها.. وافتكرروا إن الصاحب الحقيقى والأصيل لكل الرسائل اللي بوصلها اسمه (د. رفعت محفوظ).. أستاذى وأبى الروحى.. اللي قاللى في يوم من الأيام "لو عاوز ترد لي الجميل.. علم الناس اللي أنا علمتهولك" .. واللى أحد أهم مبادئه في التعليم والعلاج: "أنا مصدق إن أي حد من اللي بعلمه أو أعالجه هايكون في يوم من الأيام أحسن منى.. وده نجاحى الحقيقى".... احفظوا الاسم ده كويس.. و ادعوله بكل خير..

أخيراً..

الكتاب ده عنك..

وعن اللي حواليك..

وعن اللي بينكم..

الكتاب ده.. مش ها يفارقك..

لأنه بكل بساطة..

ها يبقى حبة منك..

واحتمال تكتشف مع آخر صفحاته..

إنك شاركت في كتابته..

يا للا بينا..

(1)

اسمع جسمك

(١)

بتحب جسمك؟

سؤال غريب.. مش كده؟

غالباً أول مرة حد يسألهولك..

بالرغم من إنه رفيق عمرك وصاحبك من يوم ما اتولدت..
وبالرغم من إنك ساكن فيه حتى من قبل ما تولد.. وبالرغم
من إنه ياما شاف واستحمل معاك!

بتحبه؟

طيب بتكرهه؟

قابله؟

مش قابله؟

بتحترمه؟

بتحتقره؟

بتهتم بييه؟

بنهمله؟

واللا أقولك.. بلاش إنت.. خلينا فيكي إنتي..

حاسة بجسمك؟

حاسة بوجوده؟

حاسة إنه جزء منك وإنك جزء منه؟

حاسة إنه بيتنمي ليكي وإنك بتتنمي ليه؟ واللا بتتعاملي معاه
على إنه حاجة طالعلك كده ومضطرة تتعايشي معاه؟

حاسة إنه فخر ونعمه وجمال واللا بلاء ونقطة وعار؟

إمتي آخر مرة سمعتنيه؟

أو إمتي آخر مرة حاورته وأخدتني وإديتني معاه؟

نجيب من الآخر؟

هو فيه علاقة بينك وبين جسمك من أصله؟

طيب..

خلاص..

(٢)

جسمك أصدق منك..

آه.. يعني ممكن بكل بساطة تقول بالكلام إنك مطمئن بس
رجلك اللي بتتهز عمال على بطال تقول في نفس الوقت إنك
مليان خوف.. ممكن لسانك يقول (صباح الخير) بس وشك
المكشر بيقول (صباح الشر).. ممكن تدعّي إنك واشق جداً
من نفسك.. لكن هزة صوتك ورعشة إيدك تفضحك.. علشان
أي تواصل بينك وبين حد، الكلام مش بيوصل فيه أكثر من
٧ في المية بس من الرسالة.. وكل الباقي بيوصل بالطريقة اللي
اتكلمت بها، ووضع وحركة وتعبيرات جسمك وإنت بتتكلّم..
تصور!

سيجموند فرويد قعد أكثر من ٣٠ سنة يحلل في الناس عن طريق الكلام اللي بيقولوه وهم ممدين قدامه على الشيزلونج.. واكتشف في آخر حياته إن بعض اللي كان بيحكهوله مرضاه ومريضاته عن صدماتهم الجنسية في طفولتهم كان محض خيال.. وبعدها بدأ الألماني (فريتز بيرلز) يدور على مصدر أصدق من الكلام لمعرفة تركيبة النفس البشرية ومحوياتها وأمراضها وعلاجها.. لغاية ما لقى ضالته في (الجسد).. ولغته.. ومعناها.. وعمل مدرسة كاملة في العلاج النفسي اسمها (الجيشتال).

واكتشف (بيرلز) إن كتير مننا، كلامهم منفصل عن جسمهم، منفصل عن مشاعرهم، منفصل عن أفكارهم.. يعني كلامك في حته، وجسمك في حته تانية، ومشاعرك في حته الثالثة، وأفكارك في حته رابعة.. وكل حاجة منهم بتقول معنى غير التاني، وماشية في اتجاه غير التاني، وغالباً مش بيتفاكلوا.. وإننا لو عاززين نكون أصحاب نفسيًّا.. يبقى مهم إن اللي أفكر فيه، ييشي مع اللي حاسه، وإن اللي بقوله بلساني يكون هو اللي بقوله بجسمي.. يعني أكون كل واحد صحيح.. مش أجزاء متفرقة.. كل جزء فيهم شغال لوحده.. وعايش مع نفسه.. وما لهوش دعوة بغيره..

(بيرلز) كان بيعالج مرضاه بإنه يعرفهم على جسمهم من أول وجديد.. ويصالحهم عليه.. ويرجعلهم اللي فقدوه منه ومن نفسهم خالله (وطلع بعدها العلاج بالحركة والعلاج بالرقص والعلاج بالفنون التعبيرية)..

كان بيسألهم ويخليهم يسألوا نفسهم:

جسمك بيقول إيه؟

جسمك عاوز يعمل إيه؟

جسمك ملك مين؟

جسمك ملك مين؟

جسمك ملك ميسيسيبين؟

تيجي تسأل نفسك السؤال ده.. أسأله: جسمي ملك مين؟

احتمال تكتشف إنك عشت طول عمرك مسلم عقد ملكية
جسمك لحد تاني.. أبوك.. أمك.. المجتمع.. جوزك.. الناس اللي
ماشية في الشارع!!

(٣)

ما تستغريش لما أقولك إن جسمك ده فيه متحف حفريات؟ آه..
جسمك فيه متحف حفريات.. مليان تحف غالية وتماثيل قديمة
 ولوحات من عصور سابقة..

إزاي؟

كل مرة كنت راجع من اللعب في الشارع ورجلك مش نظيفه
ومامتك وقوتك على الباب وقالتله: "إوعى تدوس على
السجاده" .. رجلك خزنـت الطاقة اللي كانت فيها واحتفظـتـ بيها
لغاـيةـ النـهـارـدةـ..

كل مرة كنت هاتمد فيها إيدك على الأكل وإنست في زيارة مع عيلتك لحد، وأبوك بصلك البصة اللي نشفت إيدك مكانها.. عضلات إيدك قررت تفضل فاكرة الذكرى دي لغاية دلوقت..

كل مرة جيتي تلبسي الفستان وتوريه مامتك (إننتي عندك خمس سنين) وقالتلك عيب يا بنت ده ضهره عريان.. ضهرك لسه فاكراها..

كل مرة حبيتي تكتشفي أي حته في جسمك (إننتي عندك تلات سنين)، وأخذتي قلم محترم على وشك.. عضلات وشك مش ناسياها..

كل مرة حد حاول يقرب من جسمك بشكل غريب وغير مريرح.. جسمك حافظها بكل تفاصيلها..

وقدر الأيام.. وتعدي السنين.. ونكمبر.. وكل حته في جسمنا فيها ذكرى.. وكل خلية فيها حكاية.. وكل منطقة ليها تاريخ.. وكل واحد وحظه.. وكل واحد وطريقة تعبير جسمه عن ذكرياته وألامه القديمة..

اللي يجيده قولون عصبي.. واللي يحصله صداع مزمن.. واللي طريقة مشيته كأنه متخشب.. واللي إيده تترعش قدام الناس..

اللي تكره جسمها فتهينه وتبهدله وتعرضه للبيع.. واللي ترفضه فتسبيه يزيد ويتنفس.. اللي تحقره فتبطل تاكل أو تتنقأ الأكل اللي بتاكله.. واللي مش طايقا ومش طايقة فيه نفسها فتقطعه بالشرط أو تخربشه بضواورها لغاية ما يسيل دم..

واللي تقرر تنتقم من كل اللي أذوها طول حياتها، لأنها تنتقم
منهم في جسمها، وتنقل معركتها معاهم لأرضه..

اللي مش شايفة جمالها، واللي مش مصدقاه، واللي مستكتراه
على نفسها.. اللي بتتكلف من جسمها، واللي مش حاسة بيها،
واللي بتستغريه..

اللي شعرها يسقط بدون أي سبب طبي واضح.. أو دورتها
الشهرية تتلخص بدون أي تفسير.. أو بشرتها تقوم بشورة عليها..
أو تتجنن لو وزنها زاد كام جرام..

اللي يجيشه حساسية جلدية من غير تفسير.. واللي يحصله
آلام مزمنة في كل حادة في جسمه رغم كل الفحوصات والتحاليل
السليمة.. واللي وشه يتملى تعاجيده قبل الأوان.. وفي الآخر.. اللي
جسمه يقرر يخونه ويقع وبهدم نفسه بنفسه بجلطة في المخ أو
بمرض من أمراض (المناعة الذاتية)..

جسمك مش بيensi..

جسمك بيفتكر كل حاجة..

جسمك له كيان.. وله وجود.. وله ذاكرة..

جسمك له هيبة..

جسمك..

له..

هيبة..

(٤)

من أكثر الأمراض النفسية المنتشرة في مصر نوع منها اسمه (الأمراض النفس- جسدية).. يعني الأمراض اللي فيها المريض بيشتكي بأعراض جسمانية، لكن سببها الحقيقي نفسي مش عضوي..

الأمراض دي بتنتشر في بعض المجتمعات اللي بيكون فيها التعبير عن الألم النفسي أو المشاعر النفسية الحقيقة غير مقبول.. علشان عيب.. أو غلط.. أو محن.. أو قلة أدب.. فيضرر الجسم شخصياً إنه يعبر عن الألم النفسي.. بس بلغته الخاصة..

كثير أوى من الأطباء المصريين في جميع التخصصات تقريباً بيلاحظوا ظاهرة شهيرة جداً في العيادات والمستشفيات: إن العيال مش بيخف (رغم صحة التشخيص والعلاج)، أو مش بيطل يشتكي (رغم إنه إكلينيكياً خف)، أو إنه مجرد ما يظهر عليه بوادر تحسن بيطل العلاج (رغم تنبئه الطبيب عليه)، أو إنه يخف فعلاً بس يتعب تاني قبل يوم واحد من زيارة الطبيب للاستشارة!.. والسبب ورا ده بسيط جداً.. وهو إن الاحتياج النفسي الإنساني البسيط اللي الجسم عَبَّرَ عنه بالمرض (النفس- جسدي) أو مع المرض (الجسدبي) لسه لم يشبع.. الاحتياج ده اسمه: الاحتياج للاهتمام.. الاحتياج إني أتشاف.. وأتسمع.. وألاقي حد يهتم بيـا..

الزوجة اللي زوجها مشغول عنها طول الوقت، شوية في شغله، وشوية بيقرأ الجرائد، وشوية بيشوف الأخبار.. عقلها الباطن عارف كوييس قوي إنه غير مسموح ليها تعبر عن تذمرها وضيقها (إلا اللي حواليها وأولهم أهلها وناسها ومجتمعها هايستنكروا ده ويطلبوا منها تحمد ربنا على اللي هي فيه).. فيختار جسمها إنه يعبر عن اللي جواها بألم في كل حة، ومشاكل في الهضم والتنفس وبذل المجهود.. وصعوبات عضلية وحسية وساعات كتير جداً جنسية..

الللميد اللي أهله مش شايفين منه غير درجاته و نتيجه في الثانوية العامة، مش هايقولهم (ارحموني) أو (شوفوني أنا مش نيجتي) أو (حرام عليكم اختزلتوني في أرقام يا ولاد الـ....).. لا.. جسمه هايكلم بدلاً منه وهابجيده (صداع) ما لهوش تفسير ولا علاج..

البنت اللي اتعرضت للتحرش والانتهاك البدني في مجتمع (متدين بطبيعه) بيوصل للبنت كل لحظة إن جسمها (عار) لازم تخجل وتتكلف منه.. وإن وجودها غير مرغوب فيه من أساسه.. هاتخاف تعبر عن غضبها وإحباطها ورغبتها إنها تأخذ حقها على مرأى وسمع من الجميع.. فجسمها يقرر يقوم بالمهمة دي بحالها ويعلن عن عصيانه ليها، وليهم..

ونلف على العيادات.. ونعمل تحاليل.. ونصرور أشعات.. وتتلخص العلاقات.. وتبوظ الجوازات.. وتنتهي العائلات.. ولا حول ولا قوة إلا بالله..

(٥)

كتير جداً من التشبيهات والاستعارات اللغوية هي في الحقيقة أوصاف جسمانية.. بس إحنا من كتر ما بنستخدمها.. نسينا أصلها..

يعني في (فكرة حلوة).. كلمة (حلوة) دي بتوصف طعم.. أصله حاسة التذوق.. وفي (راجل خشن).. الخشونة دي ملمس.. أصله حاسة اللمس.. وفي (صارخة الجمال).. كلمة (صارخة) دي بتوصف صوت عالي جداً.. أصله حاسة السمع.. وغيرهم كتير..

إשמעنا؟ إيه دخل الكلام ده في الموضوع؟

في الحقيقة.. هو ده الموضوع.. هو ده كل الموضوع..

الموضوع إننا نسينا الأصل.. وانشغلنا بالفرع.. الأصل هو جسمك.. اللي وجوده وتعبيره سبق بكثير جداً وجود أي لغة كلامية لفظية.. واللي هو الوعاء اللي ربنا اختارهولك علشان يستودع فيه نفسك وروحك.. البحر الواسع اللي يتمشي فيه شرايينك وتستقر فيه أعضاؤك.. المنجم الغالي اللي هاتفضل تستكشف اللي جواه طول عمرك..

بس إحنا نسينا جسمنا لغاية ما بعدنا عنه وبقي غريب علينا.. قمنا بعقوبه بمنتهى الصفاقة، ومش بنبطل نقوله (أف لك) ليلى ونهار.. حرمناه مننا.. حرمنا نفسها منه..

تيجي نفتركه؟

طيب ياللا.. اسأل نفسك تاني:

بتعامل جسمك إزاي؟ علاقتك بجسمك إيه؟ إيه الرسائل اللي
وصلتك عنه.. مرة باسم التربية ومرة باسم المجتمع ومرة
باسم الدين- زوراً وبهتاناً؟ إيه الرسائل اللي بتوصلك منه؟ وإيه
الرسائل اللي انت بتوصلها له؟

بتسمعه؟ بتعرف تسمعه؟ بتعرف تفهم هو عاوز يقول إيه؟
بيصرخ إزاي؟ بيكي إمته؟ بتحس هو محتاج إيه؟ بتشوف
قراراته و اختياراته؟ قادر تستوعب حكمته وفلسفته؟

إوعي تكوني فاكرة إنك هاتخسي طول مانتي بتكرهي جسمك..
أقلية الأول.. هايخس بعدها بمنتهى البساطة، وبأقل مجهد،
ومن غير دكترة ولا برامج دايت..

بلاش تتعامل مع جسمك على إنه (ثور) في ساقية، تحمل عليه
دایماً وما تسمحش له إنه ياخذ حقه في الراحة والاستجمام..
هايخونك في يوم ومش هاتقوله بعدها قومة..

إوعي تصدقني إن جسمك (عار)، إنه جريمة، وإنه قلة أدب،
وإنه هدفه الوحيد في الوجود هو متعة وإشباع كائن اسمه
(الرجل)..

افهم جسمك.. واحترمه..

اسمعي جسمك.. وحسي بييه..

عاملوا أجسامكم بما تستحق.. لأنها تستحق..

(٢)

يا رجال..

ما تحرموش نفسكم من أنوثتكم..

(١)

بيولوجيًّا.. كل واحد فينا فيه هرمونات ذكورة وهرمونات أنوثة بغض النظر عن جنسه..

يعني الرجال فيه -بشكل طبيعي- نسبة معينة من هرمون الذكورة (تستيستيرون) ونسبة أخرى أقل من هرمون الأنوثة (استروجين).. وكذلك المرأة فيها نفس النوعين من الهرمونات بس بنسب مختلفة..

ده على مستوى التكوين الجسدي البيولوجي.. ومعظمنا عارف الكلام ده من أيام دراسة الأحياء في ثانوية عامة..

لكن اللي مادرسنا هوش في الأحياء ولا في غيرها ومش عارف ليه أو إزاي لغاية دلوقت.. هو إن كل واحد فينا جواه على المستوى النفسي نفس التركيبة دي بالضبط..

يعني -نفسياً- الرجل جواه رجولة وأنوثة، والمرأة جواها رجولة وأنوثة.. بس بمواصفات ومعانٍ ووظائف نفسية مختلفة.. والكلام ده معروف ومكتوب ومنشور من أيام الحضارات الإنسانية القديمة لغاية يومنا هذا، مروراً بعلماء نفسيين كبار زي كارل جوستاف يونج ودونالد وينيكوت وهاري جانتر..

إيه النكتة الظرفية دي؟

إيه الكلام الغريب والصعب ده؟

في الحقيقة هو مش نكتة ولا كلام غريب ولا صعب.. بس إحنا اللي ساعات بنتجاهل أبسط الحقائق وأوضحتها.. ده إحنا حتى في كلامنا اليومي المعتمد بنستخدم كتير تعبيرات زي (ست بيـت راجل)، و(راجـل منـسـون) ..

إيه الموضوع؟!

الموضوع ببساطة هي إن الرجلـة (النفسـية) اللي جـوهـ حـضرـتكـ (كـذـكـرـ)، هي المسـئـولـة عن صـفـاتـ زيـ الشـجـاعـةـ، والـجـدـعـنـةـ، والـشـهـامـةـ، والـإـصـرـارـ، والـتـحـديـ، والـمـثـابـرـةـ، وماـ إـلـىـ ذـلـكـ.. والأـنـوـثـةـ الليـ جـوهـ حـضرـتكـ (برـضـهـ كـذـكـرـ)، مـسـئـولـةـ عن صـفـاتـ زيـ الحـنـيـةـ، والـقـرـبـ، والـمـوـدـةـ، والـرـحـمـةـ، والـطـيـبـةـ، وـرـقـةـ القـلـبـ وـغـيرـهـاـ..

نفسـ الكلـامـ بالـنـسـبةـ لـيـكـ (أـنـشـىـ).. الرـجـولـةـ (الـنـفـسـيـةـ)ـ الليـ جـواـيـ هيـ الليـ بـتـخـلـيـكـ فيـ بـعـضـ الـأـوـقـاتـ وـالـمـوـاقـفـ شـجـاعـةـ وـجـدـعـةـ وـمـسـئـولـةـ وـمـشـ بـتـيـأسـيـ وـعـنـدـكـ اـسـتـعـدـادـ تـحـارـيـ وـتـحـديـ الـكـونـ كـلـهـ عـلـشـانـ تـوـصـلـيـ لـهـدـفـكـ.. والأـنـوـثـةـ الليـ جـواـيـ، هيـ الليـ فيـ مـوـاقـفـ قـانـيـةـ بـتـنـطـلـعـ مـنـكـ الـحـنـانـ، الـحـبـ، الـعـطـفـ، الـقـرـبـ، وـالـأـمـوـمـةـ، الـرـقـةـ، الـطـيـبـةـ، وـالـسـماـحـ..

دهـ بـفـرـضـ إنـ حـضـرـتكـ (رـجـلـ طـبـيعـيـ)، وـحـضـرـتكـ (أـنـشـىـ طـبـيعـيـ).. وـسـاعـتهاـ بـنـسـمـيـ دـيـ (رـجـولـةـ حـقـيقـيـةـ)، وـنـسـمـيـ دـيـ (أـنـوـثـةـ حـقـيقـيـةـ).. وـيـكـونـ مـوـجـودـ جـواـكـ وـجـواـيـ خـلـيـطـ مـنـتـاسـبـ مـنـ الـاتـتـينـ.. فـتـكـونـ شـجـاعـ وـفـيـ نـفـسـ الـوقـتـ حـنـينـ، شـهـمـ وـفـيـ نـفـسـ الـوقـتـ خـجـولـ، تـعـرـفـ تـشـيلـ الـمـسـئـولـيـةـ وـفـيـ نـفـسـ الـوقـتـ مـتـسـامـحـ.. مـتـحـديـ وـفـيـ نـفـسـ الـوقـتـ قـرـيبـ وـوـدـودـ.. وـهـكـذاـ..

وإنتي تكوني طيبة وفي نفس الوقت حدودك واضحة، حنينة بس
صارمة عند اللزوم.. رقيقة وفي نفس الوقت جدعة.. عطوفة وفي
نفس الوقت مش بتسيبي حبك.. وهكذا.. وهكذا.. وهكذا..

وكل ما تكون (كرجل) قريب من (الأنوثة الحقيقية) اللي جواك..
كل ما تكون صفاتها جزاً لا يتجزأ منك، ومش صعب عليك في
وقت من الأوقات التعامل بيها، وكل ما تكوني (كأنثى) قريبة
من (الرجلة الحقيقية) اللي جواكي.. كل ما تكون خصائصها جزءاً
أصيلاً من مكوناتك الشخصية، وتستخدميها في أوقاتها المناسبة..

كل اللي فات ده هو الطبيعي.. اللي من المفترض يكون عندنا
كلنا.. بشكل تلقائي وفطري وسليم من ساعة ما بنتولدي..

لكن..

وآآآآآآاه على اللي بعد لكن..
ندخل على الوجع بقى..

بس بعد ما تاخذ نفسك شوية..

(٢)

مشهد ١:

- طفل عنده ٥ سنوات.. حد من أصحابه ضربه وهو يلعب
معاه..

- الأب: إوعى تعيط، الرجالة مش بتعيط.. البنات بس اللي
بتعيط! خليك راجل.. خليك خشن..

- يتكرر هذا المشهد مرات كثيرة وفي سياقات مختلفة..

- بعد سنة.. الطفل ياخذ قرار نفسي داخلي إنه يدفن ملامح
أنوثته الحقيقية اللي جواه علشان وصله من أبوه إنها ضعف،
وإن الضعف الإنساني شيء غير مقبول.. وبما أن الأنوثة الحقيقية
والرجلولة الحقيقية مرتقبين (ومتعشقين) في بعض بشكل فطري،
 فهو كمان هайдفن رجولته الحقيقة ويستبدلها (برجلولة
مزيفة).. يعني يطلع راجل خشن، قاسي، بيستعرض عضلاته
وقوسotte وصوته العالي وافتزاعه وعنجهيته على خلق الله، عَمَّال
على بطَّال..

مشهد ٢:

- بنت عندها ٦ سنوات، لابسة فستان جميل بحمالات، وفرحانة
بشعرها وجمال جسمها..

- الأم: إيه يا بنت اللي إنتي لابساه ده؟ بلاش مسخرة وقلة أدب.. أمال لما تكري هاتعملي إيه؟

- وفي مرة أخرى، حد من قرايبيها أو أصحاب باباها أو جيرانها يمد إيده على جسمها بشكل حيواني سافل..

- بعد شوية، ومع كمية رسائل في نفس الاتجاه، تصل البنت إلى استنتاج بسيط جدًا، وهو إن الأنوثة عيب، أو الأنوثة حرام، أو الأنوثة (عار)، وإن (الأنوثة) بتجيب المشاكل، وتجيب الكلام، وتشجع الناس إنهم يهدوا إيديهم عليها ويتحرشوها وبها ويسيئوا استغلالها..

- تأخذ البنت قرار نفسي داخلي تفضل عايشة بيها طول عمرها، وهو إنها تدفن أنوثتها الحقيقية وتعيش بأنوثة مزيفة علشان تتعايش مع اللي حواليها.. وكمان تدفن رجولتها الحقيقية، وتستبدلها برجولة مزيفة..

- نفس البنت عندها ٢٠ سنة، قاصة شعرها قصة رجالٍ، بتتكلم بأسلوب فج، لابسة قميص كارو، على بنطلون شبيه جداً بالبنطلونات الرجالية.. وعندها يقين (معذورة جداً فيه) إنها لو ما عملتش كده، وعاشت راجل (مزيف طبعاً) في هذا المجتمع، فهي مش هاتأخذ حقها، وهایتداس عليها، وهاتبهدل..

- بنت شبهها واتعرضت لنفس التجربة بالظبط.. تعيش بأنوثة (مزيفة)، مليانة ميوعة ومياصنة وإغواء وصوت سافر وضحكه تجيب آخر الشارع، لأنها قررت بعقلها الباطن تنتقم من كل اللي آذوها بأنها تخليهم (يريلوا) من الجري وراها بالمعنى الحرفي..

قبل ما الدنيا تتلخبط، وتفقد تركيزك.. أنا هالخصلك الكلام ده
كله في سطرين..

إحنا كلنا بنتولد وجوانا رجولة حقيقة (الجدعنة والشجاعة والإصرار وغيرهم)، وأنوثة حقيقة (الحنية والقرب والمودة وغيرهم).. والرسائل اللي بتوصلنا من التربية والمجتمع وساعات الفهم غير الصحيح للدين بتخلينا ناخذ قرارات نفسية مصرية عند سن معين بدنن أحدهما أو كليهما (لأنهم مرتبطين بعض) واستبدالهم برجولة مزيفة (قسوة وخشنونة وافترا).. أو أنوثة مزيفة (ميوعة ومياصنة وإغواء سافر).. أو الاتنين.. وده بيحصل عند الستات والرجالية على حد سواء..

حلو الكلام؟

إنت اسمك مكتوب؟

لقيتي اسمك برضه مكتوب؟

اكتشفت أي حاجة جديدة في نفسك أو في حد تعرفه؟

طيب..

(٣)

مجتمعنا الجميل..

بيوتنا الرائعة..

إعلامنا المثالي..

بيوصل لينا إيه من الرسائل النفسية بخصوص الموضوع ٥٥؟

بيقبل صفات الأنوثة اللي المفترض تكون موجودة بشكل طبيعي
في الرجال؟

بيقبل صفات الرجلة اللي مهم تكون موجودة بشكل تلقائي في
الستات؟

بيشجع على الرجلة الحقيقية واللا بيزرع فينا الرجلة المزيفة؟

بيحترم الأنوثة الحقيقية واللا يدفنها ويخلق مكانها الأنوثة
المزيفة وبكل إصرار؟

أنا مش هاجاوب..

علشان الإجابات أنتم عارفينها أكتر وأحسن مني..

(٤)

من أجمل أوصاف الأنوثة (الحقيقة طبعاً) إنها هي الـ Being، يعني الوجود.. ليها علاقة بأصل الوجود الإنساني وكينونته.. ولو لاحظت هاتلاقي كل صفات الأنوثة (الحقيقة) اللي قلناها مرتبطة بنوعية وجود إنساني معين (الحنية، اللود، القرب،....)، وفي المقابل، بتوصف الرجال (الحقيقة برضه) بأنها مرتبطة بالـ Doing، يعني الفعل.. وليها علاقة بالحركة وطاقتها (الإصرار، الشجاعة، التحدي.....)، والأجمل إن الفعل ما ينفعش من غير وجود.. يعني مهم أكون موجود وأحس بوجودي الأول علشان أقدر أتحرك وأفعل وأنفذ بعد كده..

الرجلة مالهاش أي معنى أو وظيفة لو مش مبنية ومتصلة على وجود وكيان أنثوي حقيقي..

علشان كده دور الأم في التربية مهم وسابق جدًا عن دور الأب.. والأم هي اللي بتقوم في أول سنتين من عمر الطفل (سنوات الرضاعة) بتتسيخ وزرع شعوره بكيانه وبوجوده من خلال كيانها وجودها وقربها الجسmani والشعوري والحسي منه.. وبعدها يجي دور الأب اللي بيزرع فيه طاقة الفعل ورد الفعل والحركة ..

أول سؤال هايقفز لذهنك دلوقت هو إزاي يكون الكلام ده صحيح بالرغم من إن حواء خلقت بعد آدم، وخلقت من ضلعه؟

وإجابتي المتواضعة -على حد علمي- هي أنها خلقت من ضلعه، اللي كان (موجود) من يوم ما ربنا (بت) فيه من روحه..

(٥)

زي ما فيه رجولة وأنوثة في الأفراد.. أنا بأفترض إنه فيه رجولة وأنوثة في المجتمعات.. بمعنى إنه فيه مجتمع (ذكوري- مش هاقول رجولي).. ومجتمع (أنثوي- وده لسه ما عرفهوش أوي).. وطبعاً إنتوا عارفين الكلام اللي جاي:

مجتمعنا (ومجتمعات تاني كتير) قرر -من زمان جدًا- يرفض الأنوثة ويحاربها ويشووها ويدفنهما، مرة باسم التربية، ومرة باسم العادات والتقاليد، ومرة باسم الفهم المغلوط للدين..

مجتمعنا قرر يستبدل الأنوثة الحقيقية، بأنوثة مزيفة تُرضي -في الظلام- رجلته القاسية المتسلطة (المزيفة برضه)..

مجتمعنا -في رأيي- قرر -وبكل بساطة- يحرم نفسه من أجمل ما فيه، ويشوه أروع خلقه، وينتقم من نفسه.. في نفسه..

إحنا بنخاف من المرأة.. بنخاف من الأنوثة.. علشان كده بندفنهما..

إحنا مرعوبين من وجودها وقدراتها وحيويتها.. علشان كده بنميتها بالحياة..

إحنا مهددين من إحساسنا بالضعف قدامها.. علشان كده بنستقوي ونفتري عليها..

بنو صفتها إنها متقلبة المزاج.. رغم إن الطبيعة نفسها متقلبة المزاج.. وفيها ليل ونهار وصيف وشتا.. الأنوثة برضه فيها ليل ونهار.. وصيف وشتا.. لأن وجودها مرتبط بوجود الطبيعة وكيانها وصفاتها..

بنشوه جسمها باسم الدين كذبا وزورا وبهتانا وافتراء.. علشان نحرها من مجرد الشعور بجسمها واحتياجاته، اللي بنعتبرها مش من حقها..

بنفرض عليها بوصايتنا الغاشمة طريقة كلام وطريقة شغل وطريقة عيشة، هي أقرب للعبد في حضرة السيد.. علشان نتغلب على إحساسنا العميق بالخوف والضعف والتهديد من مجرد وجودها وكيانها وحياتها..

بنطفيها.. لأننا خايفين نتحرق من نورها..
بنهينها.. لأننا مروعين من إحساسها بكرامتها..
بنخنقها.. لأننا مش قادرين نستحمل انطلاقها وحريتها..

الأنوثة هي الإبداع..
هي الإلهام..
هي الحرية..

هي الوجود..
والجمال..
والنور..

هي لمعة العين.. ونبضة القلب.. وشهقة الدهشة..
هي الأرض الخصبة.. والسماء المحتوية الساترة..
هي البداية.. والنهاية.. والرحلة..

الأنوثة هي رحم الحياة..

يا رجال..
ما تحرموش نفسكم من أنوثتكم..

(٣)

الثلاثة اللي عايشين جواك

باختصار شديد.. ومن غير أي مقدمات.. فيه تلات بنى آدمين غير بعض عايشين جواك في اللحظة اللي بكلمك فيها دلوقت.. يعني جسمك عامل زي ما يكون شقة مفروشة فيها تلات أوض منفصلة.. كل أوضة فيهم عايش فيها بنى آدم غير التاني.. وكل واحد فيهم ليه حياته وذكرياته وتصراته الخاصة بييه لوحده.. وفي كل موقف في حياتك، واحد من التلاتة دول بيمسك زمام الأمور.. ويكون ليه الغلبة والسيطرة على الآلترين التانيين.. وهكذا..

اللي بيطلع منك وأنت في حفلة، أو فرح، أو رحلة مع أصحابك.. اسمه (الطفل) بتاع حضرتك.. ساكن جواك من أيام طفولتك، وبيطبع ويشم نفسه وقت اللعب والهزار والفرح والتنطيط.. الطفل ده هو نسخة منك وأنت صغير، متخزنة جواك وبتمسك زمام نفسك في الوقت المناسب.. وقتها الطفل ده بيلبسك (زي العفريت كده).. يعني بتكون طفل.. بتكون في حالة طفولية سائدة.. تسمع وتشوف وتفهم وتستقبل وتتصرف زي ما كنت في طفولتك بالظبط.. تتحرك بمرونة وليونة وحرية، تفهم وتستوعب بالراحة ومن غير تشنج ولا تعصب.. تصرف بتلقائية وعفوية.. تلعب وترقص وتسرح بخيالك وتبدع بدون حدود..

الشكل ده من الطفل الداخلي بتاعك اسمه حالة الأنماط الظلية أو (الطفل الحر).. Child Ego State علشان هو فعلا حر.. زي ما خلقه ربنا على فطرته.. قبل ما يتربى ويتشوه ويتكيف على اللي أبوه وأمه عاوزينه.. ساعتها هايكون ليه اسم تاني.. وشكل تاني.. اسمه (الطفل المتكيف) أو (الطفل المذعن).. وده برضه موجود جواك.. بس دي النسخة اللي حضرتك جيت عند سن معين وقررت تتنازل فيه عن تلقائيتك وفطرتك وحريرتك وصوتك

العالٰي وحقك في الاعتراض والاختيار والقبول والرفض.. وتتحول إلى طفل لطيف ظريف يسمع الكلام ويشرب اللبن وما يقولش
(أ) علشان اللي حواليه يسقفوه ويقبلوه ويحبوه ويهتموا بيـه
ويرضوا عنه.. الطفل ده صوته واطي.. وقعدته منحنية.. وعينه مكسورة.. وحضرتك بتلبـسه برضـه لما الظروف اللي حوالـيك تكون قاسية وصعبـة وإنـت مش عارـف تعملـها أي حاجةـ غيرـ إنـك ما تكونـش نفسـك..

فيـه شـكل تـالت للـطفـل الدـاخـلي دـه اسمـه (الـطفـل المـتمرـد).. وـده اللي دـايـماً رـافـض لـأـي قـوـاعـد أو قـوـانـين.. دـايـماً فيـ صـرـاع أو منـافـسـة معـ غـيرـه.. عنـيد وصـعبـ الانـقيـاد وسرـيعـ الصـدـ والـردـ.

ده السـاـكن الأولـ.. اللي اسمـه (الـطفـل الدـاخـلي).. اللي مـمـكـن يـكون (طفـل حرـ).. أو (طفـل متـكيـفـ/مـذـعنـ).. أو (طفـل مـتـمرـد).. والـلي بتـتحـولـ حـضـرتـكـ لـواـحـدـ منـهـمـ فيـ مـوـاقـفـ مـعـيـنةـ.. وبـالـمـنـاسـبـةـ.. كـلـمةـ تـتحـولـ هـنـاـ مـعـناـهاـ تـتحـولـ بـجـدـ.. بـالـعـنـىـ النـفـسـيـ وـالـحـضـورـ العـقـليـ وـالـسـلـوكـ الجـسـديـ..

الـساـ肯ـ التـانـيـ.. اـسـمـهـ (الـوالـدـ).. أوـ (ـحـالـةـ الأـنـاـ الوـالـدـيـةـ) Parent Ego State زيـ ماـ (ـإـرـيكـ بـيـرنـ) صـاحـبـ النـظـرـيـةـ ديـ ماـ بـيـسمـيـهاـ.. وـدهـ بـقـىـ يـاـ سـيـديـ الـأـبـ (ـأـوـ الـأـمـ).. الليـ بـيـطـلـعـ منـ جـوـاكـ وقتـ ماـ تـكـونـ فيـ مـوـقـفـ يـسـتـدـعـيـ الحـنـانـ وـالـأـبـوـةـ (ـأـوـ الـأـمـومـةـ) وـسـعـةـ الـأـفـقـ.. مـوـقـفـ مـحـتـاجـ سـمـاحـ وـعـطـفـ وـتـفـهـمـ وـعـطـاءـ.. حـالـةـ مـطـلـوبـ تـكـونـ فـيـهاـ كـبـيرـ.. بـيـسـمـحـ وـيـطـبـطـبـ وـيـنـصـحـ وـيـرـشدـ.. تـحـسـ بـالـليـ قـدـامـكـ وـتـرـاعـيـهـ وـتـسـاعـدـهـ وـتـقـدـرـ اـحـتـيـاجـاتـهـ.. زيـ الـأـبـ ماـ بـيـعـملـ ماـ اـبـنـهـ بـالـظـبـطـ..

بس زي ما الطفل اللي جواك ليه أكتر من صورة.. برضه (الوالد) اللي جواك ليه أكتر من صورة.. الصورة الأولى اللي وصفناها دي اسمها (الوالد الراعي).. وده شكل طيب وحنين من صورة الأب (أو الأم) اللي ا تكونت عندك من صغرك، من خلال تعاملك مع أبوك وأمك ومدرسك وكل من كان يمثل (والد) بالنسبة لك.. فيه بقى صورة تانية للوالد ده ممكن برضه تكون ا تكونت عندك من خلال والديك أو من يneathم اسمها (الوالد الناقد)، وده لما بيطلع من جواك بيكون شخص قاسي وغاضب ومش بيعجبه العجب.. حد مش بيطل نقد ولا لوم ولا أوامر ولا تعليمات.. صارم وقاطع ومتسلط ومش بيرضي أبداً.. الحالة دي بتلبسك في المواقف اللي بتستفزك وتثير غضبك وتخرجك بره إطار التفهم والحكمة.. لأنك ساعتها مش بتسمع ولا بتفهم ولا بتدي فرصة.. أنت بتكون ثور هائج صلب الرأي ما ينفعش معاه أخد ولا عطا.. ربنا يحفظنا..

عاوز أؤكد إن كل شخصية أو حالة من دول ليها ما يميزها من طريقة في الكلام.. نبرة في الصوت.. طريقة في الحركة والمشي والجلوس.. شوية كلمات معينة خاصة بيها.. تعبيرات وش مختلفة.. طريقة في استقبال الأحداث والتعامل معها.. وحتى بناء عصبي خاص في المخ.. وكأنها فعلاً شخص منفصل بذاته..

يعني لما تكون في حالة (الطفل الحر).. بتتحرك ببساطة، بتستقبل بدون نقد ولا حكم، بتفكر برونة من غير كلاكيح ولا تعقيبات، كلامك بيكون فيه كتير من العفوية والفكاهة والبهجة والمرح.. بتعبر عن نفسك وعن مشاعرك بتلقائية ومن غير تكليف.. وما بتكون في حالة (الطفل المتكيف/المذعن)، بتكون هادي جداً.. منسحب.. بتسمع الكلام بدون مناقشة.. بتخاف تقول (لا)..

تستحمل الإساءة والإهانة من غير رد.. قعدتك منحنية، صوتك واطي، معندكش أي استعداد للاعتراف أو الاختلاف أو النقد أو الإبداع.. كلماتك بتكون من قبيل (هو ليه بيحصل معايا كده؟).. (أنا حظي دايمًا وحش؟).. (أنا نفسي في كذا- بكسـر النون).. وما بتكون في حالة (الطفل المتمرد) بتعترض وتتمرد على أي شيء وكل شيء..

ولو لبستك حالة (الوالد الراعي).. بتطبّط كتير على اللي حواليك، وبتستخدم كلمات زي (عاوز أساعدك).. (علشـان مصلحتك).. (أنا أدرى منك).. وهكذا.. ولو كنت في حالة (الوالد الناقد).. كلامك بيكون مليان (لازم) (المفروض) (هو كده).. وبتشهر صباع (السبابة) كتير في وجه غيرك كتعبر عن اللوازم والمفروضات والقواعد والغضب والصرامة اللي بتكون فيها..

فيه بقى حالة ثالثة وأخيرة، ساكنة جواك زي إخواتها، ويتطلع منك في مواقف مختلفة شوية.. الحالة دي اسمها (البالغ) أو (حالة الأنا الراشدة) Adult Ego State).. ودي يتطلع منك في المواقف اللي تستدعـي تحكـيم العـقل و وزن الأمور والتعامل مع الحقائق والواقع بأقل قدر من المشاعـر.. في الحالة دي إنت بتقدر تضبط انفعالـك وردود أفعالـك من غير تلقـائية الطفل، ومن غير حـنية أو قسوـة الوـالـد.. إـنت هنا كـمـبيـوتـر.. ما تعرـفـشـ غيرـ المـنـطـقـ والـحـسـابـاتـ والـتجـرـدـ منـ العـواطفـ عـلـشـانـ توـصلـ لـرأـيـ أوـ تـاخـدـ قـرـارـ.. بـتـكـونـ مـحـايـدـ.. صـرـيحـ.. حـكـيمـ.. هـادـيـ.. متـزنـ.. بـتـسـأـلـ أـسـئـلـةـ مـبـاـشـرـةـ (ليـهـ؟ـ إـزـايـ؟ـ إـمـتـيـ؟ـ)ـ عـلـشـانـ تـفـهـمـ وـتـعـرـفـ وـتـسـتـوـعـبـ.. وـبـتـكـلـمـ كـلـامـ وـاـضـحـ مـنـ قـبـيلـ (دـهـ رـأـيـيـ).. (أـعـتـقـدـ كـذـاـ).. (منـ وجـهـ نـظـريـ)ـ عـلـشـانـ تـتوـاـصـلـ مـعـ الليـ قـدـامـكـ..

طبعاً الكلمات دي وغيرها ممكن تطلع من أي حد من الحالات الثلاثة.. بس الطريقة اللي بتتقال فيها والمعنى المقصود منها وتعبيرات الجسم والوش اللي بتتصاخبها، بتختلف من حالة للثانية..

يبقى موجود جوه حضرتك دلوقت تلات حالات بنسميهem (حالات الأنـا) Ego States.. تلات بنـي آدمين منفصلين عايشين جواك.. كل واحد ليه تاريخه وصفاته وسلوكيه.. وكل واحد فيهم بيلبـسـك في موقف معين.. وساعـات ده بيكون بينـك وبينـ نفسـك في شـكل صـوت دـاخـلي.. فـكـرة مـلحـة.. رـغـبة مـجـنـونـة.. إـحـسـاس بالـذـنـب.. أو عـنـد بـعـض الـمـرـضـى وـسـاـوسـ أو هـلاـوسـ أو ضـلـالـاتـ..

بالمـنـاسـبة التـلـات حالـات دول موجودـين جـوانـا من وإـحـنا صـغـيرـين..

يعـني كـلـنا بـنـشـوف البـنـت الصـغـيرـة اللي بتـتـعـامل بكلـأـمـومة (حـالـة الوـالـد الرـاعـي) معـ العـروـسـة بـتـاعـتها (وسـاعـات معـ أمـها وأـبـوها).. وكـلـنا بـنـشـوف الطـفـل اللي عنـده خـمـس أو ستـ سنـين وهو بـيـعـنـف أـخـوه أو أـخـته الصـغـيرـة وـيرـفع صـبـاعـه (حـالـة الوـالـد النـاقـد) وهو بـيـكـلمـها ويـقـولـها المـفـرـوض تـعمـلي كـذا أو لـازـم تـقولـي كـذا.. أو مـلـا سـاعـات يـلـبسـ نـضـارـةـ أـبـوهـ ويـبـدـأـ يتـفـلـسـفـ (حـالـةـ الـراـشـد) ويـسـأـلـ أـسـئـلةـ منـطـقـيةـ ويـقـولـ كـلامـ أـكـبـرـ منـ سـنـهـ مـلـيـانـ وـقـائـعـ وـحـقـائـقـ وـكـأنـهـ حـكـيمـ زـمانـهـ..

وهنا السؤال: هو أنا مين فيهم؟

والإجابة هي إن حضرتك كلهم (على رأى شيرين- أنا كتير).. بس في كل موقف حضرتك بتكون واحد منهم.. وده الطبيعي والصحي والمفيد.. لكن لو طلع في موقف ما، حد من جواك غير مناسب للموقف.. يبقى ساعتها ده مرض نفسي ووضع غير طبيعي ولا صحيح.. يعني لما يطلع (الوالد الناقد) من جواك في حفلة أو رحلة ويقعد ينقد ويلوم ويتكلم بلغة (لازم) (المفروض) يبقى ده مش طبيعي.. ولما تلبس حالة (الطفل الحر) وإن كنت في المحاضرة وتقوم تحزم وترقص يبقى ده برضه مش طبيعي.. ولما تحول إلى (العقل الراشد) وإن كنت قاعد مع حبيبك وتتكلمها بلغة الحقائق والأرقام والحسابات.. يبقى تطلع على الدكتور النفسي على طول..

أصحاب المدرسة دي في علم النفس (اسمها مدرسة التحليل المعاملاتي) Transactional Analysis .. بيشفوا إن الاكتئاب هو (طفل مذعن) خاضع خانع طول الوقت.. وان الهوس هو (طفل حر) بزيادة شوية أو (طفل متمرد) قرر يثور على العالم وعلى اللي حواليه.. وإن الطبيعي إن التلات حالات يتكملا مع بعض تحت القيادة الحكيمة بتاع (الأنا الراشدة) اللي تسمح كل شوية بالتناوib وتساib الأدوار..

طيب..

الكلام ده كلام نظري ومتخصص وممكن أي طالب علم نفس يقره في أي كتاب أو مذكرة أو صفحة إنترنت.. مالنا إحنا ومالقصة دي..

أقولك..

القصة دي تخص حضرتك شخصياً.. لأن التلاتة دول عايشين جوه كل حد فينا.. ومهם نعرف نفسها بكل تفاصيلها وخباياها.. مش بس كده.. ده فيه حاجة في منتهى الخطورة والأهمية في الموضوع ده.. لدرجة إنه بيتم تدريسه للناس اللي شغالين في مجال الإعلانات والدعائية ورؤساء الشركات والمُخابرات والمُدربين وغيرهم.. وهي:

مِنْ بِيَكُلِّمْ مِنْ؟

نعم؟

أيون..

مِنْ مِنْ التلاتة اللي جواك بيtalk على لسانك؟

مِنْ عندك بيكلم مِنْ عند اللي قدامك؟

إنت بتخاطب مِنْ في غيرك؟

بتحرك مِنْ في شريك أو شريكة حياتك؟

بتحضر مِنْ في صاحبك أو مديرك أو زميلك؟

مِنْ مِنْ التلاتة اللي جواك بيتعامل مع مِنْ مِنْ التلاتة اللي قصادك؟

كلام غريب ومجنون..

بس في الحقيقة.. هو عين العقل..

إزاي؟

بعض يا سيدتي..

في كل تفاعل أو تعامل مع حد، واحد من الثلاثة اللي جوانا بيكلم واحد من الثلاثة اللي جوه الآخر.. والطبيعي والسليم إن اللي أوجه له الكلام هو اللي يرد عليه.. مش أكلم حد ويرد عليه حد تاني.. لكن لو أنا كلمنت حد ورد عليا حد تاني، ممكن تحصل قفلة وينتهي التواصل قبل ما يبدأ..

يعني لما حضرتك تبقى راجع البيت بعد يوم شغل وتعب وإرهاق.. وتقول مراتك بمنتهى الهدوء والعقل والواقعية (حالة الأنما الراسدة): أنا جعان جدًا.. عملتني الأكل؟ الطبيعي إنها ترد عليك بـ (الأنما الراسدة) اللي جواها برضه، وتقولك: آه الأكل جاهز.. أو كنت مشغولة النهاردة ومالحقتش أجهزه.. ده اسمه تفاعل طبيعي.. لكن لما تروح راده عليك بمنتهى الشعور بالظلم والإهانة وعدم التقدير وتقولك: هو إنت مش شايف غيري؟ ما فيش غير أنا اللي تتعجب وتشقق وإنت جاي عاوز تأكل على الجاهز؟ مش تقدر تعي شوية؟ حرام عليك!! يبقى (الطفل المذعن- المتكييف) اللي جواها بيعد على (الوالد الناقد) اللي عندك.. وده يعمل (قفلة) فورية في العلاقة.. ولو اتكرر بالشكل ده (من ناحيتها أو من ناحيتك) هايقطع التواصل بينكم من أساسه.. ويبقى اسمه تفاعل (متناطع)..

لو إنت طالب وبتتحن امتحان شفوي.. والدكتور بيكلمك بحالة (الراشد) وبيسألوك بمنتهى العقل سؤال بسيط.. فالطبيعي إنك ترد عليه رد برضه (راشد) ومنطقي وواقعي بالإجابة السليمة (أو حتى غير السليمة).. لكن لو رديت عليه وقولتله: معلهش يا دكتور أنا ما ذاكرتش مادتك كويس، ومش مستعد لامتحان.. يبقى إنت كده بتستفز فيه بكل وضوح (الوالد الناقد)، وهاتلاقيه يرد عليك ويقولك بمنتهى الغضب: طيب خد الصفر ده وامشي يا شاطر..

لو ابنك بيكلمك بـ(الطفل الحر) اللي جواه وبيقولك: ما تيجي تلعب معايا شوية يا بابا.. هو بيكون عاوز (الوالد الراعي-الحانى) اللي جواك يرد عليه ويقوله: وماله يا حبيبي، ياللامينا.. لكنه أكيد مش عاوز (الراشد) بتاعك يقوله بمنتهى المنطق وبدون أي عواطف: أنا مشغول ومش فاضي دلوقت.

يبقى مهم تعرف مين جواك بيكلم أو بيرد على مين جوه اللي بتتعامل معاه.. علشان ده ممكن يساعد جدًا على التفاهم والتواصل (لو اللي بكلمه هو اللي بيرد عليا)، أو يكون سبب في سوء التفاهم وقطع التواصل (ما اللي يرد يكون غير اللي اتجه له الكلام)..

طبعًا فيه نوع أهم وأخطر من النوعين دول في التواصل.. اسمه (التفاعل الخفي).. وده فيه اتنين من عندك بيكلموا اتنين من عند اللي قدامك في نفس الوقت.. حد بيكلم حد بشكل ظاهر واضح.. بس حد تاني من عندك بيوصل رسالة خفية وغير ظاهرة لحد تاني من اللي قدامك.. معلش استحملني في الجنان ده شوية..

يعني الأب بيقول لابنه بـ(الوالد الراعي) بتاعه: يا حبيبي ما
يهمكش.. ذاكر واعمل اللي عليك، وادخل الكلية اللي إنت
عايزها، واللي يجيئه ربنا كله كوييس.. بس من تحت لتحت،
بيقوله بنظرات عينه وبتصرفاته عن طريق (الأب الناقد): إوعى
تدخل غير كلية الطب. أو الأم تقول لبنتها بشكل واضح: أكбри
بقى واتجوزي يا حبيبي علشان نفرح بيكي.. بس في نفس
الوقت وبشكل خفي (الطفل) اللي جواها بيقول للبنت: إوعى
تكبرى وتتخلي عنى.. إوعى تكبرى وتسيبىنى.. الرسائل المتناقضة
اللي بالشكل ده ممكن تجنن بجد..

أقولك نكتة بقى علشان نعيد ترتيب مخنا شوية بعد اللخبطة
دي كلها.. الأجانب لما بيحبو بعض.. بيدلعوا بعض.. هو يقولها
يا (بىي).. وهي تقوله يا (بىي).. الطفل اللي جواه بيستدعى
ويحضر ويخاطب ويطلع الطفل اللي جواها.. والعكس بالعكس..
أما عندنا بقى، تلاقى الاثنين الحلوين أول ما يتجوزوا.. هو
يقولها يا (ماما).. وهي تقوله يا (بابا).. عرفتو إحنا بنطلع من
بعض إيه.. وبنستدعي إيه عند بعض؟؟؟!!

مهم كمان نعرف إن كل حالة من دول ليها مفتاح.. وكل شخصية
فيهم ليها مدخل.. يعني لما يكون واحد قافش وزعلان وقرفان
من نفسه، وعايش حالة (الوالد الناقد) أو (الطفل المذعن-
المتكيف).. لما تيجي تكلمه تعمل حسابك إنك تخاطب فيه
(الطفل الحر).. تهزز معاه.. تزغزغه.. كده يعني.. مش تقفل
عليه وتلومه وتعاتبه وتكرهه في نفسه أكتر ما هو كارهها..

وما تكون مراتك فرحانة وبتدعى وتهز وتنطط قدامك، وما ليها
ال طفل الحر) بتاعها.. ما ينفعش حضرتك تكلمها بـ(الراشد)
الحكيـمـ الفـيلـيـسـوـفـ المـنـطـقـيـ الـلـيـ جـواـكـ، ولا تنـقـدـهاـ أوـ تحـكـمـ
عليـهـاـ بـ(ـالـوالـدـ النـاقـدـ)ـ بتـاعـكـ..

في تعاملاتك مع مرءوسـيكـ.. مهم تكون ساعات والـدـ وسـاعـاتـ
راـشـدـ وـسـاعـاتـ طـفـلـ حرـ.. ومـهمـ تـحرـكـ فيـهـمـ وـتـسـتـدـعـيـ كلـ دـوـلـ
برـضـهـ منـ عـنـدـهـمـ وقتـ اللـزـومـ..

تفـتـكـرـ بـقـىـ النـاسـ بـتـوـعـ الدـعـاـيـةـ وـالـإـعـلـانـاتـ بـيـكـلـمـواـ وـيـسـتـدـعـواـ
مـينـ جـوانـاـ؟ـ

الطـفـلـ الحرـ طـبـعـاـ..

بيـكـلـمـوهـ بـالـأـغـانـيـ وـالـمـوـسـيـقـىـ وـالـإـبـدـاعـ.. بـيـسـتـدـعـوهـ بـخـفـةـ الدـمـ
وـالـرـشـاقـةـ وـالـجـمـالـ.. بـيـحـضـرـوهـ بـالـأـلـوـانـ وـالـرـسـومـاتـ وـالـأـشـكـالـ
المـبـهـجـةـ.. عـلـشـانـ (ـالـطـفـلـ الحرـ)ـ دـهـ هوـ الـلـيـ عـنـدـهـ رـغـبـةـ وـتـطـلـعـ
وـحـبـ اـسـتـطـلـاعـ.. وـهـوـ الـلـيـ هـايـشـتـريـ.. دـهـ ماـ يـنـعـشـ طـبـعـاـ إـنـهـمـ
فيـ بـعـضـ الـأـوـقـاتـ الـقـلـيلـةـ بـيـكـلـمـواـ (ـالـوالـدـ)ـ أوـ (ـالـراـشـدـ)..

نـكـتـةـ تـانـيـ..

فيـهـ ظـاهـرـةـ مشـهـورـةـ فيـ الشـعـرـ الجـاهـلـيـ وـبعـضـ الشـعـرـ الحـدـيـثـ..
وـهـيـ إنـ الشـاعـرـ بـيـفـتـحـ أـشـعـارـهـ بـحـاجـةـ بـيـسـمـوـهـاـ (ـمـخـاطـبـةـ
الـصـاحـبـينـ).. يـعـنـيـ يـوجـهـ كـلـامـهـ وـشـعـرـهـ (ـلـاتـنـيـنـ)ـ زـيـ مـثـلاـ:

(ـاـخـتـلـافـ الـنـهـاـيـهـ وـالـلـيـلـ يـنـسـيـ).. اـذـكـرـاـ لـيـ الصـباـ وـأـيـامـ أـنـسـيـ)..

لغاية النهاردة ما حدش عنده تفسير واضح للحكاية دي.. ليه اتنين. اشمعنا يعني؟ طيب مين هما الاتنين دول؟ وليه الحكاية دي بتتكرر كتير؟ متهيألي إن أوضح تفسير للظاهرة دي بعد الكلام اللي فات هو إن الشاعر بيكون في حالة من التلات حالات دول (الطفل/والد/الراشد) وبيكلم (بعقله الباطن) الاتنين الثانيين اللي جواه..

فيه حاجتين مهمين قبل ما أخلص..

أولاً.. يا ريت تكون شوفت إنت علاقتك إيه بأجزاءك الداخلية.. عامل إيه مع الناس اللي عايشة جواك؟ حالات الأنما بتعاتك متفاهمة ومتناسبة وبتحب بعض وبتعرف تخرج إمتي ومع مين؟ واللا إنت في خناقة داخلية عنيفة.. فيها أجزاء نفسك كارهة بعضها وإنت رافض دي ومقاطع دي وعاوز تخلص من دي؟ قابل نفسك كلها على بعضها بكل حالاتها وأحوالها واللا مقسمها ومجزءها ومخليها حت ما لهاش علاقة ببعض؟

ثانياً.. أسأل نفسك: مين بيطلع من جواك؟ وإمتي؟ ومع مين؟

شوف إنت بتكلم مين في الشخص اللي قدامك؟

اعرف إنت بتوصل إيه على المكشوف؟ وإيه من تحت لتحت؟

اكتشف.. مين بيتكلم على لسانك؟

اتعلم عن نفسك.. واعرفها.. واتعلم عن نفوس الآخرين واعرفهم..

علشان ده مفتاح مهم جداً..

في أي علاقة صحية..

(٤)

إنت شاييفني؟

(سيجموند فرويد) كان عنده صاحب وأستاذ اسمه (بروير)..
بروير كان برضه محلل نفسي واشتغل وكتب مع فرويد شوية..
وكان عنده مريضة مهمة جداً في تاريخ التحليل النفسي اسمها
(أنا) بتشديد النون.. كانت بتعاني من أعراض نفسية كثيرة
وصعبة اصطلاح على تسميتها وقتها (هيستيريا)..

(أنا) خلال رحلة علاجها حست بمشاعر حب وانجذاب ناحية
الدكتور بتاعها.. والمشاعر دي فضلت تزيد لغاية ما تحولت
لرغبة جنسية وأحلام بالزواج.. (بروير) كان بيحلل ده نفسياً
ويحاول يحله ويعالجها بهدوء، لغاية ما (أنا) تصورت إنها
حامل منه وبدأت تطارده.. الرجل توقف عن علاجها وحولها
للمستشفى.. ويقال إنه من وقتها ساب المهمة كلها..

المهم.. فرويد كان شريك بروير في الشغل والتحليل النفسي..
وكان بيتابع تحليل وعلاج حالة (أنا).. وقدر من خلال ده إنه
يكتشف إن كل المشاعر اللي كانت (أنا) بتحسها ناحية (بروير)
هي في الحقيقة مشاعر قديمة ومتخزنة جواها ناحية حد تاني
خلال.. افترض إنه أبوها.. وإن المشاعر دي فضلت كامنة ساكنة
جواها لغاية ما جه شخص في حياتها يمثل دور الأب (اللي هو
كان المعالج النفسي).. واتحركت المشاعر دي تاني، وتم إسقاطها
(طرحها) على شخص (بروير)، وبقت حاسة إنها بتحبه وبقي
عندها الرغبة الطفولية في إنها تعيش حياتها معاه على طول..

حالة (أنا) بالإضافة لكتير من الحالات اللي كان بيعالجها فرويد
وبروير ساعدت على صياغة مفهوم اسمه (الطرح) ودخوله عالم
التحليل والعلاج النفسي لغاية النهاردة..

(الطرح) معناه ببساطة إعادة توجيه مشاعر وأفكار وساعات سلوكيات ناحية حد معين في الحاضر (بشكل غير واعي) في حين إن أصلها ناحية حد تاني خالص في الماضي.. وليه صور كتير جدًا.. ممكن حب.. ممكن كره.. ممكن غصب.. ممكن تقديس.. وغيره..

المفاجأة بقى إن ظاهرة (الطرح) دي مش بتحصل بس في حجرة العلاج النفسي.. لا.. دي بتحصل في البيت.. وفي الشارع.. وفي الشغل.. وفي أي حفة..

أولاً..

إيه الكلام ده؟

الكلام ده معناه ببساطة إن ممكن حضرتك تحس بمشاعر ناحية حد.. وهي في الحقيقة ناحية حد تاني خالص !!

لما حضرتك تشو夫 واحدة في الشارع لأول مرة.. وتحس ناحيتها
يحب مفاجئ وقوى وسريرع ورهيبسيسب.. وتشوف فجأة إنها
أفطع بنت في الدنيا، وأروع كائن في الوجود، وإنها مليانة حنية
ورقة ولائكة، من غير حتى ما تكلمها كلمة واحدة.. يبقى
ساعتها فيه احتمال كبير إن المشاعر دي تكون قدية ومتخزنة
جوالك ناحية حد تاني خالص.. حبيبة سابقة.. مدرستك زمان..
صورة والدتك المثالية في ذهنك.. وهكذا..

بلاش كده.. لما رئيسك أو مديرك في الشغل يعدي من قدامك وينسى يقولك صباح الخير.. تقوم حضرتك تحس بغضب شديد، أو خوف غير مبرر، وتبدأ تعامل معاه بشكل مليان جفاء وعنف، أو رهبة ورعب.. يبقى غالباً الموقف ده حرك فيك مشاعر قديمة ناحية حد تاني في حياتك.. من أول مدرسك في ثانوي.. لغاية أبوك..

لما تروح بيتك.. وتحصل بينك وبين مراتك مناقشة عادية جداً لأي سبب تافه.. وتلاقي منها رد فعل قوي وعنيف وغير مناسب مع الموقف أو السبب.. يبقى هي غالباً مش بتكلمك إنت.. دي بتكلم حد تاني قديم في شخصك..

وما فيش أشهر من المثل المتكرر كل يوم بين الزوجة وحماتها.. اللي يقوم فيه الزوجة عادة بشكل غير واعي بطرح كل مشاعرها السلبية الكامنة في عقلها الباطن ناحية أمها (واللي ممكن هي نفسها ما تكونش عارفة إنها موجودة ولا عبرت عنها قبل كده) وتعيد توجيهها ناحية حماتها.. في مشهد متكرر بشكل يثير الدهشة في معظم البيوت تقريباً.. من غير ما حد يسأل: هو ده أصله إيه؟

بعض عمالقة التحليل النفسي بيقولوا إنه ما فيش علاقة تخلو في مرحلة من مراحلها من جزء (طريبي).. وإن النمو الصحي للعلاقات بيختلي الجزء ده أقل ما يكون.. والجزء الحقيقي هو الأكبر والأغلب..

بالملازمة.. أكتر وأشهر أنواع العلاقات اللي بتسهل عملية (الطرح) دي هي العلاقات عبر الإنترت أو التليفون.. اللي مش بتكون شايف فيها الطرف الثاني وإنست بتكلمه.. وده بيساعد جداً إنك ترمي عليه من جواك كل اللي متخزن ومش لاقى حد يتمنى عليه..

طبعاً الموضوع أعقد من كده بكتير، لأن كمان فيه مسؤولية بتقع على الجانب الآخر في تحريك وتنبيه وساعات إثارة بعض المشاعر المتخزنة جوانا وتوجيهها ناحيته.. إلى جانب إنه ممكن حد يتعامل معاك بمشاعره ناحية نفسه هو شخصياً أو ناحية جزء بيحبه أو بيكره فيها..

إحنا غلابة جداً..

تصور إنك في بعض الأوقات مش بتكون شايف اللي قدامك وإنست بتكلمه.. ويتكون في الحقيقة شايف جواك حد غيره..

وإن ساعات حد يكون بيتعامل معاك على إنك شخص تاني إنست ما تعرفوش أصلأً..

وإن علاقاتنا مع بعض مش إحنا بس الشريك الأساسي فيها..

طيب.. أعرف منين إذا كانت مشاعري وأفكاري وسلوكياتي ناحية
حد طبيعية واللا (طريحة)؟

طبعاً ده سؤال صعب وإنجاته أصعب.. لكن باختصار.. أول ما
تلقي مشاعرك ناحية حد كتيرة جدًا.. وسريعة جدًا.. وما لهاش
أي مبرر.. اعرف فوراً إنك (غالباً) مش شايف الحد ده، ومش
بتعامل في الحقيقة معاه هو.. إنت بتعامل مع حد تاني، من
خلاله.. طبعاً فيه حاجات واحتمالات وتفاصيل تانية كتير.. بس
مش وقتها..

فيه دعاء شهير بيقول: (اللهم أرنا الأشياء كما هي)..

يا رب..

أرنا الأشياء كما هي..

(٥)

أوعى تلبس

الفصل ده هو الوجه الآخر للفصل السابق..

يعني هنا مش إنت اللي عندك مشاعر ناحية حد وهي أصلاً
ناحية حد تاني..

لا..

هنا أنت الحد اللي بتترمّى عليه المشاعر دي.. وهي أصلاً مش
بعك، ولا قمت ليك بصلة..

بص يا سيدى..

لا.. بص بجد..

عاوزك كده بهدوء وببساطة تبص حواليك.. أو بصيغة أدق..
تبص على الناس اللي حواليك..

بالراحة كده..

بص كويس..

قرايبك.. جبايك.. جيرانك.. أصحابك.. مراتك.. جوزك..أي حد
تاني..

كل واحد من الناس دي جواه (غالبًا) سيناريyo قدديم.. يعني
مجموعة من الأحداث الحياتية اللي اتعرض لها في مرحلة من
مراحل عمره، وما زالت عايشة جواه كما هي بنفس المشاهد
والمشاعر والأفكار، لأنها لسه حاصلة حالاً.. يعني حد ما زال
جواه شكل وتفاصيل علاقته بأبوه، وإزاي كان طيب وحنين
وصبور.. حد لسه محتفظ بمشاعر خوفه من أخوه الكبير.. حد
مفتقد حبيته الأولى..

واحدة مش قادرة تنسى نظرات الشك والارتياح اللي كانت بتشووفها في عين أنها لما ترجع البيت متأخر شوية.. واحدة لسه محفور جواها الأذى النفسي والبدني اللي اتعرضت ليه وهي صغيرة على إيد واحد جبان وندل استحل نفسها وجسمها.. واحدة تالتة مش قادرة تنسى الرعب اللي كانت حاسة بيها لما تاهت عن مامتها في السوق وهي صغيرة..
وغيره.. وغيرها..

دراما شغالة جوه كل واحد أو واحدة.. مبنية على أحداث قديمة عدى عليها الزمن وفات.. كل دراما من دول سايبة أثر.. وكل حدث أو مشهد أو حكاية من دول سايبة رسالة نفسية مهمة وأساسية جداً في التكوين النفسي بتاع كل حد فينا.. رسالة بيعيش بيها عمره.. وبيبني عليها حياته.. وبيتعامل على أساسها مع الناس..

يا لهوي !!
يعني إيه ؟

يعني حد وصلته رسالة مضمنها "إنت ما تستاهلش" بكل تنويعاتها، زي "إنت ما تستاهلش تحب" أو "إنت ما تستاهلش تفرح" .. أو "إنت ما تستاهلش غير درجاتك في الثانوية العامة" .. أو "إنت ما تستاهلش غير اللي أنا أسمحلك بيها" ..

حد تاني وصلته رسالة بتقول "محدش هاييهم بييك إلا لو كنت مريض" .. وفي قول آخر "محدش هاييريك أي اهتمام إلا لو كنت صانع للمشاكل" .. وفي قول ثالث "عاوزانا نشوفك يبقى تجذبي انتبهنا على قد ما تقدري" ..

حد ثالث وصلته رسائل مجملها "ما ينفعش تعتمد على نفسك وأنا موجود.." أو "إنت ما تقدرش لوحدك.." أو "إنت هاتفضل صغير على طول.."

حد رابع شبع رسائل من نوع "أعمل كل حاجة تخليني أرضي.." أو "أنا مش هارضي عنك أبداً.." أو "مهما عملت.. كأنك ماعملتش حاجة.." .. وهكذا.. وهكذا..

كتير من اللي وصلته رسائل بالشكل ده.. واللي جواه دراما عاملة كده، ما بيكونش قدامه وقت ما وصلته إلا إنه يصدقها، لأنها غالباً بتكون وصلته من أقرب الناس ليه.. وفي وقت و عمر وظروف تخليه ما يقدرش يعمل أي حاجة غير إنه يستسلم ليها..

مش بس كده.. ده بيفضل طول عمره عايش فيها.. وممحور حياته حواليها.. وبيتصرف على أساسها..

والصعب من كل ده.. هو إنه ساعات بيسعى طول الوقت إنه يتحققها.. آه.. يتحققها.. ويثبتها.. وكأنها نبوءة.. ما ينفعش غير إنها تتحقق.. وده لسبب بسيط جداً جداً.. هو إنه ما عرفش عن نفسه وعن اللي حواليه (وقتها) غير كده.. وما اتعلمش عن الحياة والعلاقات (ساعتها) غير ده.. وما كانش عنده أي بدائل يحمي فيها نفسه.. ولا أي اختيارات تانية يدافع فيها عنها..

طبعاً ده شيء صعب ومؤلم جداً.. ومحتج شهور وربما سنوات من العلاج النفسي الحقيقي العميق أو العلاقات الجيدة الطيبة....

بس في الحقيقة مش هو ده اللي عاوز أتكلم عنه.. أو ألفت
الانتهاء لهه..

اللي عاوز ألفت الانتباه ليه هو الطرف الثاني من القصة..
الطرف اللي هاتتحقق النبوة على إيديه.. أيون.. الطرف اللي
صاحب النبوة هايختاره علشان يكمل الحركة الدرامية..

ما هو فيه رسائل وصلت.. وفيه مسرحية درامية متخزنة.. وفيه
نبوءة لازم تتحقق.. وفيه بطل للقصة.. يبقى ناقص مين؟ قول
أنت تقـا.....

ناقص الشخص اللي هايختاره البطل علشان يلعب الدور اللي ناقص.. الشخص اللي هايحافظ على سير الأحداث في الخط المرسوم ليها.. الشخص اللي هايطمئن البطل إن اختياره كان صحيح.. وإنه كان معدور لما صدق اللي وصله.. وإنه ما كانش وما عادش ينفع إلّا إنه يكون كده، ويفضل كده..

معنی ..

معظم اللي وصلته رسالة "إنت ما تستاهلش.." هايدور طول الوقت على شخص يعامله على إنه ما يستاهلش.. الشخص ده ممكن يكون صاحب أو زوج أو صديق أو زوجة..

ويعظم اللي وصلته رسالة "إنت ما تقدرش لوحدهك" هايفضل طول حياته يدور على حد يتسند عليه ويعتمد على وجوده، ومن غيره يحس إنه ضعيف قليل الحيلة.. والحاد ده ممكن يكون رئيسه في الشغل أو مراته أو حتى ولد من أولاده..

ومعظم اللي وصلته رسالة "أنا مش هارضي عنك أبداً" .. مش هايس تاريخ غير لما يلاقي حد لا يرضي أبداً مهما عمل أو بذل مجهد، ويعمل معاه علاقة، ويتشعلق فيه..

كل اللي فات ده بقى مقدمة.. ومقدمة مختصرة جدًا اللي جاي دلوقت.. اللي عاوز أقولك فيه وبكل وضوح:

كتير أوي من الناس اللي حواليك بيدور على حد يلبسه أحد الأدوار المهمة والمؤثرة في مسرحية حياته.. خلي بالك أحسن حد يحاول يلبسك دور غير حقيقتك..

هاتلاقي حد بيقولك إنت أناي، مش بتهم بيها، ومش شايف غير نفسك.. علشان يلبسك دور الندل الأناني الطماع.. ويؤكد لنفسه رسالة "إنت دايمًا مظلوم" ..

هاتلاقي حد بيطلع منك كل شر.. ويستفز فيك كل غصب.. ويتصيد ليك كل خطأ.. علشان يلبسك دور الشرير المتسلط المفترى.. ويؤكد لنفسه رسالة "كل الناس وحشين/أشرار، وأنا بس اللي طيب" ..

هاتلاقي حد بيشكرك عمال على بطال.. ويعبرلك عن كل الامتنان والعرفان من غير ما تعمل أي حاجة.. ما يتحركش إلا بإذنك.. وما يتنفسش إلا بمشورتك.. علشان يلبسك دور الشخص القوي الباسل المخلص.. ويفضل معتمد عليك، ويؤكد لنفسه رسالة "ما ينفعش تعتمد على نفسك" ..

هاتلاقي اللي بيعاول يلبسك دور أبوه الطيب، ويحرملك من حرقك في الغضب والحنق والرفض أحياناً.. هاتلاقي اللي بيعاول يلبسك دور حبيته القديمة، من غير ما يشوفك ويشوف حقيقتك الأجمل والأحلى.. وهاتلاقي اللي بيعاول يلبسك دور المعتمدي المجرم القاسي.. بدون أي وجه حق..

هاتلاقي اللي بيعاول يلبسك دور الجاني.. واللي بيعاول يلبسك دور الضحية.. واللي بيعاول يلبسك دور المنقذ.. وإنك ولا جاني ولا ضحية ولا منقذ.. إنك شخص عادي طبيعي غالباً..

خلي بالك بقى..

وافتتح عينك كويس جداً..

إوعى تلبس أي دور حد بيعاول يلبسهولك..

إوعى تكون إنك الشخص اللي هايتحقق النبوءة المشئومة..

إوعى تلاقي نفسك طرف في لعبة درامية بائسة.. لا هي بتاعتك..
ولا إنك قدّها..

وإذا كان ده حصل فعلاً.. فالحق بسرعة وبدون أي تردد.. اقلع الدور ده فوراً.. وارجع نفسك اللي كنت تعرفها ومتأكد منها قبل ما تعرف الشخص ده مباشرة.. وما تسمح له أو لغيره إنه يلبسك أي دور أو يدخلك في أي مسرحية حياتية هزلية..

إوعى تلبس..

إوعى تلبس..

(٦)

أَنَا إِنْتِي

ظبتي نفسك قبل كده وإنني بتعملني نفس اللي مامتك كانت
بتعمله معاك وإنني صغيرة؟

كشفت نفسك في أي مرة وإننت في أحد المواقف أو التصرفات،
نسخة طبق الأصل من حد غيرك؟ أبوك.. أخوك.. حد من
 أصحابك..

جربت الحكاية دي قبل كده؟

كشفت نفسك مرة وإننت حد تاني؟

قفشت نفسك وإننت بتكرر نفس اللي اتعمل معاك، بس مع
غيرك؟

كام مرة كنت (إنت) النهاردة؟

بعض كده في المراية..

هو إنت مين دلوقت؟

إننا ساعات لما بنحب حد، خاصة من المشاهير وإننا في سن
الشباب.. بنلبس زييه، نسرح نفس تسيريحته، وهكذا.. بتعمل ده
بسكل واعي واضح.. وده اسمه (تقليد)..

لكن ساعات بيوصل بينا الحب والشغف درجة كبيرة جدًا، مع
عدم قدرتنا على الوصول لي بنحبه، أو عدم استطاعتنا إننا
نكون زييه.. وقتها ممكن نعمل حاجة تانية غير (التقليد) اسمها
(تقمصر).. وده بيعمله عقلنا الباطن بدونوعي كامل مننا..
فتتكلم زي الحد ده، نمشي زييه، نفكـر زيـه، نستقبل زيـه، نفهم
زيـه، نحسـيـه، باختصار.. نتحول لنـسـخـةـ منه.. نـبـقـىـ (ـهـوـ)ـ..

الحكاية دي مهمة جدًا في بعض الأوقات.. مهم إن الولد في سن معين يتقمص أبوه علشان يحس إنه بيتمي لعالم الرجال، ويكون جواه الصمير الأبوي اللي هايستمر معاه طول حياته، وكمان مهم إن البنت في إحدى مراحل طفولتها تتقمص أمها علشان تحس إنها تنتمي لعالم الإناث ويكون برضه جواها الصمير الإنساني اللي هاتعيش بيه..

ساعات بتنقص الناس اللي بنحبهم علشان نحس إننا قريبين منهم وكل حة فينا تتونس بيهم.. ساعات بتنقص أساتذتنا وأصحابنا وإخواتنا وحبابينا.. وغيرهم وغيرهم.. التقمص هنا بيكون مطلوب كشكل من أشكال القرب أو التعلم أو النمو النفسي.. باتقمص حد، أقرب منه أو تونس بيه أو أتعلم منه حاجة، وبعددين خلاص.. زي الجاكيت كده اللي ممكن ألسه في وقت معين وأقلعه بعدها بشوية وألبس غيره وهكذا..

بس الغريب والمثير للدهشة.. هو إننا ساعات بتنقص الناس اللي بنكرههم.. الناس اللي آذونا.. الناس اللي اعتدوا علينا وشوهدونا وتركوا فينا آثار سيئة.. ده اسمه (تقمص المعتدي).. أو (التوحد مع المعتدي).. Identification with the Aggressor

وهنا فصل الخطاب.. ومحور الكلام.. ولب الرسالة..

شوف شوية أمثلة..

طالب في لجنة امتحان شفهي.. والدكتور كان غلس وقاسي وظاهر.. وطلع عين الولد وبهدله.. وكان هايسقطه.. تلف الأيام والسنين، ويبقى الطالب ده في نفس مكان الدكتور وبيمتحن طالب عنده.. تلاقيه بدل ما يكون لطيف ومنصف وعادل معاه.. يتحول بقدرة قادر إلى نسخة طبق الأصل من الدكتور اللي ظلمه.. وساعات يكون أقسى وأظلم منه..

طفل اتعرض لتربية صعبة وطريقة قاسية في التعامل من أبوه وأمه.. يجي لما يخلف ويكون عنده أولاد.. يتعامل معهم في كثير من المواقف بنفس القسوة اللي اتعرض ليها.. وكأنه بيتنقص أبوه أو أمه.. بدلاً من عمل العكس..

حد اتعرض لقهر وعنف وذل.. أول ما تلف الأيام وتدور دورتها، ويبقى في مكان اللي قهره وظلمه، يتحول لنسخة منه.. وربما أسوأ..

إحنا ساعات بنتقمص اللي اعتدى علينا علشان معرفناش ناخذ حقنا منه.. أو علشان ما نحسش بالضعف والعجز قدام نفسنا.. أو علشان في نفس الوقت اللي كنا فيه بنكرهه.. كنا برضه بنحبه..

بص تاني كده في المراية.. واسأل نفسك كمان مرة..

كام مرة اتعاملت مع حد بنفس طريقة تعامل أبوك معاك؟

في كام موقف لقيتي نفسك بتكرري مع بنتك أو صاحبتك نفس
اللي كانت والدتك بتعمله معاك؟

إمتي آخر مرة تقمصت حد غيرك ولعبت دوره؟

إمتي آخر مرة كنت مش إنت؟ كنت اللي ظلمك واعتدى عليك؟

في الحقيقة أكبر ظلم ممكن تظلمه لنفسك هو إنك تكون
نسخة من اللي آذاك..

وأكبر انتصار عليك من حد ظلمك.. هو إنه يحولك لصورة منه..

مش بس كده..

ده كمان أكبر أذى ممكن يؤذيهولك حد بتحبه.. هو برضه
إنه يخليك نسخة منه.. لأنه هايمسح شخصيتك فيه، ويذوب
لاماحك جواه، ويحرملك من اختلافك وتفردك.. هايخليك زي
الوصف الموجود في أغنية أصالة (أنا إنتي).. وصف شكله جميل
من بره، لكنه مليان تشويه وأذى من جوه (وبباقي الأغنية
بيؤكد كده):

أنا حبك.. أنا صاحبك.. أنا عقلك وتفكيره..

ما أنا منك.. وروح قلبك.. وأخوي لما تحكيله..

أنا فرحك.. ألم تعبك..

أنا في كل اللي بتحسيه حاسس بيكي..

ما أنا إنتي.. ما أنا إنتي..

ما فيش تشويه أكتر من إنك تلاقي نفسك بتعيش بشخصية
حد تاني.. مهما كان الحد ده..

بعض في المراية مرةأخيرة..

وأوعد نفسك..

إنك هاتفضل طول الوقت (أنت) ..

وإنك مش هاتكون في أي وقت أي حد تاني غيرك..
أي حد..

(٧)

انتبه.. أنت ترجع إلى الخلف

تفتكر إيه أصعب حاجة ممكن الواحد يعملها لما يتعرض لحدث نفسي هائل يفوق قدراته النفسية على التحمل: حادث مفاجئ.. خبر وحش.. ظروف صعبة.. أذى بدني أو معنوي شديد.. تربية قاسية.. فقد شيء أو شخص غالٍ أو عزيز (مع وجود بعض العوامل الجينية، وبعض الاضطراب الكيميائي بالمخ، وبعض الظروف الاجتماعية أو البيئية طبعاً؟)

في الحقيقة هو ممكن يعمل (أو تحصل له) حاجات كتير، منها إنه يصاب بمرض أو عَرَض نفسي.. اكتئاب.. توتر.. اضطراب ما بعد الصدمة.. أو درجات مختلفة من غياب الوعي.. وساعات اضطراب في الشخصية، وممكن جنون.. وغيرهم..

الأمراض النفسية ليها أشكال وأنواع كتير جداً. لدرجة إن أساسها بتتغير كل شوية مع الاكتشافات الجديدة في عالم الطب النفسي.. لكن من وجهة نظر تحليلية معينة، بعض الأمراض النفسية هي في الحقيقة رجوع للخلف (نكوص / Regression)..

معنى.. إنه أمام الصدمة النفسية الشديدة اللي ممكن حد يقابلها أو يمر بيها، بيقرر عقله - في بعض الأوقات- إنه يرجع لآخر مرحلة عمرية كان حاسس فيها بالأمان والاتزان النفسي.. عادة بتكون المرحلة دي أثناء الطفولة.. يرجع سنة، اتنين، ثلاثة، عشرة، عشرين.. هو ونصيبه.. وبتظهر عليه وهو كبير كل المواقف والخواص النفسية اللي كانت موجودة عنده في المرحلة العمرية الصغيرة دي (بس وقتها كانت موجودة بشكل طبيعي كجزء من نموه)..

تصور بقى لو المريض كل ما يرجع بعقله كام سنة لورا، يلاقي المرحلة اللي رجعلها مرتبطة كمان بصدمة نفسية تانية، وثالثة، وهكذا..

ساعتها هايضطر يعمل حاجة صعبة جدًا.. وهي إنه هايفضل يرجع لغاية ما يوصل للمرحلة النفسية اللي كان فيها وهو عنده كام شهر، لما كان بيتخيل / يهلوس حاجات مش موجودة يسللي فيها نفسه في غياب أمه (وإحنا نقول عليه ده بيحرك عينيه علشان بيشفواف الملائكة).. ونسمى ده في علم المرض النفسي رجوع/ نكوص غائي متقدم Progressive Teleological Regression يؤدي إلى (الفصام).. الجنون يعني.. وهو من أتعى الأمراض النفسية.. لكنه مش أعتها ولا أصعبها على الإطلاق..

الأتعى والأصعب فعلًا من الجنون ومن الاكتئاب ومن اضطراب الشخصية هو إن المريض يرجع لورا شوية أكثر.. آه.. يرجع كمان قبل الكام شهر الأولانيين في عمره، علشان حتى دول ما كانش حاسس فيهم بالأمان (إهمال شديد من الأم، قسوة شديدة من الأب أو الأم، صدمة نفسية شديدة جدًا).. ساعتها هايقرر (بشكل غير واعي) إنه يرجع للرحم.. لحياة ووضع وسلوك الجنين..

فاكرين مسلسل (سارة).. أهو هو ده اللي كان حاصل ليها.. سارة كانت عايشة حياة الجنين علشان دي كانت آخر مرحلة هي حست فيها بالأمان في حياتها.. ولما اطمانت للعام وللناس عن طريق الدكتور اللي كان بيعالجها (د. حسن)، كبرت شوية وبقت تتكلم وتتصرف زي الأطفال الصغارين.. وتتوالت أحداث المسلسل..

كل ده أنا كاتبه في الحقيقة علشان أمهد وأقدم للكلام الجاي..

إنت عارف إن الجنين في رحم أمه بيحس ويستقبل رسائل كتير من العام الخارجي؟ بيوصله حنان أمه ومشاعرها.. بيحس هي مضايقة واللفرحانة، بيعرف هي مطمئة واللا قلقانة، بيوصله هي بتحبه واللا لأ، قابلة وجوده واللاراضاه، عاوزاه واللابجه غلطة.. هو بيحس ويستقبل كل ده بطرق كتير جداً أبسطها الهرمونات اللي بيفرزها جسم الألم في حالاتها النفسية المختلفة وبتوصل للجنين من خلال المشيمة.. يعني حتى جوّه الرحم.. ممكن الجنين يحس بالحب والعطف والقبول والأمان.. أو يحس بالكُره والجفاء والرفض والتهديد.. ده مش كلام فلسي ولا أسطوري.. ده كلام علمي عليه آلاف الأبحاث والدلائل الحديثة..

المهم.. تصور بقى لو حد حصله صدمة نفسية بأي شكل من اللي وصفناهم، وكل ما عقله يُحاول يرجع لآخر مرحلة عمرية حس فيها بأمان ما يلاقيش، ولا حتى في الرحم وهو جنين.. عارف هاي عمل إيه؟ عارف إيه القرار اللي عقله هايأخذه (بشكل غير واعي طبعاً) وينفذه؟ قرار في منتهى الصعوبة والقسوة.. قرار إنه ينفصل عن العالم.. يخاصم الحياة.. يقفل على نفسه أبواب نفسه.. هو مش هايتحر أو يموت نفسه.. لا.. هو هاي عمل حاجة أصعب.. هو هايعيش ميت.. هايقى زيه زي أي نبات أو جماد.. لا يأكل، ولا يشرب، ولا يتكلم.. تشيله من هنا وتحطه هنا.. ما يتحكمش في أعصاب وعضلات جسمه ولا حتى في دخوله الحمام.. لو سيبته واقف هايفضل واقف.. لو خليته قاعد هايفضل قاعد.. إنت قدام شخص قرر يفارق الحياة وهو عايش..

يسموا ده في الطب النفسي كاتاتونيا Catatonia، وهي كلمة من أصل لاتيني معناها جثة.. بني آدم قرر يتحول لجثة.. علشان ده الوضع الوحيد اللي بيحس فيه بالأمان.. وضع الخروج من الحياة بكل سخافتها وضرارتها ومخاوفها.. هو مش بس بيغيب بوعيه زي حالات الهيستيريا والانشقاق.. لا.. ده كمان بيغيب عن العام بجسمه.. وبمشاعره.. وبأحاسيسه..

الكاتاتونيا هي أصعب مرحلة من المراحل اللي ممكن يصل إليها أي مريض نفسي، وعلاجها أصعب منها، وفهمها والوصول لمعانيها المختلفة من مريض مريض أصعب وأصعب..

في جلسة مع إحدى مريضات الكاتاتونيا بعد علاجها.. قالت المريضة للمعالج بتاعها (الإيطالي سيلفانو آريتي) إنه من ضمن أسباب مرضها بعدم الحركة والانفصال عن العالم هو شعورها بالذنب، لأنها كانت متصرّفة إن أي حركة هاتعملها ولو بسيطة هاتلخبط موازين الكون كله.. كلام شكله غريب.. لكن في الحقيقة، المريضة دي وصلها طول عمرها إن كل أفعالها غلط.. وكل كلامها بيعمل مشاكل.. وكل تصرفاتها بتلخبط الدنيا.. اللي حواليها وصلولها شعور عميق وساحق بالذنب على كل حاجة.. لدرجة إنها حست إن وجودها نفسه يدعو للشعور بالذنب.. فقرر عقلها الباطن إنه يشنل هذا الوجود ويوقف نشاطه وينفعه من عمل كل شيء وأي شيء.. علشان ما تغطّش وما تتعرضش للعقاب.. وما تحسّش بالذنب..

الكتاتونيا هي انعدام الحياة النفسية بحثاً عن لحظة أمان واحدة فيها..

الكتاتونيا هي قرار بوقف الوجود.. من شدة الألم والخوف..

الكتاتونيا هي أعمق درجة من درجات الموت النفسي..

لو ليكم أصحاب.. قربوا منهم وحبوهم واستقبلوا حبهم..
احفروا ذكرياتكم الحلوة معاهم في كل خلية فيكم..

لو ليكم أهل.. اقعدوا معاهم واسمعوهن وكلموهم.. سامحوهم
واعذروهم.. احضنوهن وحسوا بحضنهن..

وانتو بتربوا أولادكم.. خلوا فيه بينكم وبينهم لحظات حلوة
كتير.. مواقف طيبة فيها قبول وفرحة ورحمة..

علشان في وقتٍ من الأوقات..

لحظة أمان واحدة.. ممكن تكون هي حائط الصد ضد صدمةٌ
نفسيةٌ مفاجئةٌ..

موقف طيب بسيط.. ممكن يكون هو درع الحماية قصاد
هجوم المرض النفسي وشراسته..

حضن دافي صغير .. ممكن يكون هو مكانك الأخير عند اختفاء
كل الأماكن..

كلمة حلوة.. نظرة قرب.. ابتسامة رضا.. ممكن تكون هي الملجأ
والملاذ والمنقذ.. وقت طوفان النفس العنيف..

غمض عينك.. حسهم.. افتكرههم.. استرجعهم.. وامسـكـهم
بذاكرتك.. وما تفرطـشـ فيـهـمـ أبداً..

ولو قليلين أو مش موجودين.. الحق اعملـهمـ وعيـشـهمـ واستـمـتعـ
بيـهـمـ واحـفـظـ بيـهـمـ جـواـكـ.. يمكن يكونـواـ هـمـ الفـرـصـةـ الأـخـيـرـةـ..

.. قبل الرجـوعـ النـفـسيـ لـلـخـلـفـ..

(٨)

أنا بعشق البحر

حكايتنا مع الماية حكاية غريبة جدًا..

أول علاقة لينا مع الماية كانت في الرحم.. لما كان كل واحد فينا غرقان في السائل الأمينيسي وعامل زي السمسكة اللي عايشة في البحر.. حالة جميلة من المتعة والهدوء والدفـا.. الأكل والشرب بيوصل لغاية عندك.. حـي الأكسجين مش بتبذل أي مجهود علشـان تحصل عليه.. قمة الأمان والاطمئنان والرفاهية.. ملك متوج على عرش الرحم.. ما فيش خوف.. ما فيش ألم.. ما فيش مسئولية.. جنة كاملة بكل مواصفاتها وتفاصيلها..

لغاية ما يجي اليوم الموعود.. وتتزلزل الأرض من تحتك.. وتنهار السما من فوقك.. وتفجر شلالات المياه من كل ناحية، وتنقضى عليك جدران الرحم بكل قسوة، علشان تطردك من جنتك زي ما أبوك آدم اتطرد من جنته بالظبط.. وتنزل على الأرض.. ويبدأ الخوف، والألم، والمسؤولية..

زي ما قولنا قبل كده، كتير من الأمراض النفسيه يمكن تفسيرها من وجها نظر معينة على إنها رجوع للخلف Regression في تاريخ تطورنا وموئنا النفسي لغاية آخر لحظة كنا فيها في أمان وتوازن نفسي.. ومن أصعب الأمراض دي مرض الفصام اللي المريض بيرجع فيه لغاية المرحلة الفميه من موه النفسي (بدأ من الولادة حتى سن سنتين)، واللي كان فيها بيهلوس ويتخيل حاجات مش موجودة يسلي فيها نفسه في غياب أمه.. فيه مرضى قليلين جداً بيرجعوا أكثر شوية لغاية حياة الرحم.. وتصيبهم حالة نفسية وجسدية نادرة ياخدوا فيها وضع الجنين.. علشان ده الوضع والوقت والمكان الوحيد اللي كان فيه أمان بالنسبة ليهم..

فيه ظاهرة شهيرة جداً في بعض المرضى النفسيين اللي عندهم أمراض زي الفصام، والهوس.. وهي إنهم يبحبو الماء ويبقوا عاوزين يشربوا ماء كتير جداً.. لدرجة أن بعضهم بيحصله مشاكل عضوية بسبب زيادة نسبة الماء في الجسم (تسنم المياه).. ورغم إن فيه تفسيرات كتير للظاهرة دي.. لكن من أهم تفسيراتها النفسية هي رغبة المريض دول في الاتصال بالماء والغوص فيها زي ما كانوا زمان في الرحم.

السؤال بقى.. هو إحنا فاكرين حياتنا في الرحم؟
هو عقلنا لسه محتفظ بذكرياتنا في بطون أمهاتنا؟
هي قدرات ذاكرتنا تقدر توصل للدرجة دي؟
والإجابة بكل وضوح ومباشرة: نعم.. أيون.. فعلًا.. جداً..

فيه عام نفسي شهير اسمه ستانيسلاف جروف Stanislav Grof عمل مجموعة هائلة من الأبحاث والتجارب على كتير من الناس في سبعينيات وثمانينيات القرن الماضي (وما زال لغاية النهاية)، باستخدام طريقة معينة يخليهم بيها يغيبوا عن الوعي شوية، ويدخلوا في حالة من الهلاوس وما يشبه الأحلام والرؤى.. ويسألهم لما يفوقوا بما شافوا إيه أو حسوا بييه.. ويخليلهم يسجلوا أو يرسموا اللي شافوه.. كتير جداً من الناس كانوا بيوصفوا إحساسهم بأنهم كانوا زي السمكة في البحر.. وبعدهم وصف بشكل تفصيلي إحساسه جوه مكان مغلق مليان ماء، وبعدهم رسم بوضوح شديد رحم مقول فيه فتحة صغيرة داخل منها نور.. بعض الناس كمان وصفوا شعورهم بالاختناق.. أو بالضغط الشديد حواليهم.. أو بالزهق والضيق..

(جروف) بيفسر ده بأننا كلنا عندنا -على مستوى ما من مستويات وعيينا- مخزون هائل من ذكريات وجودنا في الرحم، ورغبة دائمة في العودة ليه.. والذكريات دي مش بس موجودة في ذاكرتنا المُحْيَّة.. لا.. دي موجودة في جسمنا وخلايانا فيما يُعرف حديثاً باسم (الذاكرة الخلوية).. أو (ذكريات الخلية).. وأن الذاكرة دي موجود فيها كل الخبرات اللي مرّينَا بيها في الرحم.. اللي بعضها ممكن يكون جيد وجميل وممتع.. وبعضها ممكن يكون صعب وسيئ نتيجة رسائل نفسية بتوصل للجنين من الألم (مش عايزاك، إنت جيت غلطة، يا ريت تنزل) أو تغيرات كيميائية بتحصل في الدم الواصل ليه من خلالها مع تغير حالاتها النفسية أو العضوية.

مش بس كده.. ده الكلام ده بيفسر حاجات كتير تاني..
عمرك حلمت أو تعرف حد حلم بالبحر؟
شوفت في المنام قبل كده أو حد حكالك إنه شاف نفسه (أو حد تاني) بيغوم أو بيغرق؟
بتحب أو تعرف حد بيحب ينام في وضع الجنين؟

كل ده ليه نفس التفسير، ونابع من نفس المصدر الداخلي، اللي محتفظ بكل ثانية وكل تفصيلة من مرحلة هامة جداً في وجودك.. مرحلة حياة الجنين.. اللي كنت بتعوم فيها في بحر الرحم بأمواجه ومده وجزره..

المراحل دي بتكون (الولادة) بالنسبة لها بمثابة (النهاية).. نهاية الجننة ولمتعة والنعيم.. علشان كده فيه نظرية كاملة في علم النفس اسمها نظرية (صدمة الولادة)..

فيه كمان حلم شهير بيترر عند بعض الناس.. بنسميه حلم نهاية العالم.. بيكون فيه العالم بيتهي وبيتدمى.. ساعات زلزال.. ساعات مایة من كل ناحية تغرق الناس والمباني.. ساعات رياح وعواصف ومطر.. أحد تفسيرات الحلم ده هو إنه وصف تفصيلي للحظة الولادة اللي انها عالم الجنين وانتهت فيها حياة الرحم..

فيه علماء بيفسروا رغبة بعض الناس في الموت بأنها أحد صور رغبهم الأعمق في العودة للرحم.. المكان المقبول المظلم اللي ما كانش فيه غير السكون والهدوء والفراغ.. لكن طبعاً دي صورة مريضة جداً تستدعي العلاج النفسي المكثف.

فيه ناس كمان بتقول إن مجرد (النوم) هو استعادة لذكريات السبات العميق داخل الرحم.. وأنا شخصياً شايف إن (الحضن) هو البديل اليومي الطبيعي المتاح لاسترجاع مشاعر حضن الرحم.

واضح إن الموضوع كبير جداً.. بس مش معناه على الإطلاق إن اللي بيحب البحر والماء يبقى عاوز يرجع أو ينكص.. أو إن الحنين للرحم ده شيء مرضي أو مستهجن.. بالعكس.. دي حاجة طبيعية موجودة عند كل الناس في أحد مستويات وعيهم.. وممكن تكون دافع للحركة وطاقة للنضج وأرضية متقدمة للحياة..

طيب.. إيه بقى ؟!

بص يا سيدتي..

إحنا في رحلة.. بدأناها مختارين أو مضطرين أو الاتنين.. رحلة بدأناها في الجنة.. جنة آدم.. وبنسعي في حياتنا إننا نرجع ليها تاني.. بالعمل والمشقة والصبر.. بالمعاملة الحسنة والأخلاق الطيبة والقرب الحقيقي من نفوسنا ومن الناس ومن ربنا.

بعض الناس عاوزة تستسهل وتوصل بسرعة.. من خلال طرق مختصرة.. تبعد فيها عن الناس وتكرههم وتحكم عليهم وتسئ معاملتهم تحت ادعاءات فارغة، وتبعد عن نفسها وتحقر من شأنها وتتفنن في ذلها بسميات مغلوطة، وتتصور إن ده بيقربها من ربنا.. مع إنه في الحقيقة مش بيقربنا من أي حاجة..

فيه صورة مصغرة للرحلة دي.. بدأناها في الرحم.. وجوانا رغبة دائمة للعودة ليه.. بعض الناس برضه عاوزة تستسهل وتوصل بسرعة.. من غير خوف.. من غير ألم.. من غير مسئولية.. مرة بالمرض النفسي..مرة بالرغبة في الموت..مرة بالهروب من الناس.. لكن ده في الآخر مش بيوصل لأي حاجة..

البحر حلو وجميل ومغرٍ..

لكن علشان تعوم..

مهم تبذل شوية مجهد ومعافرة وكفاح..

ساعات هاتمشي عكس التيار..

ساعات هاتقف في وش الموج..

ساعات هاتقاوم بكل قوتك..

الاستسلام للغرق سهل..

بس رحلة الحياة مليانة شرف..

بعد ما تخلص الفصل ده.. عاوزك تشواف فيلم (جرافيتي)، Gravity، وتركز في المشهد المبدع اللي بتظهر فيه بطلة الفيلم في وضع الجنين داخل مركبتها الفضائية، بعد ما انتهت بيها جميع المحاولات.. وضاقت بيها كل السبل.. لكنها بعد دقائق.. تقرر إنها ما تستسلمش.. وإنها قبل صعوبة الحياة.. وتتجاوز ألم فقد.. وتغامر وتجازف وتقتحم الخطر.. وتنزل على الأرض.. وتخبط خطواتها الأولى نحو الحياة.. على شاطئ البحر.. وكأنها لسه بتتعلم المشي.. بكل إرادة، وإصرار، وشجاعة..

القوم بقى اشرب شوية مایة.. وكأنك بتشرب للمرة الأولى.. حس فيها.. استطعمها.. واكتشف معابها.. إن المایة مش زي ما كانوا يعلمونا في المدرسة ما لهاش طعم ولا لون ولا رائحة..

المایة - على رأي د. مصطفى محمود- ليها طعم الحياة..

بالللا.. هنا ودلوقت..

جدد علاقتك بـ المایة..

جدد علاقتك بالحياة..

(٩)

أنت تكرهني.. إذن أنا موجود



تصوّر ما يكون مصدر إحساسك بنفسك في الدنيا هو إن حد
بيكرهك..

تصوّر ما يكون شعورك بوجودك مرهون بوجود ناس بتحسّدك
وبتقربك و بتتأمر عليك..

تصوّر إنك ما تحسّش بقيمتك وبأهميةك إلا من خلال ناس
عاوزة تسمّك وقوتك وتخلص منك..

زي ما قولنا.. من أصعب الأمراض النفسية على الإطلاق مرض
(الفصام)، وهو واحد من فصيلة أكبر من الأمراض اسمها
الأمراض الذهانية.. أول وأهم عرضين في الفصام (الجنون) هما
الضلالات والهلاوس (فيه طبعاً أعراض أخرى كتير).. ضلالات
يعني أفكار خاطئة وصاحبها مصدقها للدرجة لا تقبل الشك،
وهلاوس يعني المريض يستقبل حاجات مش موجودة في
الحقيقة.. يسمع أصوات غريبة، يشوف صور ومشاهد مش
حقيقية، يحس بحاجات محدث غيره يحس فيها وهكذا..

المهم.. كل دي أعراض مرضية، معروفة ومكتوبة بشكل أدق
وأفضل في كتب الطب النفسي وعلم النفس.. لكن.. دي مش كل
الحكاية.. ومش غاية المقصود..

الحكاية -من وجهة نظري- هي إيه اللي ورا الأعراض الغريبة
دي، إيه معناها وإيه سببها؟ جاية منين ورايحة فين؟ المريض
عاوز يقول إيه من خلالها؟

يعني إيه حد بيقى متأكد إن الناس بتكرهه وعاوزة تموته؟

ليه حد يتصور إن فيه كاميرات بتراقبه أو فيه سم في الأكل؟

إزاى حد يشوف حاجات مش موجودة، أو يسمع أصوات مش حقيقة؟

طبعاً فيه تفسيرات كتير، وإجابات أكثر.. منها الوراثي والجيني والبيولوجي والكيميائي.. وكلها قائمة على نظريات علمية غاية في الدقة، لكن الأهم والأدق منها جميعاً هو التفسير النفسي.. اللي ليه علم قائم بذاته.. اسمه علم السيكوباثولوجي..

تصور حد وصلته رسائل نفسية في طفولته وأثناء تربيته - ساعات في معظم فترات حياته- إنه مش مهم.. وإنه ما لهوش قيمة.. رسائل من نوعية (إنت ما لكش لازمة).. (يا ريتنا ما خلفناك).. (كان غيرك أشطر).. (إنت زي قلتك)..

تصور حد كل اللي شافه من اللي حواليه حب بشروط، وقبول بشروط، واهتمام بشروط..

تصور حد كان مضطرب طول الوقت إنه ما ييقاش نفسه، ويدفنها، ويدفن معها حقيقته وتلقائيته وإبداعه.. علشان خاطر اللي حواليه يرضوا ويقولوه برأفيو..

الشخص ده نفسيته هاتبقى عاملة إزاى؟

بلاش كده..

حد بيتفاalle بالكلام اختار مستقبلك واعمل اللي إنت عاوزه..
ويتفاalle بالتصرفات إوعى تكون غير المشروع اللي أنا عاوزه..

أو واحدة يتفاalle بالكلام إنتي حرة ومعززة ومكرمة.. ويتفاalle
بالتصرفات إنتي عار وجودك جريمة وذنب..

كل دول هايكونوا عاملين إزاي من جوه؟
إحساسهم بنفسهم هايكون إيه؟
علاقاتهم بنفسهم وبالعالم هاتاخد أي شكل؟

بدون الدخول في تفاصيل مؤللة.. دول هم المادة الخام والتربة
الخصبة للمرض النفسي.. كل واحد منهم هو عبارة عن مشروع
مريض نفسي من الدرجة الأولى.. قبلة موقوتة مستينة لحظة
الانفجار.. في وجود بعض العوامل الجينية والبيولوجية طبعاً..

الأمراض النفسية باختصار شديد جداً هي إما جنون، أو
دفاعات ضد الجنون (على رأي د. يحيى الرخاوي).. يعني اللي
هايقدر منهم يستحمل واقعه المؤلم، ويحتفظ ببعض من عقله في
مواجهة تربيته وظروفه وجيناته، هايصاب بأمراض زي الاكتئاب
والقلق والجسدة واضطرابات الشخصية.. أما اللي مش هايقدر
يستحمل الواقع والظروف والضغوط والصدمات النفسية اللي
شافها طول عمره، فده اللي هايقرر بشكل واعي أو غير واعي
إنه ينفصل (ينفصّم) عن الواقع ده تماماً، ويخلق الواقع بتاعه
هو.. (علشان كده سمهوه فسام)..

وهنا لينا وقفه.. عند جملة (يخلق الواقع بداعه هو)..

اللي شافه مريض الفصام من واقعه وحياته والناس اللي حواليه أصعب بكثير من تحمل قدراته النفسية والعقلية.. علشان كده هو بيقرر إنه يسيب العام ده كله على بعضه، ويعيش في عام خاص بيته هو لوحده.. فيه ناس هو اللي يصنعهم، وأحداث هو اللي يصيغها، وتفاصيل هو وحده اللي يتحكم فيها.. فيبدأ يخلق أشكال وألوان وبني آدمين.. ليهم صوت وصورة وحياة.. وينسج حكايات وروايات وسيناريوهات.. ويصدق أفكار ومعتقدات وشكوك..

طيب.. المنطقى إنه طاما اللي شافه قبل كده في حياته حاجات وحشة، وخبرات مؤلمة.. يبقى يخلق شخصيات جميلة وطيبة، وأحداث هادبة ولطيفة وخفيفة.. في الحقيقة ده ساعات بيحصل، بس مش دايماً.. اللي بيحصل أكثر هو العكس.. ورغم إن ده غريب.. لكنه مثير للشفقة لأقصى درجة..

ليه؟

أقولك ليه..

مريض الفصام وصلته رسالة في مرحلة ما في حياته أنه مرفوض.. إن وجوده مش مرغوب فيه.. إن كيانه مالهوش أي قيمة ولا لازمة ولا أهمية حتى لأقرب الناس ليه.. يبقى في الحقيقة هو من جواه بيتمنى أي شكل من أشكال الوجود، وأي درجة من درجات القيمة والأهمية.. وهنا الغلب والوجع الحقيقى..

مريض الفصام بيتمنى من جواه إنه يحس بوجوده.. حتى لو معنی ده إن فيه حد بيكرهه.. حتى لو من خلال حد هو يخالقه ويتصور إنه هايحطله السُّم في الأكل.. هو يعني كان عرف يعني إيه حب من أصله؟ هو لقى حب وقال لأ؟ هو العالم الداخلي بتاعه فيه غير كده؟ ده يا دوب بيدور على أي حد.. إن شالله حد يكرهه ويتأمر عليه ويقى عاوز يوطه.. ما هو معنی كده إنه موجود.. وإنه مهم.. وإنه ليه قيمة.. وقيمة كبيرة كمان.. ده بعض المرضي من غلبهم بيتصوروا إنهم أنبياء أو (المهدي المنتظر) من كتر احتياجهم الشديد للاهتمام والشعور بالقيمة والأهمية.. لا حول ولا قوة إلا بالله..

وطبعاً المصدر الأساسي والرئيسي لكل الهلاوس اللي بيخلقها وكل
الضلالات اللي بينسجها هو العام الداخلي بتاعه، اللي مليان
كائنات مخيفة وأشكال مرعبة وأصوات صارخة اتكونت جواه
من خلال كل اللي وصله عن نفسه وعن الآخرين طول حياته.

ولو ما نفعش كل ٥٥.. يرجع في عمره العقلية شوية، ويهلوس
بالمية والبحر والغرق.. اللي بيفكروه بالسائل اللي كان بييروم
فيه في المكان الوحيد اللي حس فيه بالأمان.. رحم أمه..

ولو ده كمان ما نفعش.. ينفصل تماماً عن الحياة.. ويحيله
كتاتونيا (تخشب) تخليه زي أي نبات أو جماد.. لا يأكل ولا
يشرب ولا يتحرك..

طبعاً ده تفسير مبسط جداً ولا يمكن تعديمه.. فيه تفسيرات
كثير.. وأعراض أكثر..

مريض الفصام مصاب في أعمق أعماق نفسه..
مصاب في وجوده ومعناه وقيمةه وأهميته..
مصاب بشعوره الشديد بالرفض اللي وصله بشكل قاسي وممتد..
إزاي ما يتجننن يعني؟

نرجع هنا تاني بقى.. عندك وعندي.. وعندي أصحابنا وحبابينا
وأولادنا وقرابينا.. ونقول ونعيid كمان..

الدفاع القوي الناجع ضد كل الأمراض النفسية - مهما تطور
العلم وزادت الأبحاث، هو وجود إنسان (ولو واحد) قابلك
ومهتم بيكم وبيحبكم حب حقيقي غير مشروط..

خط الرجعة الأخير ضد الاكتئاب والقلق واضطرابات الشخصية،
في وجود كل أنواع الأدوية والعقاقير، هو علاقة إنسانية يوصلك
فيها إنك من حقك تكون نفسك.. من غير ما تدفع أي ثمن..

حائط الصد الصلب ضد الذهان والفصام والجنون، بالرغم من
نجاح بعض الطرق الأخرى، هو إنك تصدق إنك تستاهل تعيش،
وستeahل تفرح، وستeahل تتحب.. وإن ده حقك..

ستeahل تعيش..
وستeahل تفرح..
وستeahل تتحب..
وده حقك..

جرب تقول كده:
أنا أستeahل أعيش..
وأستeahل أفرح..
وأستeahل أتحب..
وده حقي..

(١٠)

كرياج (لازم) .. وحبل (المفروض)

معظم الأمراض النفسية ليها أسباب بيولوجية معروفة ومثبتة بدلائل علمية قوية، إلى جانب عامل وراثي لا يأس به في كثير من الحالات.. لكن.. في الحقيقة الأمراض النفسية مش بتتفسر بس بالأسباب البيولوجية، أو بالعوامل الجينية.. ده فيه عشرات وربما مئات العوامل الأخرى اللي بتتدخل مع بعض علشان تؤدي في الآخر للإصابة بالمرض ده أو غيره من أمراض النفس.. ومن أهم العوامل دي طريقة التربية، ومعاملة الأب والأم، والرسائل اللي وصلت للأبناء من خلالهم، اللي تأثيرها تضامن مع باقي العوامل لغاية ما أصبح عندنا مريض نفسي..

زى ماعرفنا قبل كده.. كل واحد فينا بيوصله خلال تربيته مجموعة من الرسائل النفسية اللي مع تكرارها وتأكدتها من الأب والأم كل شوية تتحول لجزء لا يتجزأ من التكوين النفسي للأبناء.. لدرجة أن الرسائل دي بعد كده تطلع من جواهم ليهم تقائياً وكأنها بتاعتھم هما شخصياً. يعني اللي وصلته رسائل من نوعية (إنت ما تستاهلش).. (إنت أقل من غيرك).. (سوف فلان أحسن منك إزاى).. هايكبر وتفضل الرسائل دي جواه.. وهابطلله صوت من جواه كل شوية يقوله (إنت قليل).. (إنت وحش).. (فلان عمل وإننت ما عملتش).. وهكذا..

إحنا جوانا جهاز نفسي مهم زي الريكوردر مسجل فيه كل الرسائل اللي وصلتنا في طفولتنا وصدقناها عن نفسها وعن العالم وعن الآخرين.. الجهاز ده شغال ٢٤ ساعة في اليوم.. حتى وإننا نايمين، ممكن بيعتلنا رسائله في الأحلام.. الجهاز ده حته منك.. مش حاجة منفصلة عنك.. ولما الرسائل دي بتطلع لوعيك، بتكون خلاص بقت بتاعتكم..

تصوّر بقى حد وصلتله رسائل نفسية وهو صغير (عادة قبل سن خمس سنوات) محتواها عبارة عن (إنت ما عملتش اللي عليك).. (إنت دايمًا مقصري).. (أنا مش راضي عنك).. (فيه أحسن من كده).. (لسه ناقص شوية.. كمل).. ملّ الرسائل دي يصدقها عن نفسه ويخرّنها جواه.. لدرجة إنه يبدأ بعد شوية يتعامل بيها مع نفسه.. تفتكر هاي العمل إيه؟

بكل بساطة الشخص ده عمره ما هايحس إنه عمل اللي عليه..
هایلاه الشك في كل حاجة بيعملها..

هايحس بالذنب والتقصير على كل خطوة بيخطيها.. لأنها دايمًا ناقصة، ومش كاملة، وكانت ممكن تبقى أحسن..

الشخص ده كل ما يعمل حاجة تطلع له فكرة ملحة من جواه تقوله: (لسه شوية).. (ما تعملتش صح).. (المفروض كانت تتعمّل بشكل أفضل).. (لازم تعيدها تاني علشان تطلع أحسن).. (أنا لسه مش راضي).. (اعمل الصح).. فيعيد ويزيدي اللي عمله علشان يهدى ويرتاح، وترجع الفكرة تتكرر تاني.. وهكذا.. وهكذا.. بلا نهاية..

الموضوع ده ممكن يحصل في النضاقة، الوضوء، الصلاة، النظام، الترتيب، الأكل، الشرب، الاستحمام، قفل وفتح الباب، طريقة وتفاصيل اللبس.. أي حاجة.. أي حاجة.. سلسلة لا نهاية من الشك والمراجعة وعدم الرضا.. واحد اتربى على إنه دايمًا مشكوك فيه.. دايمًا ما فيش رضا من أبوه أو أمه.. ما يشكش في نفسه وفي أفعاله ويعيدها ألف مرة كل يوم ليه يعني؟

اللى بنو صفه ده هو واحد من أشهر الأمراض النفسية وأكثرها انتشاراً.. اسمه (الوسواس القهري).. وساعات بيتتحول إلى سمات وخصائص شخصية عميقة وطويلة الأمد، ويبقى صاحبها مصاب باضطراب (الشخصية القهريه)..

فيه طبعاً شكل تاني من أعراض المرض ده.. وهي أفكار متلاحقة بتطلب من المريض إنه يشتم حد أو يسمى إلى حد.. وساعات كثير الحد ده بيكون ربنا.. وفي الحقيقة ربنا هنا مش بيكون مقصود بيه ربنا نفسه قد ما هو رمز لكل سلطة أبوية / والدية اتعامل معاه المريض في حياته ووصلت ليه رسائل قاسية بالشكل اللي وصفناه..

ساعات كمان تتواجد على ذهن المريض أفكار أو صور جنسية ويحاول يقاومها ويقاوم الانسياق وراها، وده ساعات بيكون برضه شكل من أشكال الاعتراض والتمرد على تربية قاسية وعنيفة..

مريض الوسواس القهري بيكون جواه عملق نفسي ضخم، صوته عالي وتأثيره قوي.. عملق جبار لا يرضى أبداً.. في إيه سلاحين في منتهى القسوة.. سلاح الشك.. وسلاح الشعور بالذنب.. بيستخدمهم علشان يسلط على المريض أفكار وخيالات وصور بشكل متلاحق ومتواتر، لا يكل ولا يمل.. وطول الوقت بيعد جواه نفس الرسائل القديمة اللي وصلته: (إنت ما عملتش اللي عليك).. (إنت دايماً مقصر).. (أنا مش راضي عنك).. (اعمل الصح)..

العملاق ده لغته ومفرداته كلها عبارة عن مشتقات وتنويعات من (لازم) أو (المفروض).. مجموعة هائلة من اللوازيم والمفروضات اللي كل واحدة فيهم عاملة زى السيف الحاد المسلط على نفس صاحبها بدون راحة أو هوادة.. واللى أصلهم كلام تربية قاسية وتنشئة صعبة..

عاوز أقولكم بكل معاني الأمل والرجاء..
ارضوا من أولادكم بأقل القليل..
بلاش تعابروهم بالتقدير وعدم الكمال..
بلاش تجلدوهم بكرجاج (لازم)..
وبلاش تشنقوهم بحبـل (المفروض)..
سامحوهم واعذروهم واقبلوا خطأـهم وضعفهم وفشلـهم..

وقبلها..
سامحوا نفسـكم.. واعذروها.. واقبلوا خطأـكم وضعـفهم وفشلـكم..
إـحنا بنـي آدمـين..
إـحنا مش ربـنا..

(١١)
الحزن الأزرق الدافي
عن فيلم
Inside Out

باتخض جًدا لما أشوف كتاب عنوانه: "كيف تخلص من أحزانك؟.." أو: "لا تقلق.."

باتخض أكثر لما ألاقي حد عمال يطبطب على حد بشكل مبالغ فيه، أو يخفف عنه بطريقة سطحية مليانة اختزال لمشاعره بكلام من نوعية: "ما تزعليش يا راجل.." "اضحكي بس كده.." "خليك فرحان على طول.."

يعني إيه ما تزعلش أو ما تحزنش أو ما تتألمش؟ اللي هو إزاي يعني؟

الحزن مشاعر زيها زي الفرح بالظبط.. والألم تجربة إنسانية فريدة بتكبر صاحبها وتفتح عينه وتغيره.. هو ينفع أعيش بجزء واحد من إنسانيتي وألغي باقي الأجزاء؟ هو ينفع إني أتجاهل شعور من أهم وأعمق المشاعر الحية على الإطلاق وأعتبره مش موجود أو حتى وجوده مرفوض بمجرد إنه مؤم شوية؟ أو بيوجع شويتين؟

فيلم Inside Out بيحاوب ببساطة شديدة جداً على الأسئلة دي.. ويقولنا بصوت عالي: "لأ ما ينفعش.."

()

أول رسالة استقبلتها (رایلی) الطفلة المولودة حديثاً من أبوها كانت : "ألاستي قطعة من الفرح؟ .. وكانت الرسالة الثانية اللطيفة جداً اللي أنها بتوصلها ليها دائماً وقت الشدة والحزن : "يجب أن نبقى مبتسدين بذلك يساعدنا" .. Keep smiling happy girl

عشان كده (رایلی) الصغیرة قررت تسلم دفة عالمها الداخلي
لنواع واحد بس من المشاعر.. النوع اللي اتربيت واتعلمت إنه
لازم يفضل موجود على طول.. حتى في أشد الأوقات وأحلك
الظروف: مشاعر (الفرح).. وقررت إنها تحاول بكل طريقة
تخفي أو تنكر- وساعات تحارب - أي نوع تاني من المشاعر
الإنسانية الطبيعية زي (الخوف) و(الغضب) و(الاشمئاز).. وطبعاً
وبشكل خاص جداً (الحزن).. (رایلی) قررت إنها ما تحزنش..
أبداً.

()

تمر الأيام وتكبر (رايلي) وتضطر إنها تواجه أول تجربة (فقد في حياتها.. لما أسرتها تقرر تسبيب البيت اللي عاشت فيه سنين طويلة وتنقل لبيت جديد في ولاية تانية.. وبالرغم من إن أي طفل في موقف زي ده من حقه يحزن ويتألم لفقد مكان طفولته وذكرياته وأهم وأجمل سنين عمره، إلا إن (رايلي) حاولت بكل طريقة توقف السريان الطبيعي لمشاعر الحزن جواها.. واستخدمت في سبيل ده كل ما أوتيت من وسائل دفاعية نفسية..

واستحضرت كل ذكرياتها المبهجة.. قرأت كتب الرشاد، وكتبت قائمة بكل الأمور اللي بتسعدها.. وعافترت نفسها بشدة للتأقلم مع الوضع الجديد.. وكانت شعاراتها طول الوقت: "دائماً هناك طريقة لقلب الأمور وإيجاد المتعة.." "كوني سعيدة.." "لا تقلقي.." "سنتأكد أن غداً هو يوم عظيم آخر.." "وبدوره سيصبح عاماً جميلاً، إلى أن تصبح الحياة بأكملها جميلة.."

(رايلي) -بساطة- ما ديتشن نفسها (حق الحزن)، وحاولت تحجمه وقمعه وتنكره وتحاصره في دائرة صغيرة جوه حتى بعيدة جواها.. (رايلي) ما سمحتش لنفسها تتألم (ألم فقد)، ولا حتى تحسه.. ولو في أحلامها.. زي ما شافت، وزى ما اتعلمت.. وزى ما وصلها من أبوها وأمهما..

لكن.. وزى ما هو متوقع.. أي خناقة بينك وبين نفسك هاتطلع منها خسران.. وأي محاولة لتجزئة نفسك وتقسيمها والتخلص عن بعض منها لن تنتهي إلا بالفشل.. وأي إنكار أو تحجيم لجزء أصيل من تكوينك مش هايكون ليه أي نتيجة غير الانهيار.. وده اللي حصل مع (رايلي).. اللي عند لحظة فارقة، انهارت.. واتلخت.. واتفكت.. تصرفاتها بقت غريبة، مشاعرها بقت غير مناسبة، وأفكارها بقت مش طبيعية.. حتى أحلامها.. بقت ملخبطة..

وبدأت رحلة (رايلي) جوا نفسها.. علشان تشفو حل.. وتدور على طريق للرجوع..

في الرحلة دي، كان على مشاعر (الفرح) ومشاعر (الحزن) إنهم يقربوا من بعض أكثر، ويعرفوا بعض أحسن، ويوصلوا -بأي شكل- لبر الأمان..

(٣)

(الفرح) في الرحلة دي كانت بتمارس الدور اللي هي عارفاه
ومتعودة عليه ومش بتلعب غيره، وهو إنها تبذل مجهد
رهيب في إضفاء جو البهجة على كل شيء.. والتخلص من أي
(حزن) على الإطلاق.. لكنها في الحقيقة بتكتشف في الرحلة -
وبنكتشف معها- تفاصيل جديدة، ووجوه مختلفة، وأبعاد
أخرى.. (للحزن)..

(الحزن) كانت مثقفة أكثر.. كانت لابسة نظارة.. من كتر شغفها
بالقراءة والمعرفة.. علشان كده كانت مليانة هدوء وحكمة..
أيوه حكمة..

(الحزن) هي اللي كانت عارفة طريق العودة مقر قيادة العام
الداخلي، وكانت بتقوم بدور المرشد والدليل.. وساعات المنفذ
بعيد النظر..

(الحزن) هي اللي حست (الصديقخيالي / الفيل) وقت ما زعل
وتعاطفت معاه وإدته الفرصة بيكي ويتألم على (فقد) عربته
الجميلة، على عكس (الفرح) اللي حاولت- كعادتها- تطبط
عليه وتشغله عن حقيقة مشاعره.. علشان تحول دموعه لقطع
جميلة من الحلوى.. في مشهد رائع ينتهي بأنهم يقدروا يلحقوا
قطار الأفكار الأخير إلى مقر القيادة .

(الحزن) كانت صاحبة كل الأفكار الإبداعية الجديدة في حلم
(رايلي) علشان تخليها تصحي من النوم..

وفي الوقت اللي قررت (رايلي) فيه أنها ترجع لورا شووية - تنكص بلغة الطب النفسي - وتهرب من بيتهما الجديد، وتروح للبيت القديم.. في محاولة يائسة للهروب من حزن وألم (الفقد).. يجي أروع مشاهد الفيلم.. اللي فيه (الفرح) تسمح لنفسها أخيراً بـ (الحزن)، وتسيب نفسها تتألم لفقد بيتها القديم، وفقد طفولتها اللي مش هاترجع تاني، وفقد أصدقاءها ووجودها معاهم.. وتكشف (الفرح) إن (الحزن) ساعات بيكون معاه شجن.. ساعات بيكون معاه ونس من القريبين.. ومساعدة من الآخرين..

وفي درس عقري.. يقرر (الصديق الخيالي / الفيل) هو كمان أنه يقبل (الفقد)، ويقبل (الحزن) ويقبل (الألم).. لما يضحي بمكانه في عربته الجميلة الطائرة، علشان يخفف عنها الحمل، ويهون عليها الطيران.. ويزرع في (الفرح) الأمل من جديد.. أمل معجون (بالحزن)..

وتتسلم (الحزن) قيادة دفة (رايلي).. علشان تديها من شجنها وثباتها وحكمتها.. وتصبغها بلونها الأزرق الدافي.. ويكون السماح بوجودها هو الطريقة الوحيدة اللي تبني (رايلي) عن فكرة الهروب وترجعها لأسرتها تاني..

وفي مشهد ختامي رائع.. تسمح (رايلي) لنفسها بالتعبير عن حزنها (لفقد) بيتها، و(ألمها) للبعد عن أصدقائها، و(اشتياقها) لطفلتها وذكرياتها.. وتبكي (رايلي).. ودموعها تنهمر زي اللؤلؤ على خدها.. وتطلب من أبوها وأمهما بكل صراحة إنهم يحسوا بيها وما يطلبوش منها تفضل (سعيدة) على طول.. وما يغضبوش من (حزنها).. وإنهم يدوها الحق في (الألم)..

ولا يمل الأبوين في اللحظة دي غير إنهم يفتحوا ليها قلوبهم،
وعقولهم.. وكمان حضنهم الشافي.. اللي بيجمعهم من تاني..
واللي في نفس الوقت بيجمع كل أجزاء (رأيلي) على بعض في
كل واحد جديد وجميل: (الفرح).. (الخوف).. (الغضب)..
(الاشمئذار).. و(الحزن)..

(الحزن).. الأزرق الدافئ..

(٤)

حق الحزن

إليك هذه المفاجأة..

إنت من حبك تحزن.. أيوه.. تصوّر..

اتربينا واتعلمنا إن الحزن عيب.. الحزن ضعف.. الحزن غلط..
مع إن الحزن مشاعر إنسانية ربنا خلقها فينا زيها زي الفرح
وزي الغضب وزي الخوف.. لكننا بنهاوى نكون آلهة أو أنصاف
آلهة.. لا تضعف.. ولا تفشل.. ولا تحزن..

"خليك راجل، ما تعطيش.." "يا بنت عيب تدمعي كده قدام
الناس.." "يا جدع احمد أمال.." دي الرسائل اللي بتوصلنا عادة
خلال التربية.. وخلال التعليم.. وطبعاً من خلال مجتمعنا
الي بيعودنا نمارس إنسانيتنا وحقيقةنا خلف الجدران، ونمارس
تشويهنا لنفسنا وتزييفنا ليها في الشوراع وأمام الناس..

إمتنى آخر مرة حضرتك حزنت؟ كتير جداً طبعاً..

لكن إمتنى آخر مرة حضرتك سمحت لنفسك تعيش حزنك
بجد؟ قليل جداً..

طيب إمتنى آخر مرة قبلت حزنك وما خفتش منه أو حاولت
تنكره؟ أقل بكثير..

أنا طبعاً مش باتكلم عن الحزن اللي هو العياط والساح
والشحافة.. أنا باتكلم عن الحزن اللي هو حالة إنسانية عميقة
جداً من الشجن والألم.. مليانة مراجعة للنفس.. وتأمل داخلي
 حقيقي.. وعودة هادئة إلى قواعده، تلتقط فيها أنفاسك.. لتبدأ
 من جديد..

الحزن حق.. زي ما الفرح حق.. والخوف حق.. والغضب حق..

ما ينفعش أقص حنته مني بكل بساطة كده، وأرميها أو أتخلى
 عنها مجرد إنها بتوجع.. النهاردة أقص الحزن.. بكرة أقص
 الخوف.. بعده أقص ما تبقى من إنسانيتي وطبيعتي البشرية
 الحقيقة الضعيفة.. ومش هايفضل مني غير شتات.. ورماد..
 وبقايا مهلهلة..

من حفك تحزن.. زي ما هو من حفك تفرح.. ومن حفك
 تغضب.. ومن حفك تخاف..

ففي بعض الحزن حكمة.. وفي بعض الحزن نور.. ومن بعض
 الحزن يولد الأمل..

هاتسألني دلوقت: يعني مطلوب مني أسيب نفسي للحزن والألم كل شوية؟

لا طبعاً.. مش ده المقصود.. المقصود إنك تسمح لنفسك تعيش مشاعرك زي ما هي، في وقتها وبرغمها المناسبة.. من غير ما تهرب منها، أو تنكرها، أو تعتبرها مش موجودة، أو حتى تغرق فيها لوحدهك.. مطلوب منك تسمح لنفسك تعيش إنسانيتك وحقيقةك.. من غير اختزال أو تشويه أو نقصان.. وبرضه من غير مبالغة أو تضخيم أو استفزاز..

من حبك تحزن (من غير شحثفة).. زي ما هو من حبك تفرح (من غير خيلاء).. ومن حبك تخضب (من غير فجور).. ومن حبك تخاف (من غير ما الخوف يسحقك)..

جريت ده قبل كده؟
غالباً لأنّا..

طيب جرب وهاتعرف بنفسك إنت كنت حارم نفسك من إيه..
وما تتسامش توصف - وبدقّة شديدة جداً - النفس الطويل العميق
اللي ها تاخده جنب أول حد يحس بيك ويونسك ويربت على
كتفك ..

دي مش دعوة للحزن..

دي دعوة لقبول (الحزن) كشعور إنساني حقيقي وأصيل.. مش الهروب منه.. أو تجاهله.. أو الغرق فيه وفي وحدته وسوداده..

دُعْوَة إِنْكَ تَرْجِعُ كُلَّ حَتَّةٍ مِنْكَ مَكَانَهَا.. وَتَسْيِيهِمْ يَقْرِبُوا مِنْ بَعْضٍ.. وَيَتَلَمِّلُوا.. وَيَتَحَمِّلُوا.. وَيَتَأْمُوا.. فِي كُلِّ وَاحِدٍ صَحِحٍ.. وَجَمِيلٍ.. وَحَكِيمٍ.. وَمُبْدِعٍ..

دِي دُعْوَةُ لِلْحَيَاةِ..

فِي الْفَرَحِ حَيَاة..

وَفِي الْحَزْنِ أَيْضًا حَيَاة..

(٥)

الفقد الأول.. والفقد الآخر..

أول تجربة (فقد) بنت تعرض لها في حياتنا هي تجربة فقد (الألم).. أو بالفاظ أدق: تجربة فقد المحتمل للألم..

الطفل يعيش فترة من حياته (غالباً أول ست شهور من عمره) في حالة رعب فظيع إنه يفقد أمه.. اللي هي بالنسبة له كل العالم وكل الناس.. ويكون جواه سيناريوهات وتخيلات كثيرة جداً عن فقدها أو اختفاءها أو موتها.. الفترة دي بالنسبة له فترة خوف وشك وارتياش من أي علاقة، وأي آخر.. يخاف يقرب من أي حد - حتى منها هي شخصياً- أحسن يفقده.. ولو قرب، يخاف يبعد، أحسن يفقد نفسه ويدوب في الألم.. دوامة رايحة جاية من القرب والبعد، والكر والفر.. والراحة والوجع.. فترة صعبة ومعقدة ومليانة مخاوف وشكوك .. لدرجة إنهم بيسموها (الموقف الارتيابي)..

بس بعد شوية.. وعي الطفل بيوسع، وعقله بيكبر، ومداركه بتزيد.. ويبدأ يكتشف إنه علشان يعيش في الدنيا دي، مهم إنه يقبل (الفقد).. فقد أمه.. فقد الآخر.. أي آخر يقربله ويحبه ويطمئن له..

يكتشف إن لعبة الحياة لعبة مؤلمة.. وإن لو ليها قوانين.. فأول قوانينها، هو قانون (الفقد).. فقد أي حد.. وأي حاجة..
وبنكون وقتها في اختيار صعب جدًا.. يمكن أصعب اختيار في حياتنا..

إما أننا نرجع لورا.. لنمط علاقاتنا القدية.. اللي فيها يا إما نقرب قوي لغاية ما ندوب في اللي بنقربله، يا إما نبعد قوي، وما نعملش علاقة حقيقة أصلًا..

أو إننا نقبل احتمالات (الفقد).. ونستحمل (أمه).. ونكمel.. حتى لو موجعين..

أو نفضل متدددين بين الاختيارين.. طول عمرنا..

اللي بيختار الاختيار الأول بيكون مشروع مريض نفسي جاهز للتنفيذ في أي لحظة.. اللي بيفضل متعدد برضه بيكون مشروع مريض نفسي من نوع آخر..

أما اللي بيقرر إنه يقبل.. ويستحمل.. ويكمel..
فده هو اللي قرر (يعيش).. مش بس (يعيش)..
ودي أعلى درجة من درجات النمو النفسي.. واسمها - للمفاجأة-
(الموقف الاكتئابي)..

اسم غريب.. مش كده ؟

لا هو مش غريب ولا حاجة..

هو اسمه (اكتئابي) علشان بيكون فيه ألم..

ألم رؤية الحياة بجوانبها الكثير.. الخير والشر.. الأبيض والأسود..
الصح والغلط..

ألم قبول (الفقد).. وقبول (التغيير).. وقبول (الموت)..

ألم قبول النفس بكل ما فيها.. وقبول الآخر بكل ما فيه..

ألم البصيرة.. ألم التأمل.. ألم الحكمة..

ومن وقتها.. نتعلم إن كل خطوة في حياتنا بيكون فيها (فقد)..
وعلينا إننا نقبله..

نكر ونشتغل ونتجوز ونختلف..

لكن تفضل احتمالات فقد قائمة كل يوم.. وكل ساعة.. وكل
لحظة..

نفقد طفولتنا وذكرياتها..

نفقد لعبنا، وأوضتنا، وسريرنا الصغير..

نفقد حبابينا وقرايبينا وأهلنا..

نفقد بيتنا وشارعنا.. وساعات بنهاجر.. ونفتقد بلادنا..

ومهما حاولنا نهرب من ده، أو ننكره، أو نستخدم شوية دفاعات
نفسية علشان ما نحسش بييه.. هاتفضل الحقيقة اللي ما فيش
منها أي مهرب.. أي مهرب..

وتتحول الحياة إلى حالة من التأمل الداخلي.. المصبوع بألم الرؤية.. ودرجة عالية من السكينة والهدوء.. اللي فيهم شجاعة الحزن وبسالته.. وقدر هائل من القبول .. لكل شيء.. وأي شيء..

ارجع كده بقى للفيلم.. واكتشف معايا إن العمق الحقيقي ليه مش هو أبداً العبرية في ترجمة المعلومات العلمية إلى أحداث وشخصيات ومشاهد، من أول المشاعر الخمسة، والذكريات الأساسية، وجذر الشخصية، وقطار الأفكار، وتكوين ووظيفة الأحلام..

كل ده ممكن تقرأ في أي كتاب علمي مبسط وملون للأطفال في أي مكتبة عامة في شوارع أي دولة غريبة..

العمق الحقيقي للفيلم هو: (قبول فقد) .. هو لحظات الـ .. Letting go

وراجع معايا كل المشاهد الفارقة في الفيلم..

(رأيلي) تعبت علشان ما قبلتش (فقد) بيتها..

(رأيلي) قررت ترجع وتنكص وتتفكر علشان ما قبلتش فقد طفولتها وذكرياتها مع أهلها وأصحابها..

أهلها ظلموها لما كانوا مش بيسمحوا ليها تعبّر عن حزنها وألمها لفقد أي حاجة.. وكانوا بيعلموها وبيطلبوا منها طول الوقت إنها تفضل سعيدة ومبسوطة وبنضحك..

لكن..

(رأيي) اتغيرت لما قبلت فقد البيت والطفولة والأصحاب..

وصاحبها الخيالي (الفيل) ساعدها لما هو كمان قبل يفقدتها
وي فقد عربته الجميلة الطائرة..

وأهلها قدمو لها أحلى هدية لما سمحوا لها تكون نفسها
وتحس بألم وحزن (الفقد).. وحسوا بي معاهـا..

ده الفيلم.. ودي رسالته..

ودي برضه رسالة الفصل ده..

الفقد حق..

الحزن حق..

قبول فقد.. نجاة..

قبول الحزن.. حكمة..

(١٢)

قبول الموت .. حياة ..

(١)

طبيعي جداً يكون جواناً غريزة للحياة.. دافع للبقاء.. حاجة
بتحرك كل واحد فينا للاستمرار في الدنيا..

غريزة الحياة دي بتعبر عن نفسها بطرق كتير جداً.. منها الجوع..
اللي بيدفعك إنك تأكل علشان تمد جسمك بشوية طاقة كل كام
ساعة، والعطش.. اللي بيخليلك تروي خلاياك بوقود الحياة طول
الوقت، والجنس.. اللي بيمنحك متعة جسدية ونفسية هائلة
تساعدك على تحمل بعض مشاق المعيشة، وفي نفس الوقت
بيحافظ على استمرار النوع البشري على الأرض إلى ما شاء الله..

مش بس كده..

الحب.. هو وجه من وجوه غريزة الحياة.. لأنه بيقربك من
الناس.. وده في صالح الحياة واستمرارها وجودتها..

الصدقية.. وجه ثاني من وجوه غريزة الحياة.. علشان بتخللي
حواليك صمام أمان من العلاقات الصحية اللي ممكن تحميك
(نفسياً) وقت اللزوم..

الشغل.. السفر.. الاكتشاف.. الإبداع.. النجاح.. الفرحة..

وغيرهم.. وغيرهم..

وجوه الحياة وغرائزها كتير جداً.. وكل ده طبيعي ومفهوم..

الغريب بقى.. هو إنه زي ما فيه جوانا غريزة للحياة.. فيه
برضه جوانا غريزة للموت!!

يعني الناس اللي بتتحرر مثلاً، دول ناس انتصرت فيهم غريزة
الموت على غريزة الحياة.. والناس اللي بتقتل، دول قاموا بتوجيهه
غريزة الموت اللي جواهم لخارجهم.. والناس اللي بترهب غيرهم
أو ترعبهم، دول برضه ناس بيعبروا عن غريزة الموت اللي جواهم
بهذا الشكل الفج..

مش بس كده برضه..

أحد وجوه غريزة الموت، إن حد يستعذب الألم..

كلمة صعبة؟!

يستعذب الألم يعني يستمتع بالألم.. وساعات يسعى إليه.. وزي
ما يكون بيعمل دماغ لما يتأنم..

هو فيه كده؟

آه فيه كده!

لما حد يتعرض لتجربة مؤلمة أو لخبرة مخيفة، وبعد ما يطلع
منها، يدخل في تجربة زيها بالظبط، وتكون نهايتها برضه مؤلمة
أو مخيفة- على الأقل بنفس الدرجة.. ده وجه من وجوه غريزة
الموت اللي جواه..

لما واحدة تكون دخلت في علاقة حب / صداقة / زواج، طرفاها الثاني كان قاسي، ومهمل لمشاعرها، وغير محترم لإنسانيتها، وعاوز يفصلها على مقاسه.. وبعد ما تنتهي العلاقة.. تيجي بكل بساطة تدخل في علاقة جديدة، تختار فيها حد له مواصفات شبه الشخص اللي فات بالظبط.. وقشى معاه نفس طريق القسوة والألم تاني.. وتكرر ده مراراً وتكراراً.. ده أحد وجوه غريزة الموت اللي جواها..

لما واحد يقعد يلوم نفسه (بشكل مرضي مبالغ فيه) عمال على بطال، مع كل خطوة، وكل فعل، وكل حركة.. يعلق لنفسه كل يوم مشنة، ويجلد نفسه كل ليلة كام جلدة.. أهو ده بيمارس غريزة الموت كل يوم وكل ليلة..

لما حد يتفنن في إيلام نفسه وإيذائها (سواء نفسياً أو جسمانياً).. مرة بالشعور الزائد والمرضى بالذنب، ومرة بإنه يظلم نفسه بأي شكل وبأي طريقة، ومرة بإنه يتعب نفسه ويهلك أعصابه ويستنزف كل وجوده وحياته، في شغله أو علاقاته، على حساب نفسه وحقوقها.. كل دي صور ووجوه كتير جداً لغريزة الموت..

طبعاً فيه وجوه أقرب وأوضح وأشهر من كده بكثير..
اليأس وجه من وجوه الموت..
الكُره.. الغضب.. الحزن.. الاستسلام..
وطبعاً.. النوم.. اللي بنموت فيه كل ليلة.. ونصحى تاني يوم..

(٢)

غالباً ا تكونت عندك دلوقت فكرة عن باقي الفصل.. اللي المفروض أقولك فيه: حافظ على غريرة الحياة.. وتخلاص من غريرة الموت.. أو توقع الموت في أي لحظة واستعد له.. أو الموت علينا حق..

لكن في الحقيقة.. ده مش هايحصل..

مش هايحصل علشان الموت جزء منك.. جزء حي.. عايش جواك.. وما ينفعش تخلص منه.. ولا ينفع تتجاهل غريزته الكامنة داخلك..

وعلشان في نفس اللحظة اللي بتتولد في جسمك خلايا جديدة.. بتموت قصادها خلايا تانية.. حتى وإنت بتسلم على حد بيأيدك، بيموت الآلاف من خلايا جلدك بمجرد الاحتكاك..

وعلشان إنت بتموت كل ليلة، وتصحي تاني يوم..

الموت جزء من تكوينك الإنساني..

وجزء من تركيبك النفسي..

وساكن معاك في نفس الجسد..

حد سأل نفسه مرة ليه أفلام جيمس بوند ومهمة مستحيلة واللي زيهم بيحققوا أعلى دخل ومبيعات؟ الإجابة ببساطة - كما اعتقد - هي علشان إن النوعية دي من الأفلام بتخاطب الغريزتين الأساسيةن عند كل البشر:

غريزة الحياة (البنت الحلوة اللي دايمًا تيجي مع البطل)،
وغريرة الموت (البطل اللي طول الفيلم عمال يقتل أعدائه
ويتخلص منهم)..

ولنفس السبب نلاقي أغاني الحزن والألم والعذاب رائجة ومشهورة
زيها زي أغاني الفرح والبهجة والأمل (إن ما كانش أكتر)..

وأفلام الرعب ومصاصين الدماء بتنشر وبتنزيد ويتعمل لمعظمها
جزء تاني وتالت وحتى سابع.. لأنها بتخاطب- على مستوى
عميق جدًّا- غريزة الموت اللي جوانا.. اللي جوانا كلنا..

إيه؟ ٥٥

فيه إيه؟

إهدى كده.. وكمل بالراحة.. وإنانت تعرف فيه إيه!

(٣)

إحنا اتعلمنا إن الموت وحش.. رغم إنه حته مننا، وحفظنا إنه
شر.. رغم إنه بيصحى معانا وينام معانا، وصدقنا إنه بعيد..
رغم إنه عايش جوا كل حد فينا..

تفتكر ينفع إننا نتخلص منه؟

ينفع إننا نقطعه ونرميه ونعتبره مش موجود؟

ينفع إننا نفضل نتعامل مع أحد أهم حقائق الكون على إنها
وهم؟

ما أعتقدش..
أمال إيه اللي ينفع؟

اللي ينفع بجد.. هو إننا نقبله..
نقبل وجود الموت فينا.. داخلنا..
ونشوفه على إنه الوجه الآخر من وجودنا، مش نهاية وجودنا..
ونصدق إنه بيكمel الحياة.. مش بيأخذ منها..
وإنه إضافة.. مش نقصان..
يمكن ده يصالحنا شوية على الموت اللي برانا..
موت الأحبة والغالبين..
وموتنا إحنا شخصياً..

فيه فيلم رائع اسمه Meet Joe Black، في الفيلم ده بيقوم العبرري (أنتوني هوبكنز) بدور رجل أعمال كبير وشهير جداً بيفاجأ بأن ملك الموت جاي يزوره في بيته ويقضي معاه كذا يوم، وبعدها هايقبض روحه.. ومن اللحظة دي بتتقلب حياته رأساً على عقب..

(أنتوني هوبكنز) طول الفيلم كان في رحلة.. رحلة قبول موته.. وفي اللحظة اللي قبل فيها موته.. بطل يخاف منه، وبطل يتربه، وعرف يعيش / يحيا بجد..

وضرب مثل عميق جدًا (حتى ملك الموت نفسه- كما يدعى الفيلم)، في معنى الحياة، ومعنى الحب، ومعنى الوجود..

وقت ما جاءت النهاية.. هو شخصياً اللي بادر بأخذ إيد ملك الموت (المزعوم).. وسط أجواء احتفالية تليق برحلته..

زي ما قبول الضعف.. قوة..

وقبول الفشل.. نجاح..

وقبول الحزن.. حكمة..

قبول الموت.. حياة..

(٤)

إحنا محتاجين..

لا..

أنا مش عاوز دلوقت أتكلم بصيغة إحنا.. ولا إنت..

ده مش وقت صيغة المخاطب.. ده وقت صيغة المتكلم..

أنا عاوز أتكلم بصيغة (أنا).. وعاوزك تقرأ الكلام اللي جاي بصوت عالي بنفس الصيغة..

صيغة (أنا)..

أنا جوايا موت، وجوايا حياة.. ما ينفعش أتخلص من واحدة منهم، أو أستغنى عنها..

أنا جوايا موت، وجوايا حياة.. زي ما جوايا ضلمة وجوايا نور..
الاتنين بيكملا بعض.. بياخدوا من بعض، ويدوا بعض..

أنا جوايا موت، وجوايا حياة.. متضفرين في بعض، ماشين مع بعض، وساعات في نفس الاتجاه..

اللحظة اللي هاقبل فيها الموت اللي جوايا، هي نفس اللحظة
لي هاقبل فيها غضبي وما أسمح له إنه يتمنكي ويسطر
عليا..

اللحظة اللي هاقبل فيها الموت اللي جوايا، هي نفس اللحظة
لي هاقبل فيها خطأي وفشلني وضعفي وتقصيري وما قفش
عندhem ولا أخليهم يعطلوني..

اللحظة اللي هاقبل فيها الموت اللي جوايا، هي نفس اللحظة
لي هايلتحم فيها فجوري بتقواي..

هي اللحظة اللي هاسمح لنفسي فيها إني أحزن في هدوء.. وأتألم
في حكمة.. وأصبر في ثبات..

هي اللحظة اللي هاقبل فيها الخوف والانكسار وساعات خيبة
الأمل..

هي اللحظة اللي هاسمح فيها نفسي.. وأسامح غيري..

هي لحظة ما يجتمع جوايا كل أبيض وأسود.. ويتألف كل يين
وسمال.. ويتصالح كل نقىض مع نقىضه..

هي لحظة إن نفسي تبقى نفسي.. كل كامل متكمال.. ملائم
ملتحم.. رائع بنقصانه.. وجميل بفنائه..

هي لحظة إني أكونبني آدم.. أخيراً..

على فكرة أنا شخصياً ما وصلتش لسه للحظة دي.. لأنها مش
لحظة.. هي رحلة.. بس أعتقد إني حالياً على نقطة ما في الرحلة
دي.. والله امستعan..

إوعى تكون بطلت تقرأ بصوت عالي وبصيغة (أنا)..

طيب..
اقراها تاني من الأول بصوتك..
وعن نفسك..

(١٣)

ثقوب نفسية

فيه جوه كتير مننا حته فاضية.. حلقة داخلية مفرغة.. بنحاول
يملاها بحاجات كتير وبطرق مختلفة.. بس بدون فايدة..

حد بيحاول يملاها بنجاحات مدوية وخارقة ومبهرة.. حد بيحاول
يملاها بشهرة ونظرات إعجاب في عيون الناس.. حد يحاول يملاها
بنهم وشره غير مبر للفلوس أو للنفوذ أو للأضواء أو للبس أو
حتى للأكل.. حد يحاول بالدخول في قصص حب متكررة سطحية
زائفة.. حد تاني بلبس رداء علم أو حكمة أو دين من غير عمق
أو أصالة أو حقيقة.. وكل ده مش بيملا ولا يشبع ولا يسد هذا
الفراغ النفسي الداخلي اللي بيكون عامل زي الثقب الأسود اللي
بيبلع أي حاجة وأي حد بلا نهاية..

من الآخر.. وبكل صراحة ووضوح.. الفراغ ده مش بيتملي غير
بحاجة واحدة بس.. هي إنك: "تصدق إنك تستاهل" ..

احتمال الجملة دي تكون مكررة في كتاباتي ومحاضراتي (ومش
هازهق ولا هابطل تكرارها وتريديدها لأهميتها الشديدة)..
أو تكون غريبة عليك أو مش متعود تسمعها أو تقرارها.. بس
هي بسيطة وبديهية جدًا.. موجودة في تكوينك النفسي من
يوم ما اتولدت..

ساعات التربية أو المجتمع بيؤكد عندك الرسالة دي: "إنت
تستاهل تتحب" .. وساعات بيشكك فيها.. وساعات بيوصلك
عكـسها..

يعني ممكن يوصلك من الأب والأم في بعض الأوقات إنك ما تستاهلش حبهم أو اهتمامهم أو رعايتهم أو قبولهم.. وإنك تستاهل بس بقدر سمعانك للكلام وتنفيذك للأوامر..

وممكن يوصلك برضه منهم ومن المدرسة والمحصص والمدرسين إن قيمتك في الحياة تساوي فقط مجموعك في الثانوية العامة..

وطبعاً ممكن يوصلك من الشارع والشغل والمجتمع والناس إنك ما تستاهلش تتحب ولا تفرح ولا تستاهل تطمئن ولا تستاهل تعيش من أصله..

في المواقف الصعبة واللحظات الحاسمة دي.. لو إنت ما قاومتش وما سمعتش صوت فطرتك وطبيعتك كوييس.. هاينخر الثقب الأسود نفسك.. وهايكبر ويكيبر.. وتعيش عمرك كله تحاول تملأه بسراب ورا سراب ورا سراب..

إنجح وهات ألف في الماية في الثانوية العامة.. مش هاترضي ولا تفرح من قلبك ولا تحس بنجاحك لو إنت مش مصدق إنك تستاهل تنجح وتفرح..

عيش دونجوان عصرك وأوانك.. وادخل كل يوم في قصة حب.. ودوب كل بنات العالم.. مش هاتشبع ولا تقنع ولا هايستقر قلبك طول ما إنت مش مصدق إنك تستاهل تتحب وتحس ويهتم بيك.

اجذب كل الأضواء.. وشد كل الانتباه.. ومُ كل البشر حواليك..
إن شالله تطلع لنفسك جناحات وتطير في السما.. كل ده مش
هایكون ليه أي لازمة.. ومش هاتحس ليه بأي معنى.. لو مش
مصدق إنك تستاهل تتضاف وتقدر..

ماتسائلنيش: "إيزاي أصدق إني أستاهل أتحب وأنجح وأفرح
وأتضاف واقدر...؟"

علشان الإجابة عندك وفي فطرتك وتكوينك.. مطلوب بس إنك
تسمح لنفسك تشوف ده فيها.. وتصدقه.. وتقول (لأ) لأي حد
وكل حد يحاول يصلك غيرها..

إنت تستاهل..

صدق ٥٥ ..

وكفاية بقى..

(١٤)
الصندوق



كتير جدًّا مننا عايشين حياتهم جوه صندوق.. صندوق صغير مصنوع من طريقة معينة في التفكير، طريقة معينة في الشعور، طريقة معينة في التصرف والتعامل مع الآخرين.. فرضيات معينة عن الدنيا والعالم والناس.. ردود فعل جاهزة على المواقف المختلفة.. وساعات نُطِّ ثابت من المشاعر المتكررة على مدار الوقت.

بعض الصناديق دي بتكون مَرضية.. واللي عايشه جواها مريض أو مجموعة من المرضى.. وبعضها مش بيكون مَرضي.. لكنه في نفس الوقت مش طبيعي وممش صحبي، حتى لو بدا كذلك.. لأنه مش الطبيعي إننا نعيش حياتنا جوه صناديق مغلقة علينا وبس..

اللي عنده شوية أفكار أو معتقدات أو مخاوف وشايف ومتصور ومصدق إنه هو الوحيد اللي صح وكل الناس غلط..

اللي حابس نفسه في كام فكرة، ومش راضي يشوف غيرها..
واللي محبوس جوه مخاوفه ومش بيحرر نفسه منها..

واللي ساجن عقله في شوية تصورات ومعندهوش أي استعداد يسمع أي صوت غير صوته، ولا يشوف غير اللي في دماغه، ولا يحط أي احتمال غير اللي هو متأكد إنه حقيقة لا تقبل التشكيك..

كل دي صناديق..

اللي عايشة مع أولادها في دابرة مغلقة وموصلة ليهم إنها مصدر كل حاجة في الدنيا من حب وحنان واهتمام وعطاء (في غياب أو حتى في وجود أبوهم) ..

اللي بيحبو بعض ومستغنين ببعض عن الدنيا كلها، وكل واحد فيه شايف إن الثاني هو الماضي والحاضر والمستقبل..

اللي معيشة جوزها في اختبارات نفسية طول الوقت علشان تشفو قد إيه هو بيحبها أو قد إيه هو مستحمل، أو قد إيه نفسه طويل..

اللي بيتعامل مع ابنه أو بنته أو مراته على إنهم ملكية خاصة ليه.. كل دي برضه صناديق..

صندوق الناس والمجتمع.. صندوق العادات والتقاليد.. صندوق إني لازم أكون الأحسن في كل حاجة وإنني ما ينفعش أغلط أو أضعف أو أفشل.. صندوق التمسك والتعلق بحد على حساب نفسي.. صندوق دور الضحية أو الجاني أو المنقذ.. صندوق المغالاة والتطرف في فهم الدين السمح الرفيق.. صندوق الرفض والشك والخوف من الآخر طول الوقت.. صندوق الطلق اللي حاطط يافطة جواز.. صندوق العيال اللي هاضحي بنفسي وبحياتي علشانهم.. صندوق الشغل اللي غرقان فيه وأنا أصلاً ما اخترتھوش ومش بحبه..

صناديق مغلقة، ودواير مقوولة، بيعيش فيها أصحابها وهما مغميin عنهم وساعات عيون اللي حوالיהם كمان.. وممكن يفضلوا كده لغاية ما يموتوا.. وهما ما يعرفوش مجرد معرفة إنه فيه عالم تاني مختلف تماماً بره صناديقهم.. وإنه فيه حياة كاملة بره سجنهم..

على فكرة.. دي بس مجرد أمثلة.. لكن في الحقيقة كل حاجة ممكن تبقى صندوق.. كل حاجة.. إحنا ممكن نعمل من كل حاجة وأي حاجة صندوق ضيق نعيش فيه ونتشبث بجدرانه ونرفض نتخلى عنها مهما كانت هشة..

اللي ربنا بقى يكرمه ويخرج بره صندوقه، ويتحرر من سجنـه..
هـايحس بالظـبـطـ زي طفل صـغـيرـ بيـشـوفـ العـاـمـ منـ أـوـلـ وجـدـيدـ،ـ
ـوـبـيـكـتـشـفـ نـفـسـهـ،ـ والـدـنـيـاـ،ـ والـنـاسـ..ـ

طيب إزاـيـ نـخـرـجـ بـرـهـ صـنـادـيقـناـ..ـ

الـليـ يـخـرـجـناـ بـرـهـ صـنـادـيقـناـ هوـ أـوـلـاـ إـنـاـ نـصـدـقـ إـنـهـ فـيـهـ عـاـمـ
ـكـامـلـ وجـدـيدـ وـمـخـتـلـفـ عنـ كـلـ الـلـيـ نـعـرـفـهـ وـكـلـ الـلـيـ عـشـنـاهـ مـهـمـاـ
ـكـنـاـ مـصـدـقـيـنـهـ..ـ

وثـانـيـاـ إـنـاـ نـنـوـيـ وـنـقـرـرـ نـخـرـجـ بـكـلـ شـجـاعـةـ حـتـىـ لوـ كـانـ الخـرـوجـ
ـمـخـاطـرـةـ..ـ هـوـ فـيـهـ أـيـ حاجـةـ مـفـيـدـةـ ماـ فـيـشـ وـرـاـهـاـ مـخـاطـرـةـ؟ـ

وـثـالـثـاـ يـاـ رـيـتـ ماـ تـكـوـنـشـ لـوـحـدـكـ..ـ يـكـونـ فـيـهـ حـدـ مـعـاكـ،ـ
ـيـسـاعـدـكـ وـيـاخـدـ بـيـاـيدـكـ..ـ يـوـنـسـكـ وـيـورـيـكـ الطـرـيـقـ..ـ وـيـكـونـ رـفـيقـكـ
ـفـيـ رـحـلـتـكـ..ـ الـحدـ دـهـ مـمـكـنـ يـكـونـ صـدـيقـ،ـ زـوـجـ..ـ زـوـجـةـ،ـ مـعـالـجـ،ـ أوـ
ـحـدـ قـابـلـتـهـ صـدـفـةـ..ـ وـطـبـعـاـ لـوـ مـاـ فـيـشـ حـدـ مـعـاكـ..ـ ربـناـ مـوـجـودـ..ـ

ولـوـ مـشـ عـارـفـ تـبـدـأـ منـينـ وـإـزاـيـ وـفـينـ..ـ هـأـقـولـكـ مـاـ تـسـتـعـجـلـشـ.
ـهـوـنـ عـلـىـ نـفـسـكـ..ـ مـجـرـدـ إـنـكـ تـشـوـفـ إـنـكـ كـنـتـ عـاـيـشـ جـوـهـ
ـصـنـدـوقـ دـيـ بـدـاـيـةـ كـوـيـسـةـ جـدـاـ..ـ اـصـبـرـ..ـ وـالـبـاقـيـ هـاـيـجـيـ لـوـحـدـهـ
ـوـفـيـ مـيـعـادـهـ..ـ صـدقـتـيـ..ـ

أول بقى ما تخرج بره الصندوق.. وتقرر تفتح عينيك وودانك
وقلبك.. هاتكتشف الخدعة اللي كنت فيها.. وهاتشوف العالم
اللي ما كنتش سامح لنفسك تعرف عنده حاجة.. وهاتعمل
علاقة جديدة بأفكار ومشاعر مختلفة جدًا.. هاتشوف وتسمع
وتحس كل حاجة وكل حد كأنك أول مرة تعيش، وأول مرة
تنفس، وأول مرة تتولد.. ما تستغربش من التعبير دا.. إحنا
ممكن نتولد من جديد كل يوم..

كفاية بقى صناديق..
وياللا نشوف النور..
ياللا..
مستني إيه..

(١٥)

ما تصدقش كل حاجة إنت مصدقها

فيه واحد اسمه (سولومون آش) عمل تجربة مهمة جدًا في تاريخ العلم سنة ١٩٥١ ..

(آش) جاب عدد من الناس وحطهم كلهم في اختبار معين وكان متفق معاهم كلهم ما عدا واحد على الإجابة اللي هايقولوها.

كرر (آش) التجربة دي ١٨ مرة، وكان اتفاقه مع الممثلين إنهم يقولوا الإجابة الصحيحة في أول مرتين فقط، وبعد كده كلهم هايقولوا إجابة خطأ متفق عليها ويشفوف الواحد الباقي هايقول إيه.. بعدها آش عمل التجربة دي مع عدد أكبر من الناس وبطرق مختلفة وطبعًا كانت النتائج مذهلة..

ثلث الناس اللي ا تعرضوا للتجربة قالوا نفس الرأي الخطأ اللي سمعوه من باقي زمايلهم في كل التجارب (كان دائمًا يكون دورهم في الرد هو الأخير بعد كل الناس).. وثلاث أربع (يعني ٧٥٪) من الناس قالوا نفس الرأي الخطأ في تجربة واحدة على الأقل..

الناس دي ما قالتش الرأي الخطأ بسبب خوف أو تهديد أو رغبة في الموافقة وخلاص.. لا.. الناس دي استقبالهم للحقيقة اتغير.. يعني هما كانوا شاييفين ومصدقين اللي قالوه (اتعمل معاهم كلهم مقابلات فردية بعد كده).. هما اتأثروا فعلاً برأي الممثلين المتفقين مع الباحث لدرجة إن روّي لهم وقراءتهم وتفسيرهم للي هما شاييفينه يعنيهم اتغيرت واختلفت..

الكلام ده معناه إيه؟

معناه إن حضرتك لما بتكون في وسط مجموعة من البشر..
ممكّن بكل بساطة اللي إنت شايفه ومقتنع بيها ومصدقها ما
يكونش إلا تأثير المجموعة عليك (ده بيسموه تأثير المجموعة
(Group Influence).. ممكّن تكون شايف الشمال يين لأن كل
الناس شايفينه كده.. وتكون شايف اليمين شمال علشان إنت
فعلاً عينيك ومداركك وحواس استقبالك اتأثرت برؤية المجموعة
أكتر من رؤيتك إنت الشخصية..

المجموعة دي ممكّن تكون شلة أصحاب.. زملاء عمل.. عيلة..
فريق رياضي.. وساعات مجتمع بحاله..

أي مجموعة ممكّن تقنع أي حد بأي حاجة..
ما تصدقش كل حاجة إنت مصدقها..

اقرأ بقى الفصل السابق (الصندوق) من الأول..
وبعده..
نتقابل تاني..
في الفصل الجاي..

(١٦)

الكارير شيفت

عشت في إنجلترا سنتين لما كنت بحضور الدكتوراه في الطب النفسي.. فوجئت بعد شوية إن أحد المشرفين علينا كان بيشتغل عازف جيتار بعد الضهر.. طبعاً وقتها كنت- ما شاء الله- متحلي بالعقلية المجتمعية الشرقية العظيمة.. والراجل نزل من نظري، واكتأبت، وبقيت بيصله من فوق تحت، وكانت حالي حالة..

فكرة إن حد يشوف إنه مش بيحب شغله وإنه افترض عليه دي أصلاً فكرة محتاجة قدر كبير جداً من الشجاعة والتحمل والإقدام وساعات التهور.. خاصة في مجتمع زي مجتمعنا.. لكنها تكاد تكون حاجة عادية جداً في المجتمعات تانية زي أوروبا وأمريكا والدول المتقدمة..

المهم.. نجيب الموضوع من الأول.. هو إحنا بنشتغل ليه؟

وده مش سؤال عام.. المقصود هنا هو إحنا في مجتمعنا بنختار شغلنا على أي أساس؟

خد عندك يا سيدى..

جزء لا بأس بييه مننا بيختار شغله بناء على الواجهة الاجتماعية.. اللي كانت لفترة كبيرة من الزمن، ولا زالت في بعض الشرائح تتوجه ناحية الطب والهندسة والصيدلة وما يشبههم..

جزء تاني بيختار بناء على مدى القوة والتأثير الاجتماعي للوظيفة أو المنصب، إلى جانب الواجهة برضه، وهنا نلقي وظائف القضاء والشرطة والجيش وغيرهم..

وجزء ثالث يختار بناء على مدى مناسبة الشغل لبعض الظروف المكانية (قربه من البيت أو الأسرة) أو النوعية (وظائف مناسبة أكثر للبنات مثلاً) أو العائلية (الإكمال في نفس مهنة الأب أو الأم)، وهكذا..

ووجهه رابع وخامس وسادس وعاشر بيختار الشغل اللي ما لقاش غيره..

وهنا ييجي السؤال الأصعب..

هو إحنا أصلاً بنختار شغلنا؟

والإجابة للأسف وبالغم المليان: لا

إحنا اللي بيختار شغلنا هو مكتب التنسيق، اللي بيحدد مستقبلنا هو درجاتنا في الثانوية العامة، اللي بيخطط حياتنا هو مدى قدرتنا على حفظ بعض المعلومات واسترجاعها لمدة ثلاثة ساعات في لجنة الامتحان..

ولو مكتب التنسيق إدانا بعض الاختيارات، يبقى ساعتها اللي هايختار برضه مش إحنا، اللي هايختار غالباً هايكون أهلنا.. الأب اللي عاوزك دكتور قد الدنيا، أو وكيل نيابة مالي مرتكز، أو محاسب تكمل المسيرية بتاعتة.. والأم اللي عاوزاك صيدلانية علشان الصيدلية بتاعتتها، أو مدرسة علشان تقعددي وتنستتي في البيت، أو موظفة في الحكومة علشان غدر الزمن وحوجة الأيام..

واللي مش بيدخل في دوامة مكتب التنسيق، بيشتغل اللي ربنا
بسهل بيده.

يبقى غالباً آخر واحد ليه (فعل) الاختيار في حكاية الشغل دي هو إنت.. مع إنك أول واحد ليه (حق) الاختيار فيها.

طبعاً المنظومة دي فاشلة من أولها لآخرها، وبتؤدي لبلاوي كتير جدًا.. أولها حالة السعار الرهيب للوصول إلى أعلى نقطة في جبل التنسيق علشان يبقى قدامك كل الأبواب مفتوحة.. السعار ده بيصيّب الأهالي بالعته والجنون والدخول في سباق محموم نحو اللاشيء، ويصيّب أبناءهم بالاكتئاب والتوتر والفصام وكل الأمراض النفسية المكتوبة في الكتب.

ملامح هذا السعار أولها حمى الدروس الخصوصية، وآخرها فوضى الغش والتزوير والوسايط والرشاوي، وبينهم مدارس خاوية على عروشها..

ثانيها.. اتفضل يا سيدتي.. نجحت؟ جبيت مجموع؟ دخلت الكلية؟ اتخرجت؟ اشتغلت؟ حب بقى شغلك وانجح وأبدع فيه.. هههههههههههههه.. إزاي بقى والنبي؟

عندك واحد اشتغل مدرس، وكان نفسه يشتغل دكتور.. بس قدراته على الحفظ ما ساعدتهوش يبخ الكلام اللي حفظه كله في ورقة الإجابة..

وعندك واحد اشتغل دكتور، بس كان حلم حياته يطلع رسام، لأنّه بيحب الرسم، بس جاب مجموع عالي وأهله استخسروه وأقنعواه يدخل طب..

عندك واحدة اشتغلت صيدلانية علشان تكمّل في صيدلية أبوها، رغم إنها كانت حابة تشتغل في مجال السياحة..

وعندك مهندس كان عاوز يبقى ظابط.. ومحاسب كان حابب يكون محامي.. ومحامي كان بيحلم يبقى وكيل نيابة.. وصحفي كان نفسه يبقى مذيع.. وغيرهم وغيرهم..

كلمني بقى عن التقدم العلمي والانفتاح البحثي واختراق القرن الواحد وعشرين..

بالنسبة لي بقى كل ده مش مشكلة.. أو بكلمات أدق.. مش مشكلة كبيرة.. المضيبيبة الكبيرة بالنسبة لي هي إنك - غالباً - هاتلبس في الشغلانة دي طول عمرك.. واحتمال تصدق إنك بتتحبها، رغم إنها مش بتعبر عنك.. والصعوبة الأكبر في الحكاية دي كلها هي صعوبة إنك تسيبها وتشتغل غيرها.. علشان ده بيمثل مخاطرة مادية ممكن تهددك وتهدد بيتك وأسرتك لو إنت متجوز، وإننا لسه ما فيش عندنا المسارات التعليمية البديلة اللي تدي الفرصة لأي حد يتعلم الحاجة اللي هو بيحبها ويأخذ فيها شهادة تخليه يشتغل فيها من غير ما يعدي على معبد الثانوية العامة ويدين بدين مكتب التنسيق.

طيب حد جه واكتشف بعد شوية من شغله إنه مش بيحبه، حتى لو كان بيحبه فعلًا قبل كده، أو إنه اختاره في ظروف نفسية أو عائلية معينة اتغيرت دلوقت، أو إنه شاف إن الشغل ده مش مناسب لطبيعة حياته وشخصيته في الوقت الحالي.. أو لقى نفسه في شغل تاني.. أو مجرد إنه حب يغير.. يعمل إيه؟!

والله العظيم ما أعرف..

لكن..

اللي أعرفه بجد إنك لما ت Shawوف حد قرر يغير مهنته، اعرف إنك غالباً - قدّام شخص عنده قدر من الشجاعة والحكمة وتحمل الحرية وقبول الغموض ومقاومة التوهان والصبر على عدم وضوح الرؤية.. شخص قرر يكون حقيقي وسط زيف ممكّن يكون عاش فيه سنين طويلة جداً.. شخص مستعد يتحمل ألم الانسلاخ من جلد القديم علشان يخرج منهبني آدم جديد تماماً..

أنا قولت غالباً علشان ممكّن حد يغير مهنته لأسباب تانية زي اللي قولتها في الأول بالظبط (وجاهة اجتماعية أو قوة تأثير اجتماعي أو ظروف مكانية أو غيرها) وتكون ساعاتها الحسابات مختلفة شوية..

في بعض أنواع العلاج النفسي العميق بنتتفق مع المريض شوية اتفاقات.. منها إنه فيه احتمال أثناء أو بعد العلاج إنه يكتشف إن كل الاختيارات اللي اختارها في حياته (شغله، زواجه، مكان معيشته، طبيعة علاقاته....) كانت اختيارات مبنية على أساسات هشة غير صحيحة نفسياً.. وإنه وارد جداً إنه بعد ما يكتشف ده يقرر يعمل تغييرات جذرية في حياته في كل النواحي دي.. لأنه ساعتها هايكون إنسان جديد، ليه رؤية مختلفة، ومن حقه اختيارات جديدة.. وده أحياناً بيحصل فعلاً..

تغير المهمة (الكارير شيفت) مش دايًّا دلع وفراغ وضياع..
مش دايًّا فشل ولا تعويض فشل ولا نهايته فشل..
مش بالضرورة عدم فهم أو سوء تقدير..

ممكِن يكون وراه حد بيحاول يكتشف نفسه من أول وجديد..
حد بيحاول يخرج بره الصندوق..
حد بيحاول يخرج عن النص..

حد قرر يعمل اللي بيحبه..
مهما كان التمن..

(١٧)

إنت مين؟

- حضرتك بتشتغل إيه؟ -
 دكتور -
 طيب اقلع..! -
 أقلع إيه بالظبط؟ -
 أقلع وظيفتك!
 إزاي يعني؟ -
 يعني تخيل إنك نمت وصحيت لقيت نفسك في إجازة
 قسرية من مهنة الطب.. أو إنك استقلت منها.. أو
 حصل مشكلة في مكان شغلك واترفدت.. إيه اللي
 هايفضل منك؟ -
- وحضرتك؟ -
 طالب في كلية آداب -
 طيب اقلع..!
 أقلع إيه أنا كمان؟ -
 تصور إنك فجأة لقيت الكلية قفلت أو لغوا الدراسة في
 كليات الآداب أو.. أو..
- تيجي تجرّب الحكاية دي.. تيجي تخيل معايا إن وظيفتك
 اختفت أو إنك تخليت عنها؟
 تفتكر إيه اللي هايتبقى؟
 إيه الطبقة اللي تحتها؟

عيلتك؟

آه.. هي عيلتك..

مراتك وأولادك..

أو أبوك وأمك وإخواتك..

طيب تصور بقى إنهم فجأة اختفوا هما كمان.. صحيت من النوم ما لقيتهومش.. سافروا.. هاجروا.. ما بقوش موجودين معاك ولا حواليك! إيه اللي هايتبقى؟ إيه الطبقة اللي تحتهم؟

أصحابك.. جيرانك.. زملاء الشغل..

طيب دول كمان اختفوا وما بقوش موجودين.. فاضل إيه تاني؟
فاضل إنت..

أيون..

إنت.. زي ما إنت..

إنت لوحدك.. وبس..

طيب إنت مين بقى؟ تيجي تعرف نفسك.. -

أحمد.. حسن.. نادين.. مها.. أبي اسم؟ -

بس ده مش إنت.. ده اسمك.. مش بيعبّر عن أي حاجة يعني.. -

أنا دكتور.. مهندس.. مدرس.. طالب.. -

- ما إحنا اتفقنا إن دول مش موجودين خلاص.. وبعدين -
 دي مجرد وظيفة.. دي مش إنت.. دي وظيفتك..
- أنا طويل وعربيض وأبيضاني شوية.. -
 يا باشا ده شكلك.. ده مش إنت خالص.. -
 أنا ابن فلان وعلان وترتان.. -
- ما هو برضه دول خلاص.. بح.. حتى لو لسه -
 موجودين.. دول مش إنت برضه.. -
 أنا.. أنا.. مش عارف.. -
- طيب خد نفسك بالراحة كده.. واقرا اللي جاي بهدوء..

هو إيه اللي بيعرفنا؟ إيه اللي بيحدد وجودنا ويوصفه ويديله معنى؟ إيه اللي بيقول أنا مين وإنت مين؟

ما أعتقدش إن فيه إجابة واحدة واضحة وقاطعة للسؤال ده..

بس من وجهة نظري (الشخصية البحتة) إحنا موجودين في الأثر اللي بنؤثره في غيرنا.. في البصمة اللي بنتركها ورانا في الأماكن والأزمنة..

أنا ممكن أحس نفسي في كلماتي اللي بتوصلك دلوقت.. الكلمات اللي بتحررك وتحررك وتخليك تشواف حاجات جديدة ما كنتش شايفها قبل كده..

إنت ممكن تحس بوجودك في عيون صاحبك اللي بيفرح أول ما بيشوفك.. لأنك بالنسبة له مصدر بهجة وسعادة..

ممکن تلاقي نفسك في نظرة الرضا اللي بينظرها لك تلميذك أو ابنك لما تعلمه حاجة جديدة ويبدأ يمارسها ويعرف قيمتها..

ممکن تكتشف معنى حياتك في بسمة بسيطة على شفافيف مراتك لما تقد إيدك وتساعدها في البيت..

كل ده أعمق بكثير من مجرد الوظيفة والدراسة والأهل والأصحاب.. ده أثرك عليهم وفيهم كلهم.. وهو ده - في رأيي الحالي- اللي بيعرفك ويوصفك ويرسم أهم ملامح وجودك.. ويخلي ليه معنى واتجاه وهدف..

فيه حد أثره بيكون كتاب..

فيه حد أثره بيكون مقطوعة موسيقية أو عمل فني..

وفيه حد بيكون أثره ناس اتعلمت واتغيرت على إيده..

إحنا مش بس اسمتنا ولا شكلنا ولا شغلنا ولا أهلنا..

إحنا كمان الأثر اللي بنسييه في الناس والأشياء والأماكن.. بعد ما نتجرد من كل طبقات وجودنا المؤقتة..

إنت بقى..

مين؟

(١٨)

الصورة الكاملة

(١)

من أحد مشاهد مسلسل (سقوط حر- رمضان ٢٠١٦):

- الطبيب النفسي: إيه اللي كان ممكن يسعدك؟
- والدة المريضة: حاجات عادية.. بيت.. عيال.. زوج..
- - الطبيب النفسي: طيب مانتي كان عندك بيت وعيال وزوج!
- والدة المريضة: بس كان عندي حاجة تخليك ما تشوفش معها أي حاجة تانية..
- - اللي هيء إيه؟
- - الخوف..

بعض كتاباتي السابقة كانت بتركز على دور الرسائل التي تتوصل من الآباء والأمهات في تكوين صعوبات وأعراض وأمراض نفسية عند أبناءهم. وبالرغم من إن ده مش العامل الوحيد في الإصابة بالمرض النفسي (فيه عوامل جينية وبيئية وغيرها كتير)، لكنه- في رأيي- عامل مهم جدًّا. علشان الرسائل دي بتتحول بعد شوية لجزء لا يتجزأ من التكوين النفسي للأبناء.. وبتكون في قوتها وتأثيرها أقوى بكثير من الجينات والبيئة والظروف..

في الحقيقة كل ده هو جزء بسيط من الصورة الكبيرة.. اللي ها حاول أوضح دلوقت جزء آخر منها..

المرة دي أنا هاتكلم عن الجانب الآخر من الحكاية.. جانب الآباء والأمهات اللي بيوصلوا لأبناءهم رسائل نفسية مؤذية ومشوهة بدرجات مختلفة..

لل وهلة الأولى بنشوفهم على إنهم ناس قساة جناة.. جنوا على أولادهم.. مقدروش يحسوا بهم ويفهموهم ويحبوهم حب حقيقي غير مشروط.. ناس تفنبوا في سوء المعاملة والإهانة والذل والبعد.. ناس ضاريين مؤذين معندهمش قلب ولا رحمة..

لكن.. الرؤية دي عاملة زي اللي شايف مشهد واحد من حكاية طويلة عريضة.. أو بيتص في صورة ثابتة ليها بعدين اتنين فقط.. رغم إن فيه تفاصيل كتير للحكاية.. وأبعاد أكثر للصورة..

باقي الحكاية موجود فيما يُسمى علمياً باسم Schizophrenogenic Mother، أو الأم المسيبة للفحصان لدى أبنائها، واللى بتتمثلها الأم اللي في المشهد السابق..

الأم دي عندها إحساس رهيب بالخوف.. رعب مالهوش حدود.. فقدان عميق لأي درجة من درجات الإحساس بالأمان.. ده ممكن يكون نتيجة ضغوط حياتية صعبة اتعرضت لهاً.. أو فقد لحد غالٍ جداً، أو تربية قاسية هي شخصياً عاشتها.. أو حاجات تاني.. أو كل دول مع بعض..

الأم دي بفضل تقاوم وتقاوم لغاية ما توصل للحظة معينة ما تقدرش تعافر فيها أكثر من كده، بتكون استنفذت كل طاقتها، واستخدمت كل أسلحتها، ونفسها فعلاً انقطع.. فتضطر إنها تأخذ قرار صعب جداً هاتعيش بيها حياتها اللي جاية كلها.. قرار هو الأصعب والأقسى على الإطلاق.. قرار إنها تدفن نفسها..

(٢)

القرار اللي بتاخده الأم هنا هو قرار معقد جدًا، تقدر تقول إنه تلات قرارات في بعض.. أو قرار ليه تلات مستويات أو وجوه:

بتقرر أولًا إنها تدفن أنوثتها الفطرية الحقيقية اللي اتولدت وعاشت فيها (شوية)، وتتحول (نفسياً) لراجل خشن صلب قوى تحاول تحمى بيها نفسها وأولادها، راجل يقدر يعمل كل حاجة، ويعرف يعمل كل حاجة، راجل راجل يعني.. وطبعًا ساعات بتقرر تطلع أنشى مزيفة مبهرجة مائعة، تنتقم منها من كل الرجال.

بتقرر كمان إنها تلعب دور المنقذ للأولاد، وده دور حيatic درامي شكله من بره لطيف جدًا، بتكون فيه الحارس الهمام، والناسن الأمين، وحامى الحمى للأولاد الضعاف من كل شيء وأى شيء.. وفي الحقيقة هي مش لازم تحرم أبناءها من الحب والحنان ولا حاجة، بالعكس، الأخطر إنها تديهم الحب والحنان بزيادة للدرجة اللي تخليهم ما يقدروش يستغنو عنها.

وتقرر بقى أخيرًا إنها تبلغ أولادها.. أيون.. تبلغهم.. ما تتخصصش من التعبير.. تبلغهم يعني إنها تحاوطنهم من كل ناحية، وقمعن عنهم الميه والهوا، تخلي نفسها هي المصدر الوحيد للحب والحنان والعطاء والأمان والفلوس وكل حاجة، تخليهم محتاجينها طول الوقت، ومعتمدين عليها في كل حاجة بدون حدود.. تبعدهم عن كل الناس (وسائل عن أبوهم نفسه).. وتعمل كده بمنتهى البراعة علشان دي الحاجة الوحيدة اللي ممكن تحس من خلالها بالأمان (الزائف طبعًا)..

الحاجة الأكتر والأخطر واللي ممكن تصيب الأولاد بالفصام في بعض الأحوال (من هنا جه الاسم العلمي للنوع ده من الأمهات)، هو إن الأم دي دايمًا بتوصل لأولادها رسالتين عكس بعض في نفس الوقت.. يعني تقول لابنها (ياللا شد حيلك علشان تنجح)، بس من جواها وبتصرفاتها بتوصله: (إوعى تنجح لحسن تخللى عنى)، وتقول لبنتها: (إنتي كبرتى واحلوتي وبقىتي على وش جواز)، بس من تحت تحت بتقولها: (إوعى تتجوزي وتسيبني).. الأم هنا مرعوبة من الوحدة، خايفه من إحساسها الرهيب بعدم الأمان، هاتتجن فعلاً لو بقت لوحدها.. الأم هنا بجد.. أغلب من الغلب..

(٣)

-
أنا ما لحقتش أعيش يا دكتور، أنا ما فرحتش بحاجة،
ما فرحتش بنفسي وأنا بنت لسه متجوزة، ولا فرحت
بنفسي وأنا أم.. أنا ما عشتش.. أنا ضيّعت عمري كله
علشان بناتي يطلعوا كويسين.. ودي آخرتها..

مشكلة القرارات المركبة اللي بتاخدها الأم دي (وساعات الأب بس بتفاصيل مختلفة)، هي إنها أولًا بتحرمها من أنوثتها الحقيقية اللي كلها طيبة وفرحة وحياة وحنان وحب ورحمة. وثانيةً.. بعد شوية هايتحول دور المنقذ اللي بدأت بيها، لدور الضحية اللي بتضحي بكل حاجة في حياتها وسنينها وعمرها علشان غيرها..

وده دور بائس ويائس وبيخلي صاحبه طول الوقت مستمتع
بتعذيب نفسه وذلها وهوانها وحرمانها من كل حقوقها الإنسانية
باسم التضحية في سبيل حد تاني (ومجتمعات زي مجتمعنا
بتشجع وتتسقّف جدًا للدور ده)..

وبعد شوية كمان هايكم السيناريو بإنها تكون هي (الجانى)
على أولادها، اللي هاتكتشف في آخر المشوار إنها حرمت نفسها
من الحياة بسببهم، وضيّعت نفسها علشانهم.. وتبدأ تخليهم
يدفعوا قن ده من وقتهم وجهدهم وتفكيرهم وأعصابهم،
ونفسيتهم، وتبدأ تحسّسهم بالذنب كل لحظة بكلمات زي
(أنا ضيّعت عمري ودفت نفسي بالحياة علشانكم) و(أنا ما
عيشتش علشان إنتوا تعيشوا) و(أنا ما خدتني حاجة
بسبيكم).. وما تستغربش لما أقولك إن جسمها ساعات بيكون
طرف في اللعبة ويجلّها ضغط وسكر وجلطات ونزيف وأورام،
وده يخلي أولادها يدفعوا التمن أضعاف أضعاف بجد..

كام واحد مننا سمع الكلام ده (بعض التنويّعات طبعاً)؟ كام
واحد شاف السيناريو ده بيتكرر قدامه؟ طيب كام واحدة أو
واحد عاشه بنفسه؟

ما فيش داعي للإجابة..

طبعاً مش النوعية دي من الأمهات هي بس اللي بتساعد في
وجود أمراض نفسية عند أولادها، فيه أنواع كتير من الأمهات
والآباء غيرها بيعملوا كده برضه.. بس دي أعقدتهم وأخطرهم..

(٤)

فيه نوع من العلاج النفسي اسمه العلاج النفسي الدينامي Dynamic Psychotherapy .. بيحاول المعالج يشوف فيه مع مريضه إيه الرسائل اللي وصلته في طفولته وإزاي أثرت فيه لغاية النهارة، وإزاي علاقته بأبوه وأمه منعكسة عليه في علاقته بنفسه وبالآخرين وساعات بربنا (في ثقافتنا طبعاً).. في المراحل الأولى من العلاج بي Shawf المريض قد إيه هو ا تعرض لتشويه وأذى وضرر وإيلاف نفسي ومعنوي من والديه، وي Shawf قد إيه أرضه كانت مستباحة علشان بس يتحب أو يتقبل أو يهتم بيها، وإنه حتى لما كان ده بيحصل، كان بيحصل بشروط وقيود وقمن غالى كان لازم يدفعه..

لما المريض بي Shawf ده، بيتفجر جواه طاقة هائلة من الغضب والعنف وساعات الانتقام، ويقوم أحياً بالتعبير عن ده بأشكال وأساليب مختلفة.. ويكون مهم جداً وقتها إننا - كأطباء وكمعالجين - نقلها ونحتويها..

لكن.. بعد شوية، بيكتشف المريض المفاجأة المذهلة.. اللي بتقلب موازينه رأساً على عقب..

بيكتشف إن أبوه وأمه في الحقيقة أغلب منه بمراحل، وإنهم هما شخصياً ا تعرضوا لتشويه وأذى وضرر نفسي بيكون ساعات أقوى وأشد من اللي ا تعرض ليه المريض نفسه منهم.. ويكتشف إنهم قبل ما يؤذوه، كانوا ضحية للأذى، قبل ما يقسوا عليه، كانوا ضحية للقسوة، قبل ما يظلموه، هما نفسهم اظلموا كتير..

يكتشف المريض شوية شوية إن اللي عمله معاه أبوه وأمه كان هو الحاجة الوحيدة اللي شافوها، وال الحاجة الوحيدة اللي عرفوها، وال الحاجة الوحيدة اللي اتربوا عليها واتعلموها..

يكتشف إنهم بؤساء، وغلبة، ومظلومين.. وإنهم كانوا لفترات طويلة جدًا خاضعين لظروف أقسى، ورسائل نفسية أعنف..

مش بس كده.. ده يكتشف كمان إنه ساعات بيكون مجرد حلقة صغيرة في سلسلة طويلة من الأجيال المتعاقبة اللي بتورث لأولادها وأحفادها العقد والصدمات النفسية والسيناريوهات البائسة (فيه نظرية كاملة في الأمراض النفسية اسمها توريث الصدمات عبر الأجيال)..

يكتشف، وبنكتشف معاه، إن فيه وجه تاني للعملة، وبعد ثالث ورابع للصورة، وحكاية طويلة ورا المشهد..

ساعتها بيكون عليه إنه يختار ما بين إنه يفضل في غضبه وعنفوانه ورغبته الطفولية في الانتقام، وما بين إنه يشوف الصورة الكاملة، ويغذر، ويسامح، ويرحم، ويكرر..

و ساعتها بيشوف بما لا يدع مجالاً للشك، إنه إذا كان أبوه وأمه وصلوله زمان رسائل نفسية مؤذية، وهو صدقها مضطراً.. فهما كمان وصلتهم رسائل مؤذية، وصدقها مضطرين..

بيشوف كمان إنه هو دلوقت الشخص الوحيد المسئول عن الاختيار ما بين الاستمرار في تصديق الرسائل دي، أو اتخاذ قرار علاجي وجودي ما لهوش بديل.. وهو إنه يتغير.. ويخف..

أيون.. المريض النفسي يقدر يقرر إنه يخف..

الرؤية دي طبعاً صادمة، ومزعجة، ومحيرة.. بس منطقية،
وحقيقية، ومفيدة جدًا، لما تيجي في وقتها.

لو كان ده وقتها بالنسبة ليك..

لو كنت شايفة إن ده وقتها بالنسبة ليكي..

تيجي نعذر نفسنا ونعذرهم؟

تيجي نسامح نفسنا ونسامحهم؟

تيجي نشوف احتياجاتنا اللي اتحرمنا منها، أو أخدناها بشروط
ونشوف احتياجاتهم اللي اتحرموا منها، أو أخدوها برضه بشروط؟

تيجي نشوف الصورة الكاملة؟

تيجي نكون آخر جيل هايسسلم الإرث النفسي التقليل ٥٥؟

تيجي منع توريثه لأولادنا وأحفادنا؟

تيجي تتغير؟

تيجي نبدأ بنفسنا.. وبدارتنا الصغيرة؟

تيجي نصدق إن العلاج هو الحب.. والترياق هو السماح..
والطريق هو الرحمة..

بالملازمة.. فيه نوع ثاني من العلاج النفسي اسمه Forgiveness أو العلاج بالتسامح، قائم على فكرة إنه إزاي لما بنسامح، ده بيخلِّي جروحنا الداخلية تندمل.. وشروحنا النفسية تلتئم.. وطاقتنا توجه من الغضب والانتقام اللي ممكن ياكلنا، للحب والحياة اللي ممكن تساعدننا..

طبعاً لو ما كانش ده الوقت المناسب بالنسبة لك، أو لو ما كنتش مستعد دلوقت.. أو لو كان اللي حصل أكبر من قدرتك على استيعابه والتعامل معاه.. ما فيش أي مشكلة.. وما فيش أي داعي للضغط أو الغصب أو الاستعجال.. لا يكلف الله نفسي إلا وسعها.. وكل شيء بأوان..

كفاية دلوقت إنك تحب نفسك وتسامحها وترحمنها..

علشان برضه مع نفسك..

العلاج هو الحب..

والتربياق هو السماح..

والطريق هو الرحمة..

(١٩)

جهاد الجينات

كتب الطب بتقول إن المرض النفسي علشان يحصل عند حد بيكون فيه ثلاث حاجات مهمة (على الأقل).. الأولى هي استعداده الوراثي والجيني، والثانية هي طريقة تربيته ومعاملة أهله ليه في طفولته، والثالثة هي تعرضه لظرف نفسي أقوى من قدرته على المقاومة والتحمل.. التلاط حاجات دول بيؤدوا لاختلال كيميائي ببعض مناطق المخ.. وظهور الأعراض النفسية..

بس بيحصل كتير إننا نلاقي حد عنده كل ما يؤهله إنه يكون مريض نفسي من الدرجة الأولى.. لكنه لم يمرض نفسياً بالرغم من كده!

إيه بقى الحكاية؟

في الحقيقة.. الحكاية دي مهمة جداً.. وأنا كاتب الكلام الجاي ده كله علشان اطمئنك.. واونسك..

أولاً.. مهم نعرف إن العوامل اللي بتؤدي لحدوث مرض نفسي هي في الحقيقة أكتر من كده بكثير.. عشرات وربما مئات العوامل.. لكن اللي نعرفه منها وعنها قليل جداً.. يا دوب هما التلاتة دول وي يكن واحد أو اتنين تانيين.. والباقي كله الله أعلم بييه.. إحنا ما نعرفش كل حاجة عن أي حاجة.. العلم لسه قدامه كتير أوي..

ثانياً.. مهم كمان نعرف إنه زي ما فيه عوامل تؤدي للمرض النفسي، فيه كمان عوامل بتحمي من المرض النفسي مهمًا كانت الظروف والضغوط والاستعداد الجيني.. زي مثلاً وجود حد في العيلة أو القرايب أو الأصحاب بيقوم بدور صمام الأمان بالنسبة للطفل أثناء تربيته.. الحال.. العمـة.. الأب في حالة قسوة الأم..

الأم في حالة إهمال الأب.. صديق قريب.. جار مخلص.. وهكذا..
الحد ده بيقدم للطفل (غالباً من غير ما يقصد ولا يعرف) معظم
اللي هو يحتاجه وما كانش لاقيه من مصادره الطبيعية..

كمان مدة وقوه وتكرار الرسائل المرضية اللي بتوصل للطفل
ممكنا تحدد هايكون مريض نفسي واللا لأ.. يعني اللي بيتبهدل
كل يوم ويتشتم ويضرب، غير اللي بيتقاشه كلمتين كل أسبوع..
واللي بتتعرض لاعتداء جسدي بشكل قاسي ومتكرر غير اللي
اتعرضت للتحرش مرة واحدة وأخذت حقها.. وهكذا..

ده غير إن بعض الأطفال حساسين أكثر من غيرهم.. يعني فيه
طفل تفرق معاه كلمة أو نظرة.. طفل تاني ما تفرقش معاه
كل حاجة بنفس الدرجة..

وطبعاً مستوى ذكاء الطفل وقدرته على الاستيعاب والتحليل
والفهم ممكنا ينقدر في أوقات كتير من مرض نفسي محقق..

ولو الطفل ده مبدع بأي شكل في حاجات زي الرسم أو الكتابة
أو التصوير أو غيرها، فده كمان ممكنا ياخده بعيد شوية عن
واقعه الضاغط المؤلم..

وحاجات تانية كتير جداً.. الموضوع معقد ومتشابك لأقصى
درجة..

نيجي بقى للمهم..

فيه عامل مهم جداً جداً جداً جداً، ويفرق كثير جداً جداً في عدم حدوث المرض النفسي حتى لو اجتمعت كل العوامل المؤدية إليه، أو في حدوثه حتى لو اجتمعت كل العوامل التي تحمي ضده..

والكلام ده موجه ليك.. ليك إنت شخصياً.. علشان ببساطة ما فيش أي حد مننا ما فيش في جيناته اللي قمتد لأجيال وأجيال للوراء درجة ولو بسيطة من الاستعداد للمرض النفسي.. وما فيش أي حد مننا ما ا تعرض لشكل من أشكال المعاملة غير الصحيحة ولو بنظرة أو بكلمة من الأب أو الأم.. وما فيش كمان أيبني آدم ما ا تعرض لظرف قاسي أو صعب أو مؤلم في حياته..

إسمعنا بقى حد يحصله مرض نفسي ومرض لأن.. ليه يبقى اتنين إخوات توأم عندهم نفس الجينات واتربوا بنفس طريقة التربية واتعرضوا لظروف حياتية متشابهة جداً.. ونلاقى واحد فيهم يصاب بصعوبات أو أعراض أو أمراض نفسية والتاني لأن!!

علشان فيه حاجة اسمها (القرار).. والوش الثاني بتاعه اسمه (المقاومة/الصمود) Resilience.. ودى بقى الحاجة الوحيدة اللي تقدر تقاوم الجينات والتربية والظروف.. أو تتصادع ليهم..

وهنا السؤال الصعب والمثير واللي اتعمل فيه كمية هائلة من النظريات والأبحاث والكتب والمناظرات العلمية والإنسانية والفلسفية على مدى عشرات السنين:

هو ممكن المرض النفسي بيجي بقرار؟

أقدر أقولك من خلال كل خبرقي، ودراستي جوّه وبّره مصر،
وقراءاتي وأبحاثي وأبحاث غيري: أيون..

كتير جدًا من مدارس ونظريات تكوين الأمراض النفسية بتقول إن المرض النفسي ممكن ييجي بقرار.. والقرار ده ممكن يكون على مراحل.. وده طبعًا لا ينفي أهمية العوامل الأخرى.. ولا يعني التعميم على الأمراض النفسية اللي سببها (وليس نتيجتها) اضطراب عضوي في المخ أو باقي أجهزة الجسم.

قرار إزاى يعني؟

الطفل اللي بيقعده كذا سنة يستقبل رسائل نفسية مؤذية ومشوهه، بييجي عند سن معين (الأبحاث بتقول من خمس إلى 7 سنين) ويقرر (ساعات بشكل واعي وساعات بشكل غير واعي)، إنه ما يكونش نفسه تاني، ويكون زي ما أهله واللي حواليه عاوزين.. يعني يقرر - مضطراً - إنه يدفن نفسه الحقيقة اللي اتولد فيها، ويطأطع ما نسميه بالنفس المزيفة علشان يعفي نفسه من الأذى ويعرف يعيش.. ويكون ب kedde وضع حجر الأساس في بنيان المرض النفسي الضخم اللي هايتبني جواه يوم ورا يوم.. معذور طبعًا.. بس ده اللي حصل..

ساعات القرار ده يفضل متخرن جواه سنين طويلة، وفي الوقت المناسب وتحت الظروف المواتية وبالتالي التضامن مع الاستعداد الجيني وغيره، يقرر تاني بوعي أو بدون وعي) الاستسلام للواقع، والتسليم للضغوط، والانحناء النفسي أمام الأحداث. و ساعتها يظهر المرض النفسي في أوضح صوره..

اللي يقرر يبقى انطوائي.. واللي يقرر يبقى اعتمادي.. واللي تقرر تقى هيستيرية، واللي تقرر تكره جسمها، واللي يقرر يكره نفسه، واللي يقرر يتجنن.. وهكذا..

إحنا في لحظة انطلاق شرارة المرض النفسي بيكون قدامنا الاختيار..

اللي عدى منكم باللحظة دي هايتفكرها كويس.. اللحظة اللي بيكون قدامي فيها قرار من اتنين.. إما المقاومة، وإما الاستسلام للأفكار وللوساوس.. إما التحمل، وإما الاستسهال والدخول في كهف الاكتئاب المظلم.. إما التعامل مع الناس مهما كان ده صعب، أو الغاؤهم واختلاق صور وأصوات وأشكال وناس وهلاوس وضلالات.. إما الحياة، وإما الموت..

طبعاً بعض مدارس الطب النفسي بتعترض على الكلام ٥٥، وبتشوف إن المرض النفسي هو مجرد (لخبطة في الكي米يا بتاعة المخ)، لكن أنا شايف إن النظرة دي (اللي بأحترمها وبأحترم روادها) هي نظرة قاصرة ومخزلة لكل إمكانياتنا الإنسانية الهائلة.. ولتكريم ربنا لينا بمنحنا الحرية.. والاختيار.. والقرار..

يعني إيه كل الكلام ٥٥؟

أنا رأيي إن الكلام ده بيفتح باب الأمل والحياة والنور.. علشان لما نصدق إن المرض النفسي ممكن يبدأ بقرار.. فيبقى نصدق برضه إن مقاومة المرض النفسي والعلاج منه برضه بتحصل بقرار..

يعني حضرتك مهما كان عندك من جينات، ومهما اتربت تربية قاسية، ومهما اتعرضت لظروف صعبة، تقدر ما تبلاش مريض نفسي.. لو عند اللحظة الصعبة الفاصلة.. لحظة الاختيار بين الاستسلام أو المقاومة، وبين الحياة النفسية أو الموت النفسي.. تقرر إنك تختار مقاوم، وتحيا..

يعني كمان إنك إنت أو أي حد عندك أي صعوبات أو أعراض أو أمراض نفسية، تقدر بقدرتك وإمكاناتك الشخصية اللي ربنا منحها ليك وبوجود علاقة واحدة طيبة (على الأقل) في حياتك تونسوك وتساعدك، تقدر مقاوم وتحدى جيناتك وتربتتك وظروفك وأعراضك.. وتتغير.. أو تخف.. آه.. تخف..

ده مش كلام في الهوا.. أنا شوفت الكلام ده بعانيا عشرات المرات على مدى كل سنين خبرتي المهنية.. وكلنا نعرف إن فيه حاجة اسمها التعبير الجيني Gene Expression.. يعني أي جينات بتاعة أي حاجة عندك، زي ما هي ممكن تنشط وتشغل.. ممكن كمان تكمن وتعطل.. بناء على حاجات كتير.. منها قراراتك النفسية والحياتية الوعية وغير الوعية.

إحنا ربنا حط فينا بؤرة نور من يوم ولادتنا لغاية ما نموت.. سميتها الفطرة.. سميتها النفس الحقيقية، سميتها قبس من روح الله.. سميتها زي ما تسميتها.. النور ده مش بينطفي أبداً مهما تعرض لرياح وأعاصير وزلازل نفسية مهما كانت عنيفة.. ممكن يخفت شوية، ممكن يتوجه شوية.. لكنه مش بينطفي أبداً.. ولا حتى بالموت..

إحنا جوانا قدرة هائلة على المقاومة.. ودواتفع إنسانية فطرية
جباررة على التغيير.. وقوة جذب رهيبة نحو الحياة..

في مرة واحد زميلاً أول ما سمع قد إيه ممكـن التربـية تؤـدي
الأطفال، راح سـأـل أـسـتـاذـيـ العـظـيمـ دـ. رـفـعـتـ مـحـفـوظـ وـهـوـ
مـخـضـوـضـ جـداـ وـقـالـ لـهـ: طـيـبـ والـليـ مـمـكـنـ يـكـونـ وـصـلـ لـأـلـادـنـاـ
غـصـبـ عـنـنـاـ، وـالـأـذـىـ الـلـيـ مـمـكـنـ يـكـونـواـ اـتـأـذـوهـ إـحـناـ مـشـ وـاخـدـينـ
بـالـنـاـ؟ دـهـ كـلـ وـاحـدـ فـيـنـاـ مـمـكـنـ يـكـونـ عـمـلـ بـلـاوـيـ فـيـ أـلـادـهـ.. دـدـ
إـحـناـ مـمـكـنـ نـكـونـ شـوـهـنـاهـمـ بـكـلـمـةـ أوـ نـظـرـةـ أوـ ردـ فعلـ!!

ردّ عليه دكتور رفعت بكل ثقة:

ما تخافش.. فطرة ربنا مش بتتشوه بسهولة.. البنـي آدمـينـ مشـ
زجاجـ بيـنـكـسرـ معـ أـوـلـ خـبـطـةـ.. الأـطـفـالـ أـقـوىـ مـاـ نـتـصـورـ بـكـتـيرـ..

كلـناـ أـخـدـنـاـ نـفـسـنـاـ.. وـقـولـنـاـ: الحـمـدـ لـلـهـ..

حطـ بـقـىـ الـكـلـمـتـيـنـ دـوـلـ حـلـقـةـ فـيـ وـدـانـكـ قـبـلـ مـاـ تـقـوـمـ..

إـنـتـ تـقـدـرـ تـتـغـيـرـ..

إـنـتـ تـقـدـرـ مـاـ تـبـقـاشـ مـرـيـضـ نـفـسـيـ..

وـحتـىـ لـوـ مـرـيـضـ.. إـنـتـ تـقـدـرـ تـخـفـ..

إـنـتـ تـقـدـرـ تـقاـوـمـ جـيـنـاتـكـ وـتـرـبـيـتـكـ وـظـرـوفـكـ..

وـتـقـدـرـ تـتـحـكـمـ فـيـ تـعـبـيرـ الـجـيـنـيـ..

لو كان جهاد النفس ليه أشكال ومستويات..
فده شكل من أشكال جهاد النفس..
وأقدر أسميه بكل ثقة: (جهاد الجينات)..

مطلوب بس إنت تصدق ده..
وتنوي..
وتقرر..
وتختار الحقيقة..
والنور..
والحياة..

ياللا بقى بصوت عالي جداً..
يسمع آخر الدنيا..
قول وأنا هاردد معاك:

أنا اخترت الحقيقة..
أنا اخترت النور..
أنا اخترت الحياة..

(٢٠)

علاقات خطرة

هانستعرض في الجزء ٥ من الكتاب ٣٠ علاقة خطيرة.. كل واحدة منهم ليها ملامح ومواصفات وتفاصيل..

لو ما أخذت بالك.. كل علاقة فيهم ممکن تكون مؤذية جدًّا..

ولو فتحت عينك وأخذت بالك.. يبقى بتحمي نفسك وبتحمي غيرك..

وبترسم بإيدك طريق سوي وممهد.. وخالي- إلى حد كبير- من أي ألغام نفسية أو عاطفية..

هانعرف مع بعض يعني إيه علاقة.. وأي جزء منك هو اللي بتعمل بيه علاقاتك مع اللي حواليك.. وإيه ملامح بعض العلاقات في حياتنا وإيه تأثيرها علينا وعلى غيرنا..

هانشوف العلاقة الاعتمادية وعلاقة العمى وعلاقة الجبل السري..

وهانتكلم عن العلاقة مع حد انطوائي أو حد نرجسي أو موسوس أو شراك..

هانخوض في تفاصيل العلاقات اللي بتعمل مع شخص سيكوباث أو شخص مستغل أو حد مدمن..

هانستعرض علاقة التقديس وعلاقة التقمص وعلاقة التقمص الإسقاطي..

هانعرف يعني إيه علاقة مع اللا شيء ويعني إيه علاقة البلع وإيه هي علاقة تحقيق النبوة..

هایظهرلک إنت إزاي ممکن تعمل علاقة مع نسخة قديمة من نفس البني آدم، وإزاي بتعمل علاقة مع دورك في المجتمع، وإزاي بتكون في علاقة مع حدّ عايش دور الضحية أو دور الجاني أو دور المنقذ..

هاتشوف خطورة العلاقة مع مجموعة، وهاتعرف إيه هي العلاقة اللي تحير وإيه العلاقة اللي تجنن وإيه العلاقة اللي ما تتسماش..

هانكتشف مع بعض هل الزواج أصلاً علاقه.. وهانتكلم بشكل علمي-نفسي عن العلاقة الجنسية..

وفي الآخر هانوضح إيه هي العلاقة الصحية الطيبة.. اللي تغير، وتصلح، و تعالج..

بعض العلاقات دي أنا وصفتها في كتاباتي السابقة.. بس حبيت أسجلهم هنا تاني بشكل مُجمَع، لأهميتهم الشديدة.. وعلشان يكون الفصل ده من الكتاب بالنسبة لك زي المرجع اللي ترجعله في أي وقت تحس فيه إنك محتاجله..

للتوسيع:

- بعض العلاقات والأمثلة مكتوب بصيغة المذكر، وبعضها مكتوب بصيغة المؤنث.. دي فقط أمثلة توضيحية، ومش معناها حصر نوع معين من الشخصيات في أحد الجنسين..

- يمكن تعديل أي علاقة من العلاقات المذكورة، عن طريق خصوص صاحبها للعلاج النفسي.

(1)

العلاقة مع شخص نرجسي

دی علاقة مستهلكة ومستنففة على كل المستويات..

الاسم مشتق من نارسيسas، وهو كان شاب إغريقي وسيم وجميل جدًّا. وكان عاجبه جماله أوي لدرجة إنه كان بيحتقر باقى الناس، لأنهم مش على نفس الدرجة من الوسامية والجمال..

حدّ من أهل بلده وداه النهر وخلاله يشوف جمال وشه على سطح المياه.. نارسيساس انبهر وفضل يتأمل جماله لفترة طويلة جدًّا، لغاية ما مات من حبه المريض لنفسه.

هاتلاقي نفسك في علاقة مع حد بيتكلم عن نفسه كتير أوي..
شایف إن كل حاجة بيعملها مهمة.. كل خطوة بيخطيها ليها
معنى.. وإنه يستاهل أكتير بتقى من اللي هو فيه دلوقت.

حد مستعد يضحي بأي حاجة في أي وقت علشان خاطر نفسه..
مستعد يرمي أي حد وراه، مستعد يدوس على أقرب وأحب
الناس ليه، علشان يطلع سلمة واحدة لفوق، أو خطوة واحدة
لقدام..

يقطاعك في الكلام علشان هو يتكلم وإنك تسمع، ما يلتزمش
بأي قواعد أو مواعيد أو أعراف أو قوانين.. لأنه شايف نفسه
أكبر منها وإنها ما ينفعش تتطبق عليه..

ما يراعيش مشاعرك ولا أحاسيسك.. في نفس الوقت اللي يطلب
منك تراعي مشاعره وأحاسيسه..

طول الوقت شايف نفسه أحسن، عايز يبقى (الأحسن)
و(الأفضل) في كل حاجة.. طول الوقت..

أناي ومحروم ومنفوخ زي بالونة الهوا..

بيتباهى كتير بكلامه ومظهره وطريقته ودماغه وقدراته..
وعاوزك وعاوز الناس تشوفه دائماً فوق البشر..

عاوز العالم يدور حواليه، ومستني منك ومن كل الناس التقدير
والاحترام والإعجاب.. بمبرر وبدون مبرر..

عنه قدرة فظيعة على الإقناع.. ممكن يحسسك إنك أميرة
الأميرات وساحرة الساحرات.. وأول ما يوصل لغرضه، تبقى عنده
أقل واحدة في الدنيا، ويرميكي تحت رجليه..

لو قولتيله (لا) تبقى مصيبة، ولو ما شوفتيش اللي هو شايفه..
يتهد العالم، وتتخرّب الدنيا..

لو انتقدتيله يتضايق ويكتئب بسرعة، وممكن يغضب ويهدّج
ويكسر، مجرد إنك شككتي في كلامه..

ممکن یستخدمك ويستخدم أي حد وأي حاجة علشان يصل
لي هو عاوزه..

لو لقيتي نفسك في علاقة مع شخص بالشكل..

ولو ماسمحش لنفسه بالعلاج النفسي..

خدى ديلك في سنانك..

واجري..

(٢)

العلاقة مع شخص اعتمادي

ده بقى حد هايخلص عليك..

الشخص الاعتمادي- من اسمه كده- هايفضل طول الوقت
معتمد عليك.. عاوزك تكون جنبه على طول.. وما تسييهوش
لوحده أبداً..

هايفضل دايماً يطلب منك المشورة والنصيحة، وحتى أخذ
القرارات مكانه، علشان ما يحملش نفسه مسؤولية أي حاجة
بيعملها..

هايسألك يلبس إيه، ويأكل إيه، ويسيهر فين النهاردة، وساعات
يعيش فين ويشتغل إيه.. هايسألك بطرق كتير وأشكال مختلفة،
من أول السؤال الصريح، لغاية السؤال المتداري في هيئة طلب
أو نصيحة أو مشورة..

سلبي جداً.. خواف لأقصى درجة.. ويخاف جداً يعترض أو يقول
(لا)..

يدور على اللي يشجعه ويلزق فيه، ممكناً يوافق على حاجة
هو مش مقتنع بيها مجرد إنه يرضي حد وما يزعليهوش منه..

مشكلته الكبيرة هو إنه بيختلف بيقى لوحده ويعتمد على
نفسه، لأنه حاسس دايماً إنه ضعيف، وقليل الحيلة..

علشان كده مستعد يدفع أي قمن في مقابل رضا اللي معاه
واستمرار علاقته بيـه..

الشخص اللي زي ده هايتبعك وهايستنزف طاقتك وفكرك
ومجهودك ومشاعرك.. هايكون عامل في علاقته معاك زي الطفل
الصغير.. دايـاً طلبات واحتياجات، وكأنه مش بيشبع..

هايخلiek تفكـر مكانـه، وتحـس بـدـالـه، ويـا سـلام لـو تعـيش بالـنيـابة
عـنـه ..

الشخص ده لـو مـاتـعالـجـش.. إـوعـى نـفـسـك تـنقـحـ عـلـيكـ وـتـعـجـبـكـ
الـحكـاـيـةـ وـتـتـصـورـ بـقـىـ إـنـكـ إـنـتـ حـلـالـ الـعـقـدـ وـقاـهـرـ المشـاـكـلـ
وـعـبـقـريـ عـصـرـكـ وزـمـانـكـ، وـتـرـوـحـ وـاقـعـ فيـ دورـ المـنـقـذـ ليـهـ.. عـلـشـانـ
ديـ عـلـاقـةـ مـرـهـقـةـ مـهـلـكـةـ هـاـتـدـيـ فـيـهـاـ وـبـسـ.. منـ غـيرـ ماـ تـاخـدـ..
أـيـ حاجـةـ..

(٣)

علاقة التقديس

في العلاقة دي فيه حد بيقدسك.. بيعبدك.. بيتعامل معاك على إنك شخص خارق.. فظيع.. مالكش حل..

الحكاية دي بتحصل كتير في علاقات الحب.. خاصة في أولها.. وفي علاقات تانية غيرها..

طبعاً إنت نفسك ممكن تعمل الحكاية دي مع حد تاني.. يعني تشووف واحد أو واحدة على إنها ما فيهاش غلطة.. ملاك نازل من السماء.. وبافي الكلام اللي إنت عارفه ٥٥..

مشكلة العلاقة دي هي إنها بتعميك عن الجوانب التانية من الشخص اللي إنت بتعامل معاه.. وتخليك عايش في خيال ووهم.. تفوق منه على قلم محترم..

لو العلاقة دي اتعلمت معاك.. بيكون فيه مشكلة تانية، وهي إن اللي بيقدسك ده هايحاول يعتمد عليك، ويخليك مصدر دائم للأمان والحنية والعطاء والمعرفة.. بيقى زي الطفل اللي بيدور على الرضعة كل شوية..

فيه مشكلة أكبر.. وهي إن اللي بيقدسك النهاردة.. غالباً هاييجي بكره ويقلب على الوش الثاني، يعني لو ما ليتش كل طلباته، وكنت عند كل توقعاته، أو ما كنتش متاح ليه طول الوقت، هايبدأ يشوفك بالشكل العكسي تماماً..

فتبقى أسوأ واحد في الدنيا، وما تعرفش حاجة، ومش بتفهم ولا
تقدر.. والوضع ينعكس ١٨٠ درجة..

هي لعبة شكلها حلو على المدى القصير.. لكن على المدى
الطوبل.. مشاكلها كتير..

ما تفرحش بالتقديس..

وما تقدسش حد..

اللي يستاهل التقديس هو ربنا بس..

وإحنا بشر.. مش آلهة..

(٤)

علاقة العمى

العلاقة دي من العلاقات المؤذية جدًا بين الناس..

في النوع ده من العلاقات فيه طرف مش شايف الطرف الثاني أصلًا.. يعني بيكون جواه مشاعر قديمة متخزنة ناحية حد تاني (حبيب قديم، مدرس من زمان، صديق، ناحية حتى أبوه أو أمه) ويعامل مع شريكه في العلاقة بنفس المشاعر دي.. مش بس نفس المشاعر.. لا ده كمان نفس ردود الفعل.. ونفس طريقة التفكير والاستقبال القديمة، كأنه شايف وسامع وحساس الحد الثاني ده بالظبط.. بس وهو مش واحد بالله.. واللي معاه في العلاقة مش واحد بالله برضه..

يعني واحد يشوف واحدة في الشارع ولا يعرفها ولا عمره شافها قبل كده ويحس ناحيتها بحب رهيب من غير أي سبب وبدون أي مقدمات.. وهو مش عارف إن الحب ده قديم جدًا، وجواه من زمان ناحية حد تاني خالص (مدرسته في ابتدائي، واحدة قريبته، أو أمه مثلًا)، وهو لبس البنت المسكينة صورة الحد ده..

أو حد يحس بغضب شديد جدًا ناحية حد معملش أي حاجة تستاهل الغضب.. وهو برضه مش عارف إن ده غضب مخزون جواه ناحية حد تاني خالص (واحد صاحبه، حد جيرانه، أو أبوه مثلًا)، وهو برضه لبسه صورة صاحبه أو جاره أو أبوه..

كتير أوي من علاقاتنا بيحصل فيها كده.. الحب من أول نظرة..
الكره من أول كلمة.. الغضب اللي ما لهوش سبب.. وكتير من
الخناقات والمشاكل الزوجية، وساعات كمان مشاعر جنسية..

طيب نعرف إزاي إذا كانت مشاعرنا ناحية حد مشاعر حقيقة
ناحية فعلاً، واللا مشاعر قدية مكبوتة، بس عملناها إعادة
توجيه؟

أول ما تلاقي مشاعرك ناحية حد كتيرة جدًا.. وسريعة جدًا..
وما لهاش أي مبرر.. اعرف فورًا إنك (غالبًا) مش شايف الحد
ده، ومش بتعامل في الحقيقة معاه هو.. إنت بتعامل مع حد
تاني.. من خلاته..

ساعتها..

افتتح عينيك.. وشوف من جديد..

وافتح ودانك.. واسمع من الأول..

وافتح إحساسك.. واستقبل صح..

(٥)

العلاقة مع حدّ موسوس

دي بقى العلاقة اللي هاتحس فيها إنك تحت السيطرة..

هاتلاقى نفسك مع حد كل حاجة عنده بالورقة والقلم.. كل خطوة محسوبة، كل شيء مدروس.. ما فيش أي فرصة للخطأ.. ولو حصلت منك أو من غيرك أي غلطة.. ياويلك يا سواد ليلك.. لوم وعتاب وتعذيب ضمير بلا نهاية..

الشخص ده بيحب كل حاجة تبقى منظمة ومطبوعة وفي وقتها وفي مكانها.. مش بيحب المفاجآت ولا الحاجات غير المتوقعة.. ممكن يقضي أوقات طويلة جدًا كل يوم علشان يرتب أو يضبط أو ينضف أي حاجة..

مثالي وضميره صاحي.. بس صاحي زيادة عن اللزوم.. يقف على الواحدة وما يفوتش أي حاجة.. يلتزم بالقواعد.. ويستغرق في التفاصيل لغاية ما يتعب، ويتعب اللي حواليه..

صارم وساعات قاسي وغضبه صعب جدًا.. مش بيعبر عن مشاعره وعواطفه كتير لأنه بيعتبرها ساعات نوع من الضعف..

معندهوش أي مرونة في تفكيره ولا تصرفاته.. هي كده.. يعني هي كده..

حرirsch شوية، وبخيل شويتين..

في الحقيقة التعامل مع حد بالشكل ده صعب، ويا سلام لو إنت من النوع التلقائي شوية.. لأنك هاتحس طول الوقت إنك مضطر تحسب حسابات كتير قبل ما تقول أي كلمة، أو تتصرف أي تصرف.. لأنه لو معجبهوش.. هاتقوم القيامة.. بجد..

وكمان هاتتعب جداً معااه عاطفياً، لأنه بالرغم من كونه عنده مشاعر جياشة وحساس أوي.. لكنه كتوم ومش بيحب يظهر اللي جواه بسهولة..

إلى جانب إنه مش هايهم بيكل أو بيكي.. لأنه دايمًا فيه حاجة أهم هو لازم يعملها..

بنسبة لازم.. هو بيستخدم كلمة (لازم) وكلمة (المفروض) كتير أوي..

لو لقيت نفسك في علاقة مع حد بالشكل ده.. لو لقيتي نفسك في علاقة مع حد بالشكل ده (من غير ما ي تعالج)، خليكوا عارفين.. إنكوا هاتخسروا تلقيتكم، وهاتدفنوا إبداعكم.. وطول الوقت.. هاتشكوا في نفسكم..

(٦)

العلاقة مع اللاشيء

دي بقى علاقة مع الهوا.. مع الفراغ..

اللي غالباً بيكون الفراغ الإلكتروني..

أنا شفت كتير ناس بتعمل علاقات حب أو صداقة على الإنترت مع ناس ما شافو هممش لغاية النهاردة.. كتير منها بتبقى ظريفة ولطيفة.. بس العلاقات اللي زي دي بيكون فيها مشكلة كبيرة في بعض الأوقات..

المشكلة دي هي إنك بتحطط.. بتضيف.. بتسقط على الطرف الثاني في العلاقة صفات وتخيلات وتوقعات مش بتاعته.. لا.. دي بتاعتك إنت.. يعني بتكمel أجزاء الصورة والشخصية اللي ناقصة، بمواصفات من خيالك، بحاجات ممكن تكون بعيدة ومش حقيقة، وممكن تكون الحقيقة عكسها تماماً.. ويا سلام لو الطرف الثاني عجبته الحكاية وقرر يكون (قدامك) زي ما إنت عاوزه أو عاوزها..

بصراحة.. إنت هنا ممكن تكون عامل علاقة مع نفسك..

طبعاً الأصعب والأصعب إن الطرفين يعملوا كده مع بعض.. يعني هو يشوف فيها الصورة اللي هو رأسمالها في دماغه.. وهي تتعامل معاه بالصورة اللي هي رأسمالها في دماغها.. وفي الحقيقة كل واحد فيهم مش عامل علاقة.. غير مع نفسه.. واللاشيء..

العلاقة دي فيها كتير من العمى..

والعلاقات اللي زي دي عمرها قصيرة..

ولو طولت من غير ما الطرفين يستكشفوا بعض كوييس..

ممكّن تكون مؤذية جداً..

(٧)

العلاقة اللي تحير

العلاقة دي من أصعب العلاقات اللي في الدنيا.. وهي العلاقة مع حد عنده شخصية (бинية) أو (حدية).. Borderline يعني..

في العلاقة دي إنت غالباً مع واحدة أو واحد كل يوم بحال.. النهاردة إنت بالنسبة لها أحسن واحد في الدنيا، وأجدع راجل في التاريخ.. ومخلصها من كل شرور العالم.. وفاهمها وبتحبها وحاسس بيها.. أما بكرة، فأنت أسوأ بني آدم هي عرفته، وأندل شخص على وجه الكرة الأرضية.. ولا بتفهم ولا بتحس ولا بتعرف تحب، ولا تستاهل تعيش من أصله..

استنى بس ما تقولش كل البنات كده..

هي كمان مندفعـة جدًا.. اللي بيطلع في دماغها بتعمله.. مهما كان، وبدون حساب لأي عواقب.. ممكن تصرف كل اللي معها في ثانية واحدة، حتى لو مش هاتعرف ترجع بيتها.. ممكن تدخل في علاقة عاطفـية وساعـات جنسـية فجـأة وبدون مقدمـات.. ممكن تسافـر أي مكان في أي وقت مجرد إن الفكرة طلعت في دماغها.. ممكن تبقى معاك وفجـأة تسيـبك وتمـشي وما ترجعـش تاني، وإنـت ما تعرـفـش هي راحتـين ولا راحتـليه..

الأدهـى والأمر.. إنـها لو طقتـ في دماغها تؤـذـي نفسـها أو تؤـذـي أي حدـ بأـيـ شـكـلـ، هـايـحـصـلـ فيـ ثـانـيـةـ، مـنـ غـيرـ ماـ تـفـكـرـ أـصـلـاـ..

على فكرة، هي من جوه غلبة جدًّا، وحاسة إنها فاضية تمامًا، رغم مشاعرها اللي بتظهر كتير وبشكل مبالغ فيه..

الشخصية دي غالباً بتكون اتعرضت في صغرها لصدمة نفسية شديدة، فككت أجزاءها.. وخليتها على حافة أكثر من مرض من الأمراض النفسية.. قلق، تقلبات مزاج، لحظة في إحساسها بنفسها، اضطرابات جنسية، وحتى اضطرابات في الأكل والنوم والجسم، وغيرها..

أصعب حاجة في الشخصية دي هي إنها بتحطك في اختبارات صعبة طول الوقت، علشان تعرف وتنأك قد إيه إنت بتحبها وقد إيه هاتتحملها.. وأول ما حضرتك تتعب وتزهد وتبقى خلاص هاتسيبها، ترجع وتقرب وتحن ليك، وكأنها طفلة صغيرة.. وبعدها بشوية، تحطك في اختبارات تاني.. وغالباً بتكون أصعب..

لو لقيت نفسك في علاقة مع واحدة أو واحد بالشكل ده..

يبقى تاخدها أو تاخده على الدكتور النفسي فوراً!!!!!!..

(٨)

العلاقة اللي تجنب

في العلاقة دي، إنت بيوصلك من الطرف الثاني رسائل عكس بعض، في نفس الوقت..

يعني كلامه يقولك بحبك.. وتصرفاته تقولك بكرهك.. كلامه يقول يمين، تصرفاته تقول شمال.. اللي يجنن في ده، إنه بيحصل في نفس ذات الوقت..

يعني الرجل يقول لابنه ما يهمكش يا حبيبي، ذاكر اللي تقدر عليه واعمل اللي عليك والكلية اللي يجيها ربنا تبقى كويسة، وفي نفس الوقت، يوصله من تحت لتحت بالتصرفات وساعات بالكلام: إوعى تدخل غير كلية الطب!!!!

الست تقول لبنتها ياللا بقى اكبرى وشدي حيلك علشان تتجوزي.. وفي نفس الوقت فيه رسالة تانية بتوصلها لها بميت شكل وطريقة: إوعى تكبري وتسييبيني، إوعى تتجوزي وتتخلي عنـي..

بيسموا الرسائل اللي عكس بعض بالشكل ده Double message، وثبت علمياً إنها بتجنن.. آه بجد.. الرسائل اللي زي دي لو وصلت لأطفال صغارين لفترة معينة من الوقت، بتساعد في إصابتهم بالفصام.. اللي هو الجنون يعني..

بالملاية إحنا رسائلنا مش بنوصلها لبعض ب مجرد الكلام..
بالعكس.. الكلام بيوصل ٧ في المية بس من أي رسالة.. الباقي
بيوصل بتعبيارات الوش، وتعبيارات الجسم، ونبرة الصوت،
و حاجات تانية كتير أوي.. فماتستغربش لما تعرف إنك ممكن
توصل رسالتين عكس بعض في نفس الوقت..

يعني تقول أنا متطمئن.. وإننت عمال تهز في رجلك و تاكل
ضواهرك..

أو تقول أنا متضايق شوية، وإننت بتضحك..

أو أنا كويس أهو.. ودموعك على خدك..

شوف بقى إحنا في علاقاتنا اليومية فيه قد إيه أمثلة بالشكل

..٥٥

حاول توصل رسالة واحدة.. حاول توصل نفس الرسالة.. بكلامك
وجسمك ووشك وأفكارك ومشاعرك..

مهما كانت الرسالة دي صعبة أو قاسية، فهي أرحم بكثير من
رسالتين عكس بعض في نفس الوقت..

(٩)

العلاقة مع سيكوبات

العلاقة دي ممكن تحطمه..

الشخص ده بيكون جذاب جًدا، وكذاب جًدا في نفس الوقت..

رغم إنه يبدو ودود وحبوب، لكنه في الحقيقة مش بيحس بيحد ومش بيتعاطف مع حد ومش بيحب حد، ولا حتى بيحب نفسه.. ده عبارة عن كتلة متحركة من الأذى لنفسه وللي حواليه، مخلفة بخلاف سوليفان فاخر..

بيتلعب بالكلام والمواقف والتصرفات.. يقدر يقنعك بالحاجة وعكستها، يقدر يورطك توريطة ما تعرفش تطلع منها، ممكن بكل بساطة يوقع بينك وبين حد تاني وتالت وعاشر، ممكن يوقع مجموعة ناس في بعض..

كذبه مالهوش حدود، يتنفسن في أساليب الخداع والكذب والمماطلة والملاوعة.. ممكن يؤذي أي حد بأي شكل من أشكال الأذى.. من أول الإهانة بالكلام لغاية القتل.. وبيعمل كل ده، من غير ذرة إحساس بالندم أو الألم أو الذنب.. ممكن يولع الدنيا، من غير ما يحس بالذنب..

لو حاولت تلومه أو تعابه، يقلب الترابيزة ويطلعك إنت الغلطان، لغاية ما يقنعك إنك تعذرله.. وتبوس راسه كمان..

بيزهق بسرعة، يبدل وين نوع في العلاقات كل شوية، وفي علاقاته بيكون ليه دائمًا اليد العليا والسيطرة والتحكم في الآخرين.. ويقدر يعمل ده بمنتهى الهدوء وإظهار الطيبة والبراءة اللي في الدنيا..

أناي جدًا، وبيتعامل مع الأشخاص على إنهم أشياء.. يستخدمهم شوية وقت ما يحب، وبعدين يرميهم في أقرب سلة مهملات.

عنيف، وعنفه ليه أشكال كتير، بعضها مخفي ورا قناع الطيبة الزائفة، وبعضها ظاهر واضح قاسي ما يعرفش الرحمة..

ورغم إنه بارع في الخداع والكذب والملاوعة، لكنه دائمًا بيقع ويكتشف، ويبقى عامل زي اللي عمال يحفر حفرة كبيرة جدًا، وفي الآخر يقع فيها..

الخطورة هنا، إنه مش بيقع لوحده.. لأن.. ده ساعات بيوقع ناس معاه.. خلي بالك أحسن تكون منهم..

لو لقيت نفسك في علاقة مع شخص سيكوباث..

يبقى يا إما تاخده على الدكتور النفسي فوراً..

أو.. مش هاقولك خد ديلك في سنانك وإجري..

لا.. سيب ديلك.. واجري بكل سرعتك..

(١٠)

العلاقة.. اللي ما تتسماش

رغم إنه عنوان غريب، لكنه هايووضح مع الكلام..

فيه كتير علاقات بأشوفها مش بيكون ليها اسم معين، ولا ملامح محددة.. وده بيكون من أكبر مشاكلها..

يعني علاقة بين واحد وواحدة..

أقولها: بتحبيه؟ -

تقولي: يعني.. -

طيب هو بيحبك؟ -

لسه مش متأكدة.. -

ووقت يضيع ومشاعر تنهك.. وإننا حتى مش عارفين بنعمل إيه..

واحدة تانية بتحبها وبيحبها، طيب..

هاد.. ناويين على إيه؟ -

لا لسه مش عارفين! -

يعني إيه مش عارفين؟ ناوي يتقدم ويخطبك إمتنى؟ -

لا هو لسه قدامه ٤ سنين لغاية ما يشوف هاي عمل إيه؟ -

طيب في الأربع سنين دول هاتعملوا إيه؟ -

أدينا بنحب بعض! -

في الحقيقة.. دي مش علاقة.. ده نزيف مشاعر.. ماساج عاطفي..
أو في أحسن الأحوال.. تعلق بالفراغ.. علشان بعد أربع سنين،
غالباً هو هايكونبني آدم تاني وهي هاتكونبني آدمة تانية..

حد ثالث..

- أنا في علاقة وتخطينا حدود كتير أوي مع بعض..
 - طيب ما اتجوزتوش ليه؟
 - لا.. إحنا الاتنين عندنا فير أوف كومتمنت Fear of commitment !! أو هو متجوز عنده عيال!!
 - أيوه يعني اللي إنتوا فيه ده اسمه إيه؟ إيه الخطوة الجاية؟
 - يعني!! مش عارفين لسه !!
- العلاقات دي مالهاش عنوان.. ما تعرفش تسميها إيه.. لا هي حب، علشان الحب الحقيقي علاقة فيها مسؤولية ووعي والتزام.. ولا هي خطوبة، ولا هي جواز.. ولا هي أي حاجة.. حاجة ما تتسماش كده..

مهم أوي في أي علاقة إنها تكون واضحة، ولها معامل ولها مسمى.. ومهم أكثر إن أصحابها يكونوا عارفين أولها من آخرها.. يعني عارفين هانعمل إيه.. إمتنى.. مش سايبيتها كده زي ما تيجي..

علشان العلاقات اللي بالشكل ده بتاخذ من طاقتنا ومشاعرنا
ومجهودنا ونفسنا كتير جداً، لدرجة فعلاً مخيفة..

كل حد فينا يسأل نفسه دلوقت..
العلاقة اللي أنا فيها دي.. اسمها إيه؟

(١١)

علاقة الضحية والجاني والمنفذ

بعض الناس لما يتدخل في علاقة مع حد.. يختاروا يلعبوا دور من ٣ أدوار.. دور الضحية، أو دور الجاني، أو دور المنفذ..

تلاقي حد في علاقاته دائِماً بيضْحَى بنفسه، يعمل كل حاجة علشان يسعد اللي معااه ويرضيه من غير أي مقابل.. يقدم الطرف الثاني على نفسه طول الوقت.. يدّي باستهرا و ما يستناش ياخذ أبداً.. يدوب كل ليلة وكل يوم علشان غيره يتنهى ويرتاح.. وهو ممكِن يكون بيتحرق وبينزف من جواه..

٥٥ اسمه دور الضحية..

حد تاني لما يتدخل في علاقة، تلاقيه يطلب طلبات ويديّ أوامر كتير، ويبقى دائِماً متوقع من الطرف الثاني إنه يكون مطيع ويسمع الكلام وما يقولش (لأ).. بيبقى شايف إنه من حقه يعمل أي حاجة في أي وقت، بغض النظر عن تأثير ده على غيره.. يستنى دائِماً من الآخرين العطاء والبذل والسماح بدون حدود.. وهو مش بيرضي أبداً.. غضبه صعب وقاسي.. محتاج اعتذار ورا اعتذار .. ومش بيسامح.. وإثبات ورا إثبات.. مش بيصدق..

٥٥.. اسمه دور الجاني..

و فيه حد بقى بيكون لطيف وطيب وحنيّ، يساعدك بكل سخاء.. يقدم لك حلول جاهزة.. يجاوبلك على الأسئلة.. يرميلك أطواق النجاة.. ويأخذ بيديك لبر الأمان..

شخص محبوب.. مرغوب.. منتظر.. بيلعب دور المخلص، اللي بيسمع للكل، ويفهم الكل، يطبّب على ده.. ويحسّح دموع ده، ويحن على ده.. شخص هادي وعاقل ورزين.. ناصح.. وقريب.. وحكيـم..

وده بقى يا سيدى اسمه دور المُنـقـذ..

طبعاً علشان تلعب دور الضـحـيـة.. بتدور على حد تنطبق عليه مواصفات دور الجـانـي.. وعلشان تلعب دور المـنـقـذ.. بتدور على اللي ينفع يلعب دور الضـحـيـة.. وعلشان تلعب دور الجـانـي.. بتختار اللي يـسـمـحـلـكـ تـخـلـيـهـ ضـحـيـة..

يعني لو حد مُستـبيـحـ كـرامـتكـ، وبيـدوـسـ عـلـيـكـ، ويـسـتـغـلـكـ مـرـةـ وـاثـنـيـنـ وـثـلـاثـةـ.. هو (غالـبـاـ) شـافـ فـيـكـ اـسـتـعـدـادـكـ إـنـكـ تـلـعـبـ دـورـ الضـحـيـةـ، وـلـعـبـ مـعـاكـ دـورـ الجـانـيـ، وـإـنـتـ سـمـحتـلـهـ بـدهـ..

والـليـ بـتـمـوتـ فـيـ حـبـبـهاـ وـبـتـوـصـلـهـ طـولـ الـوقـتـ إـنـهـ فـارـسـ أحـلامـهاـ الـلـيـ هـايـخـلـصـهاـ مـنـ كـلـ شـرـورـ العـالـمـ وـظـلـمـ النـاسـ، وـإـنـ كـلـ أحـلامـهاـ وـأـمـانـيـهاـ فـيـ الدـنـيـاـ إـنـهاـ تـعـيـشـ مـعـاهـ بـيـنـ أـرـبـعـ حـيـطـانـ وـبـسـ.. هيـ فـيـ الـحـقـيـقـةـ بـتـعـيـشـ مـعـاهـ دـورـ الضـحـيـةـ، وـبـتـطـلـعـ مـنـهـ دـورـ المـنـقـذـ، وـصـاحـبـناـ طـبعـاـ يـحـبـ الدـورـ، وـيـلـعـبـهـ زـيـ الـفـلـ، وـيـوـصـلـ لـنـفـسـهـ وـلـيـهـ إـنـهـ طـيـبـ، وـجـدـعـ، وـشـهـمـ.. وـبـعـدـ شـوـيـةـ هـايـدـيـ لـنـفـسـهـ الـحـقـ فـيـ إـنـهـ يـمـتـلـكـهـاـ..

إـوعـىـ تـفـتـكـرـ إـنـ فـيـهـ دـورـ فـيـهـ أـحـسـنـ مـنـ التـانـيـ.. بـالـعـكـسـ.. كـلـ دـورـ جـوـأـهـ كـمـيـةـ هـائـلـةـ مـنـ الـمـصـايـبـ وـالـبـلاـوـيـ وـالـأـذـىـ وـالـضـرـرـ.. لـيـكـ وـلـلـآـخـرـيـنـ..

اللي بيلعب دور الضحية بيلاعبه علشان يثبت لنفسه ويحس
قدامها أنه دايرًا مظلوم ومغلوب وعديم الحيلة.. فيهرب من
المسؤولية والإحساس بالذنب، ويرميهم على غيره.. واللي بيلاعب
دور المُنقذ هو في الحقيقة بيُنصب شباكه حواليك علشان يتلوكك
بعد شوية ويخليك تعتمد عليه.. واللي بيلاعب دور الجاني ده
حد بينتقم من نفسه ومن الحياة ومن ناس تانيين في شخصك..
ومن خلالك..

تعمل إيه بقى؟

أولاً.. وقف فورًا مُمارسة الأدوار دي.. وعيدي ترتيب حياتك،
وعلاقاتك.. وصحح مسارها.. وكفاية أذى لغاية كده..

وثانيًا.. ما تسمح لأي حد إنه يمارس معاك أي دور من الأدوار
دي في علاقتك بيها، وما تسمح كمان لحد إنه يطلع منك دور
منهم تمارسه معاه..

ما تبلاش ضحية.. ولا جاني.. ولا منقذ..

(١٢)

العلاقة اللي تكون فيها دائمًا متهم

عمر الحب لوحده ما يكون كافي لنجاح أي علاقة.. إحنا هنا بقى، بنتكلم عن علاقة ناقص فيها حاجة مهمة جدًا.. وهي الثقة..

العلاقة دي مع شخص شراك.. بارانويد..

الشخص ده هايطلع عينيك بجد..

أولاً هو بيشك - من غير أي دليل حقيقي - في تصرفاتك، يعني اتكلمتني مع مين في التليفون؟ طيب صوتك كان واطي ليه؟ ليه دخلتني الأوضة وطلعتني تاني؟ ليه بتتصلي كده؟

ثانياً هو مش بس بيشك في تصرفاتك أو تصرفاتك، هو كمان بيشك في نواياك ونواياك غيرك.. يعني لما عملت كذا كنت تقصد إيه؟ ده هو لما قال كذا كان يقصد كذا من تحت لحت.. وهو ولا يقصد أي تحت ولا فوق حتى!

بيوجه أصبع الاتهام للآخرين دائمًا، رغم إن باقي الأصابع موجهة ناحيته هو..

بيفسر أي حاجة بالمعنى البعيد.. على إنها إساءة أو عدم تقدير..

دائمًا متصور إن الناس بتتأمر عليه، بتذير له حاجة، ناوية نية سيئة، علشان كده طول الوقت بيأخذ كل الاحتياطات، علشان لما تتنفذ المؤامرة المزعومة، يكون جاهز ومستعد..

حرি�ص في كلامه وتصرفاته جدًا.. علشان ما حدّش ياخد عليه
غلطة، ويستخدمها ضده بعد كده..

غضبه صعب، وما بيسامحش.. بالعكس، بيخرن كل كلمة، وكل
تصرف، وكل رد فعل، ويفتكرهم ويحاسبك عليهم.. ولو بعد
سنين..

وطبعًا هايشك إنك خاين أو خائنة، وهايكون عنده ميت دليل
وألف برهان..

الشخصية دي متبعة جدًا.. ورغم إنه من جوّه غلبان ومش
واثق حتى في نفسه، لكنه بيطلع ده على كل اللي حواليه..

الشخص ده يحتاج علاج..

وما ينفعش تكون في علاقة معاه.. من غير ما يتغير..

(١٢)

العلاقة مع مُدمن

دي بقى العلاقة اللي عاملة زي خيوط العنكبوت السّام.. تقع فيها وتلف حواليك وما تخرجش منها إلا بمنتهى الصعوبة..
أنا مش هاتكلم عن الإدمان ولا عن المدمنين لأن ده مش موضوعنا.. لكنني هاتكلم عن صعوبة العلاقة مع مدمن..
إنك تكون في علاقة مع حد مستعد يعمل أي حاجة علشان يحصل على مادة إدمانه.. ممكن بيعي أي حاجة وأي حد..
ممكن يؤذى نفسه أو أي حد من اللي حواليه.. ممكن يكدر..
يزور.. يسرق، علشان خمس دقائق نشوة بعد جرعته..
اللي بيكون في علاقة مع مدمن بيتأذى أشد أنواع الأذى.. نفسياً
وبدنياً وعاطفياً وكل حاجة..

أكبر مشكلة شوفتها في العلاقات اللي بعض الناس- خاصة البنات-
يعملوها مع مدمنين هي إنها بتكون مش عاوزة تسيبه.. رغم
كل اللي بيعمله..

يا ستي ده بيؤذيك -

هاستحمل علشان خاطره -

يا ماما ده بيسرقك ويبيع دهبك علشان يدمن -

طيب قوللي أعمل إيه.. بحبه! -

ده بيخونك كل يوم.. -

بس لو رجعلي هاسامحه.. -

ده بالنسبة لي بيكون غريب ومستفز أكثر من الإدمان نفسه..
لأنها بتحاول تلعب دور المنقذ مع حد مش ناوي ينقذ نفسه
أصلًا.. وده بيستهلك مشاعرها ووقتها وفلوسها وطاقتها، وساعات
حياتها كلها.. بتتدخل في دوامة مش بتعرف تخرج منها فعلاً..

المدمن ما لهوش حل غير إنه يتعالج.. وما ينفعش أكمل معاه
وهو مدمن أبدًا.. أنا مش ربنا ولا أنانبي ولا أنا منقذ..

يتعالج الأول.. واتأكد إنه اتعالج كوييس، واطمن إنه ما رجعش
ومش هايرجع للإدمان تاني.. وبعدين نقى نشوف..

غير كده.. يبقى بتحرقي نفسك.. وبتبهدليها.. وبتدفعي-
وهاتفضلي تدفعي- تمن غالي أوي..

(١٤)

العلاقة الجزئية

في العلاقة دي حد بيعمل علاقة مع حة منك.. مش معاك كلك
على بعضك..

يعني إيه؟

يعني حد شايف فيك الحاجات الحلوة بس.. شايفك ملاك
نازل من السما، مش بتغلط.. تعرف كل حاجة وتفهم كل حاجة
وتحس بكل حاجة.. يقولك إنت رهيب.. إنت فظيع.. يقولك
إنتي ما لكيش حل..

أو حد تاني شايف منك حاجات وحشة بس.. إنت وحش.. مش
كويـس.. أناـي.. طمـاع.. مش بـتفهم.. مش بـتحـس.. مهمـل.. وكـأنـك
شـيطـان مـليـان أـخـطـاء..

الأـخـطـر مـن كـده إـنـك إـنـت شـخـصـيـاً تـعـمـل عـلـاقـة مـع نـفـسـك
بـالـشـكـل ٥٥، يـعـنـي تـشـوـف فـي نـفـسـك الحاجـات الـحـلـوـة وبـس..
وتحـس إـنـك أـحـسـن واحدـ فيـ الدـنـيـا.. أو تـشـوـف فـي نـفـسـك الحاجـات
الـوـحـشـة وبـس، وتحـس إـنـك أـسـوـأ واحدـ فيـ الدـنـيـا..

إـحـنا سـاعـات بـنـعـمـل كـدـه حـتـى فـي عـلـاقـتـنـا بـالـدـيـن..

يعـنـي مـا نـشـوـفـش مـن الدـيـن إـلـا القـشـور والمـظـاهـر.. وـنـسـيـبـ
الـحـقـيقـة وـالـعـمـق وـالـجـوـهـر وـالـأـصـل..

ساعات كمان بنعمل علاقة مع حد من خلال موقف واحد بس.. ونخلي الموقف ده هو كل حاجة.. يعني أحكم على حد من موقف واحد إنه فاشر، إنه كافر.. إنها عاهرة.. إنها ما تعرفش ربنا.. ونسى إن فيه مواقف كتير تانية، وإننا في رحلة طويلة عريضة ما ينفعش نخترلها في مشهد واحد أو في تصرف منفرد.

العلاقة اللي بالشكل ده بتكون علاقة ناقصة ومختزلة ومش حقيقة ولا مفيدة..

إحنا محتاجين نتعلم إن فيه نوعين من العلاقات.. علاقة جزئية- اللي وصفناها دلوقت.. وعلاقة تانية اسمها علاقة كليلة.. يعني أشوف الآخر كله على بعضه.. بكل حاجة فيه.. زي ما هو، من غير ما اخترلها أو أشوهه.. سواء بالإيجاب أو بالسلب.. علشان إحنا كلنا فينا ده، وفيينا ده..

شوف بقى إنت بتعمل علاقة مع قد إيه من اللي حواليك؟ مع قدّ إيه من صاحبك؟ مع أي حته من نفسك؟ مع كام في المية من مراتك؟

بعض للصورة الكاملة.. بالطول وبالعرض.. مش لـ(حتة) صغيرة منها، وتسبيب الباقي..

(١٥)

علاقة الحبل السري

العلاقة دي علاقة خادعة، شكلها حلو جدًا من برّه، ومنتشرة جدًا.. لكنها في حقيقتها.. كارثة متحركة..

الطرفين هنا بيقرروا يعزلوا نفسهم عن العام.. ويعيشوا في حوصلة نفسية صغيرة جدًا على مقاسهم هما الاثنين وبس.. والأدهى والأمر، إنهم كمان بيشيلوا الحدود النفسية ما بينهم، ويلغووا أي خصوصية أو اختلاف لأي حد فيهم، ويحسوا إنهم قال إيه - واحد..

يجي الواحد من دول، يحب واحدة، ويتجوزها.. يبدأ يبعدها عن أصحابها، وهي تبدأ تبعده عن أهله.. هو يبقى بالنسبة ليها المصدر الوحيد للحب والأمان والاعطف والفلوس، وهي بالنسبة له المصدر الوحيد للراحة والحنان والاهتمام.. وتتقفل عليهم دائرة الحياة..

يجي الشاب الظريف والشابة اللطيفة يدخلوا في علاقة حب، يقولها أنا ما ليش في الدنيا غيرك، وهي تقوله إنت مالي الدنيا عليا.. يقولها إنتي كل حياتي، ترد عليه: إنت كل وجودي.. ويعيشوا في حوصلة رومانسية خرافية خزعلية، منفصلة تماماً عن الواقع والحياة والعام، والكون كله..

علاقة شكلها مثالي، ويبدو فيها كثير من التفاهم والتلاقي والتطابق، اتنين قريبين لدرجة الالتحام، حاسين ببعض لدرجة الاختراق، بس منفصيلن عن العام لدرجة الاغتراب عن كل شيء غيرهم..

النتيجة الحتمية في العلاقة اللي زي دي هي إن الطرفين هايدو بوا في بعض، وهاتختفي ملامح كل حد فيهم، ويبقوا نسخ ممسوحة من بعض.. نسخ قايمة مشوهه، بعد شوية هاتمرض، وتموت..

آه.. النهاية الغالية على النوع ده من العلاقات هي- وبكل صراحة- الموت.. الموت النفسي أو في بعض الأحيان الموت الجسدي.. ما تستغريش، تصور اتنين قفلوا عليهم دائرة الحياة، وربطوا بينهم وبين بعض حبل سري سميك وطويل ومحرك معاهم مكان ما بيروحوا.. لو حد منهم قرر يبقى نفسه، ويفتح عينه على العام، يعرف ناس، يتحرك هنا وهناك، ويبقى ليه حياة وجود وكيان.. تفتكر الطرف الثاني هاي عمل إيه؟

هاي عمل- غالباً- حاجة من اتنين.. يا إما يموت نفسياً (اكتئاب، وقلق، وساعات جنون) أو جسدياً (أمراض صعبة وما لهاش أول من آخر) أو يموت الطرف الثاني نفسياً أو جسدياً برضه..

وخد عندك طلاق، وفشل دراسي، وخيانات زوجية، وأمراض نفسية وعقلية وجسمانية وبهدلة وحكايات أغرب من الخيال..

وطبعاً لو فضلوا زي ما هما، وما حدش منهم قرر يبقى نفسه أو يفتح عينه أو يعيش حياته، فهاتفضل العلاقة زي ما كانت، بالشكل اللي وصفناه..

وفي الحالتين.. دائرة الحياة اللي قفلوها على نفسهم.. بتتحول
لدائرة موت.. والجبل السري اللي ربتوها نفسهم بيهم، بيتلف
حوالين رقبتهم.. ويختنقهم هما الاتنين..

ما تعزلوش نفسكم عن الأهل والأصحاب والحيّايب..

ما تستغنوش ببعض عن العالم..

ما ينفعش يكون أي حد هو المصدر الوحدي لكل حاجة..

ما نفعش ننتك تكون هي مصدر الأمان ليك..

ما بنفعش صاحبک بكون هو كل حاتك..

ما بنفعش حوزك بقى هو ربنا في الأرض..

انت مش ملك حد.. ولا حد ملكك..

حتى أولادكم مش ملکكم..

دول- على رأي جرمان- أولاد الحياة..

افتحوا الدارة..

يرحمكم الله ..

(١٦)

العلاقة مع شخص تمثيلي (Histrionic

د بقى شخص تمثيلي مسرحي متتمكن..

هاتلاقي نفسك مع حد كل هدفه في الدنيا إنه يكون تحت الأضواء ومحط الانتباه ونقطة التركيز.. ومستعد يعمل أي حاجة في سبيل ٥٥ ..

يعني يتكلم بطريقة خطابية مسرحية، أو تتكلم بطريقة لطيفة جداً، وجاذبة جداً، ومغوية جداً جداً..

يهم أو تهم بظهورها الخارجي بشكل مبالغ فيه.. ألوان لبس مبهرة، موضات جديدة، إكسسوارات بتلمع وتشد النظر والسمع وكل حاجة..

الشخصية دي في علاقاتها غريبة جداً.. أولاً بتحمل علاقاتها أكثر مما تحتمل، يعني تكون متصرفة إنك معها في علاقة قوية جداً، والحقيقة إنها بالنسبة لك شخص عادي خالص..

تعبر عن مشاعرها بصورة ضخمة وكبيرة وغير مبررة أو مناسبة، واو.. يااااه.. معقول!!! وتصدم وتتفاجأ من أقل حاجة أو مش من حاجة أصلاً..

سهل تصدق أي حاجة وتمشي وراها وتقنع نفسها بيها، من غير عقل ولا تفكير ولا حسابات..

رغم المظهر الخارجي الفخم المبهر.. إلا إنها من جوه فاضية وأغلب من الغلب.. وعندها احتياج نفسي أساسى وبسيط من زمان.. هو إنها تتشاف ويتوقف لها، ويتقاالتها برافو.. إنتي موجودة.. وجودك مرحبا بيـه..

وعلشان الاحتياج ده ما تمش إشباعه وهي صغيرة، فهي بتحاول دلوقت تحصل عليه بأي شكل، وبكل صورة.. زي العطشان اللي بيدور على نقطة ميه.. بس هي بتشرب من البحر.. وعمرها ما بتشعـ..

مهما حاولت توصلها إنك مهتم بيـها، هاتفضل تدور على اهتمام أكبر، وأضواء أكثر، وعلاقات أمتـع.. لغاية ما تتعالـ..

هي في الحقيقة بتكون محتاجة إنك توصلها إنك بتحبها ومهتم بيـها مش علشان مظهرها وشكلها، وإنها تستاهل تتـشاف وتـتقبل من غير ما تدفع أي قـمن.. وإن وجودها مبهـج ومـرحـب بيـه زي ما هو بدون تـجميل..

ساعتها ممكن تتـغير..

وتتحولـ لبني آدمـة تـاني..

(١٧)

علاقة التقمّص

في العلاقة دي إنت مش إنت.. إنت لابس حدد.. وبتعمل علاقة مع الناس بحد تاني غير نفسك..

يعني حد إنت بتحبه وعاوز تبقى زيه، أبوك، صاحبك، أستاذك، أي حد.. قوم تتقمصه.. تتكلم زيه، تتصرف زيه، تلبس زيه.. كده يعني..

حد إنت بتحبه ومتش عارف توصله.. مثل، معني، برضه تتقمصه وتبقى نسخة مني..

دي حاجة غير التقليد.. التقليد إنت بتعمله وإنانت واعي بيها.. عارف إنك معجب بفلان وبتقلده.. إنما التقمص ده بيحصل بدون وعي، عقلك الباطن هو اللي بيعمله وإنانت مش واحد بالك..

ساعات بقى- وده الأصعب- بتتقمص حد إنت مش بتحبه.. بالعكس.. إنت بتكرهه، وبتكرهه جدًا كمان.. وبيسموا ده (تقمص المعتدي).. يعني حد اتظلم مثلاً. بيجي بعد شوية يمارس نفس الظلم بالظبط مع حد أضعف منه.. مع إن المتوقع إنه يتعلم وما يكررش اللي حصل معاه.. طالب جامعة جه في لجنة امتحان الشفوي والدكتور بهدله وطلع عينه.. تلف الأيام ويكون في نفس مكان الدكتور، وببدل ما يعمل العكس ويكون طيب وكويس وعادل.. لأن.. ده يتقمص الدكتور اللي امتحنه زمان،

ويبقى نسخة منه، ويعمل نفس اللي اتعمل معاه بالظبط.. يعني يكون في العلاقة دي مش نفسه.. يكون حد تاني..

فيه طبعاً أمثلة أخرى.. تلاقي كتير من الآباء والأمهات بيعملوا مع أولادهم وبناتهم نفس اللي اتعمل معاهم بالظبط.. إنت ممكن تكتشف ده في نفسك لو عندك أولاد.. في موقف معين تكتشف وتقول: ياه ده بالظبط اللي كان أبويا بيعمله معايا.. أو تكتشفي إن ده نفس الكلام أو نفس التصرف اللي كانت بتعمله والدتك معاكي.. نسخة مكررة من نفس السيناريyo.. وكأنني باتقمص أدوار الآخرين، وأعملها في علاقائي..

التقمص ده ساعات بيكون مطلوب كشكل من أشكال التعلم أو النمو النفسي.. باتقمص حد، أتعلم منه حاجة، وبعدين خلاص.. زي الجاكيت كده اللي ممكن ألبسه في وقت معين وأقلعه بعدها بشوية وألبس غيره وهكذا.. لغاية ما تتكون شخصيتي، ويبقى ليّا ملامح بتاعتي أنا.. إنما لو تحول الجاكيت ده لجاكيت جبس مش بيترفع.. يبقى عمى، وعدموعي، وثبات في المكان.. وساعات أذى للنفس أو الغير..

لما تعمال علاقة مع حد.. دايمًا اسأل نفسك.. هو في العلاقة دي.. أو في الموقف ده.. أنا مين؟

أنا مين؟

(١٨)

العلاقة مع مجموعة

دي بقى من أخطر العلاقات بجد..

مبدئياً كده أي مجموعة من البشر هايجتمعوا مع بعض، لو
ما كانش فيه هدف معين ليهم، أو حاجة معينة هما ناويين
يعملوها بوعى -إن شالله يخرجوا يتفسحوا- فالمجموعة دي
ممكן تؤذى أصحابها..

مجموعة يعني شلة أصحاب.. زملاء عمل.. قسم في شركة أو
مستشفى.. اتحاد ملاك في عمارة.. فريق رياضي.. أو أي جمع
من البشر..

فيه علم كامل اسمه سيكولوجية المجموعة (Group Psychology)، العلم ده بيدرس بكل تفصيل ودقة إيه اللي
يحصل بين الناس لو اتجمعوا مع بعض.. إيه اللي بيحصل على
المستوى النفسي والعقلي والعاطفي.. لأن وجود مجموعة من
الناس في مجموعة، زي ما هو ممكן يطلع أحسن ما فيهم،
ممكן كمان يطلع أسوأ ما فيهم..

فيه ست مخاطر ممكناً يحصلوا في أي مجموعة أو شلة أو جمع
من الناس..

ممكناً المجموعة -بشكل واعي أو غير واعي- تتعامل مع حد
من أعضائها على إنه أحسن واحد فيهم، بيفهم أحسن منهم
كلهم، عنده عقل أو علم أو إحساس أو أي حاجة أكتر منهم،

وبالتالي هايقدسوه ويؤلهوه ويخلوا وجود المجموعة وأفرادها معتمد على وجوده.. وسلامة المجموعة ونجاحها يابيهه لوحده.. خطورة الحكاية دي هي إنها أولاً هاتخلي كل أفراد المجموعة يخلوا مسئوليتهم عن أي حاجة تحصل.. ما هو اللي يعرف.. هو اللي فاهم.. إحنا ماشين وراه، وثانيًا المجموعة هاتحمل الرجال ده فوق طاقته، لغاية ما ينفك ويتعب وما يقدرش يستحمل، ساعتها المجموعة بكل بساطة هاتبدأ تهاجمه وتتكلب عليه وتخلص منه.. ويجيبوا غيره، يلعبوا معاه نفس اللعبة..

كمان ممكن أي مجموعة تتحوصل حوالين نفسها، وتنفصل عن العام الخارجي، ويتصوروا إنهم تحت تهديد مستمر منه.. ويعيشوا في وهم الكــ والفرــ.. يعني بيقروا في حالة كراهية واستنفار وحرب شرسة مع كل وأي حد غيرهم.. لأنهم متصورين إن الكل بيتأمر عليهم، وغيرهم بيكرههم.. وده طبعاً بيخلوهم ما يعملوش أي حاجة حقيقة على أرض الواقع، وما يقومش كل واحد فيهم بمسئوليته تجاه نفسه وتجاه المجموعة، ولا يشوف إنه شخصياً مسئول، زيه زي غيره.

و ساعات اتنين أو أكثر من المجموعة يقررها يعملوا مع بعض علاقة خارج المجموعة وبدون علمها، وب يكون جزء من العلاقة دي الخروج عن القواعد العامة للمجموعة مهمما كانت بسيطة.. وممكن العلاقة دي في بعض الأوقات تتم تحت سمع وبصر وبمباركة المجموعة نفسها، بس دي قصة كبيرة صعب شرحها دلوقت..

ممکن کمان المجموعة ما تبقالش مجموعه.. يعني كل واحد فيهم يبقى أناي ومش شايف غير نفسه ومصلحته وبس.. ما نساعدش بعض، ما نشيلش هم بعض، ما نبقالش مسئولين عن بعض.. وده يهدد بقاء وحياة ومصلحة وحتى متعة أي مجموعة..

الأخطر والأخطر.. هي إن المجموعة تبقى مجموعة بزيادة.. يعني إن الفوارق بين أفرادها تدوب، وما تبقالش واضحة، يبقوا شبه بعض، وكأنهم شخص واحد.. يتكلموا بنفس الطريقة، يفكروا بنفس الشكل، وساعات حتى يلبسوا زي بعض، ويبيقوا نسخ من بعض.. وده بي Luigi أي فرص في التلقائية والإبداع والتفرد والاختلاف بين أعضاء المجموعة دي.

الحاجة السادسة والأخيرة، هي إن المجموعة زي ما اختارت في الأول حد تقدسه وتعتمد عليه، فهي ممکن تخثار حد تخلية (كبش فداء) وتبقى عايزة نظره منها.. وده فيه كلام لوحده..

اللي يمنع كل ده.. اللي يمنع الست حاجات دول وغيرهم (فيه حاجات تانية كتير).. هو أن كل حد في أي مجموعة من الناس يبقى عارف إنه هو شخصياً مسئول عن نجاح أو فشل المجموعة دي.. وإنه مطلوب منه يعمل اللي عليه بكل إخلاص وصدق ووعى، علشان ده فيه الفائدة والمصلحة والنجاة.. ليه.. ولكل مجموعته..

غير كده.. العواقب ممکن تكون وخيمة.. وخيمة جداً..

(١٩)

علاقة كبش الفداء ..

فيه ظاهرة شهيرة جدًا بتحصل في كتير من المجموعات.. اسمها (كبش الفداء) ..

الناس في المجموعة بيختاروا- غالباً بشكل غير واعي- حد منهم ويببدأوا يشوفوه على إنه أسوأ واحد فيهم.. حد يقول عليه أنا في.. حد تاني يقول عليه خاين.. حد ثالت يفترش في نيته واللي ورا أفعاله.. وفي الحقيقة كل واحد فيهم بيرمي/بيسقط عليه اللي هو مش قابله في نفسه شخصياً ..

واحد مش قابل ضعفه ومش عايز يشوفه في نفسه فيسقطه على (كبش الفداء) ويقولك ده الضعيف اللي فينا.. واحد مش عاوز يعترف قدام نفسه إنه كاره وحقود فيرمي ده على (كبش الفداء) ويقول ده الحقدود بتاعنا.. واحد مليان نرجسية وشعور مريض بالعظمة ينكر ده في نفسه ويشفو (كبش فداء المجموعة) على إنه شخص منفوح ومغرور وغير مبالي بالآخرين..

شوية شوية تتعامل المجموعة مع الشخص ده على إنه مصدر للمشاكل وسبب للمتعاب و ساعتها يكون الحل الوحيد بالنسبة لهم هو تطفيشه والتخلص منه خارج المجموعة إلى الأبد، بأساليب كتير جداً.. ودي حكاية معروفة ومشهورة وبتتكرر من أول التاريخ لغاية نهايته..

بس فيه حاجتين مهمين..

الحاجة الأولى هي إن (كبش الفداء)- اللي غالباً بيكون شخص طيب وساذج وحسن النية- ساعات يصدق اللي أسقط عليه ويستقبل نفسه فعلاً على إنه إنسان سيئ ومليان بكل العيوب اللي اتهموه بيها بدون وجه حق.. ويلبس اللي اترمى عليه.. ساعات ييقاه ويتحول ليه فعلاً..

الحاجة الثانية وهي الأهم.. إنه في أوقات كتير (كبش الفداء) نفسه بيكون ليه دور في إنه يكون (كبش فداء).. لأنه سكت على الأذى، وسمح بالضرر، وساب حدوده مفتوحة لكل من هب ودب، وخلى أرضه مستباحة لكل اللي عايز يرمي فيها نفايات نفسه وقاذورات حياته..

(كبش الفداء) مش دايماً ضحية.. بالعكس.. ساعات بيكون أحد المشتركين في الجريمة.. ساعات بيكون هو البدائي اللي بيستدعي من اللي حواليه الظلم ويغريهم بالأذى.. وبعدين يشتكي.. ويفضل يشتكي..

إذا كنت في يوم (كبش فدا).. فشوف مسؤوليتك عن حدوث ده أو عن استمراره..

وإذا كنت من اللي بيستمتعوا بصنع (كبش فدا) من اللي حواليهم..

فمن فضلك.. بص في المراية.. وشيل شيلتك..

(٢٠)

علاقة تحقيق النبوة

هنا.. حد بيعمل معاك علاقة علشان يحقق نبوة خاصة بي،
ويؤكّد حاجة عايز يثبتها لنفسه..

يعني واحدة مصدقة إن كل الرجال وحشين وكذابين وخاينين،
تروح تتجاوز واحد، وتعامل معاه بشكل صعب وغريب، وتطلع
منه أسوأ ما فيه، لغاية ما يزهق منها ويبدأ يبص لغيرها،
وتتحقق في الآخر نبوة (كلهم خونة زي بعض) ..

واحد مقتنع إنه فاشل وإن ما فيش أمل، يقوم يشتغل سغلانة
مش مناسبة ليه ولا ملؤهلاته ولا لقدراته.. ويعمل مشاكل في
علاقاته بزماليه ورؤسائه.. بعد شوية يتوفى من الشغل، ويقول
بينه بين نفسه (أهه.. أنا كنت عارف كده من الأول.. أنا أصلًا
فاشل) ..

كتير مننا بيبقى عنده (نبوة) داخلية، وبيسعى طول الوقت
في حياته وعلاقاته إنه يثبتها ويؤكّدها.. علشان ده اللي وصله
في تجارب وعلاقات قبل كده.. وده اللي اتعلّمه عن نفسه، وده
اللي ما يعرفش غيره..

أشهر النبوءات دي: (أنا ما استاهلش، أنا فاشل، أنا دائِيًّا ضحية،
الناس كلها وحشة، دول خاينين، ما فيش أمان لحد، ما حدش
يفهمني، وهكذا)..

مشكلة الحكاية دي إن صاحبها بيقدر يكررها عَمَال على بطَال،
وهو مش واحد بالله، ولا حتى الناس اللي في علاقة معاه واحدين
بالهم..

خلي بالك إنت بقى..

ما تخليش حد يتحقق النبوة بتاعته على إيديك..

ما تخليش حد يلمسك دور مش بتاعك في علاقته بيتك..

شوف اللي معاك عاوز يطلع منك إيه..

أحسن ما فيك..

واللا أسوأ ما فيك..

الحكاية دي بنتعلمها بالخبرة وبالتجربة.. فمفيس مشكلة إنك تكون اتقرست مرة واللا اتنين..

اتعلم.. وفتح عينك كويس بعد كده..

(٢١)

علاقة البلع

في العلاقة دي.. طرف بيحاول يخلي نفسه المصدر الوحيد لكل حاجة بالنسبة للطرف الثاني، اللي بيعتمد عليه اعتماداً مطلقاً..

تصوروا مثلاً أم بتعزل أولادها عن العام، وتوصّلهم بكل طريقة إنها المصدر الوحيد لكل حاجة، يسمعوا كلامها هي وبس، يطمنوا ليها هي وبس، ما يآمنوش لأي حد في الدنيا غيرها.. هي بس اللي بتتحمّلهم، وتهتمّ بهم، وتحبّهم.. والمكان الوحيد الآمن في الكون هو جنبها وبين أيديها.. الناس وحشة.. الأصحاب مش كويسيين.. ماتخرجوش.. ماتسافروش.. خليكوا هنا معايا.. معايا أنا لوحدي.. جوه أعمق نقطة في حضني.. وفي نفس الوقت، تزرع فيهم خوف وشك وساعات كتير كره لأي حد تاني يحاول يقرب منهم، إن شالله يكون أبوهم شخصياً..

الأم دي بيكون عندها شعور رهيب بالوحدة، وعدم الأمان.. وبتحاول تستمد شعورها بالأمان والاطمئنان والراحة من خلال إحساسها إن أولادها محتاجينها طول الوقت.. فكده بيقى ليها لازمة، ووجودها بيقى مهم وليه معنى... منتهى الغلب.. بتكون من جوّها عندها رغبة دفينة وغير واعية إنها ترجع الأولاد دول جوه بطنها (رحمها) تاني.. ولو طالت تبلغهم علشان تعمل كده.. من كتر جوعها واحتياجها للأمان - بيقى يا ريت.. الكلام مش هزار..

ممکن کمان زوجة تبلغ جوزها.. أو زوج يبلغ مراته.. محدث
بيحبك غيري.. محدث بيفهمك زيي.. قولى على كل حاجة
وكل شئ.. كل تفاصيل حياتك لازم تبقى عندي.. إوعى تتنفس..
إوعى حتى ترمش بعينيك.. ماتسيبنيش لوحدي.. وأنا برضه
مش هاسيبك لوحدي..

ممکن أصحاب يبلغوا بعض، وكل واحد فيهم يعمى نفسه عن
الحياة ومايشوفش فيها غير صاحبه، اللي لو بعد عنه.. الدنيا
تههد.. وطبعاً كتير من علاقات الحب.. مليانة بلع..

النوع ده من العلاقات بيؤدى لنتيجة واحدة حتمية مالهاش
احتمالات أخرى.. وهى إنها من ناحية بتوقف النمو.. بتنمع
الكيران.. بتخللى الطرف الآخر دايماً ضعيف وصغير وخايف
وقليل الحيلة.. دايماً يحتاج الحماية والملاوقة والاعتمادية.. عمره
ما يحس بنفسه ولا اختلافه ولا تفرد.. عمره ما يبقى نفسه..
لأنه دايماً هايقى نسخة ممسوخة مبلوحة مشوهه من كائن
تاني غيره..

ومن الناحية الثانية بيتخلق غول بشري ضخم جعان مش
بيشبع من بلع البنى آدميين، وجرهم إلى أفالخاذه النفسيه..
ومش بيكون ليه أى حل غير العلاج النفسي.

بالملاسبة.. ساعات ده بيكون المعنى النفسي (لأمنا الغولة)..
(للنداهة) اللي بتنده على ضحاياها في كل مكان.. علشان
تلتهمهم.. وقلا بيهم بطنهما..

حافظوا على حدودكم النفسية من الاختراق والاقتحام والاختفاء..
قولوا (أ) لأى حد يحاول يمسح وجودكم في وجوده..
ماتسمحوش لحد يبلغكم.. وماتبلغوش حد..

(٢٢)

العلاقة مع شخص انطوائي

العلاقة دي بتحس فيها إنك لوحده.. علشان الطرف الثاني في العلاقة بيحب طول الوقت إنه يكون لوحده..

ده شخص مش مهتم أصلاً إنه يعمل علاقة مع حد.. هو لوحده، ومبسوط إنه لوحده.. بيحب حتى يتحرك لوحده، ويسافر لوحده، ويشتغل لوحده..

مش بيستمتع أوي بكونه في علاقة مع حد، ومش بيحب وجوده في وسط ناس أو مجموعة أو شلة أصحاب.. هو معندهوش شلة أصحاب أصلاً.

ما يفرقش معاه رأي حد فيه، ولا بالإيجاب ولا بالسلب، لأن أصلاً وجود الناس معاه مش فارق.. مش بيعبّر عن مشاعره أوي ومش بيظهر أي تعاطف أو تجاوب أو تأثر عاطفي مع أي حد..

سيبك بقى من كل الكلام ده.. ده الكلام المكتوب في الكتب..

في الحقيقة، مهم تعرف إنه من جوه جداً، الشخص ده حساس لأقصى درجة، ويحس ويتفاعل مع كل حاجة، بس ده مش بيظهر عليه..

هو كمان عواطفه ومشاعره عميقه وقوية، بس بيعرف يتحكم فيها كويس، وما يظهرهاش..

هو في أعمق أعماقه يحتاج جداً لوجود الناس حواليه.. يحتاج
لوجود أي حد وكل حد..

بس..

واللي بعد (بس) هو المشكلة..

الشخص ده جواه ألم نفسي رهيب من ناس قديمة، من حد
في حياته قبل كده، الألم ده خلاه يقرر ما يقربش من أي حد
أحسن يتجرح ويتألم تاني.. الألم ده جواه غالباً من سنين..

هو بيأخذ باله من كل حاجة، وبيحس بكل حاجة، وإحساسه
عالٍ جداً، ومشاعره أعلى وأقوى.. بس ألمه أكبر ومالهوش
حدود..

اعذرنه.. وقرب منه بالراحة، ما تهجمش عليه وتخترقه، هاتلاقيه
أول ما يطمئنك، يفتح لك أبواب نفسه.. ويقولك افضل..

ساعتها طمنه أكثر، واديله المسافة والمساحة المناسبة، واقبله كله
على بعضه من غير شروط ولا حسابات..

هاتكسبه، وتكسب العلاقة معاه..

(٢٣)

العلاقة مع نسخة قديمة من نفس الشخص

العلاقة دي بيكون فيها ظلم شديد للي إنت عامل معاه علاقة،
أو للي عامل معاك علاقة..

إنت هنا بتعامل مع نسخة قديمة للبني آدم اللي إنت معاه..
يعني يكون حصل بينكم موقف زمان، وإنانت أخذت صورة
معينة في ذهنك عن الشخص ده.. أو يكون الشخص ده فعلا
كانت ليه صفات وتصيرفات أو طريقة تفكير قبل كده، واتغيرت..
لكن إنت ما زلت مثبته عند الصورة القديمة، ومش راضي
تغيرها..

مع إن الحركة هي الأصل.. والتغيير هو الطبيعة.. لكن إحنا
ساعات بنثبّت نفستنا، ونثبّت غيرنا عند موقف.. أو تفاعل..
أو كلمة.. أو نظرة.. أو غلطة.. أو لحظة فشل.. أو حتى لحظة
نجاح.. ونحرم نفستنا ونحرم غيرنا من فرصة جديدة.. ورؤية
مختلفة..

علماء مدرسة الجيش الثالث في العلاج النفسي بيقولوا إن الواحد لو
باصص لشجرة.. عينيه بتاخد ليها أول لقطة وتخزنها في الذاكرة..
وتبطل تستقبل منها أي صورة تانية.. لغاية ما يهرب شوية رياح
يحرکوا ورقها.. ويهزوا أغصانها.. فعينيك تفوق.. وتبدأ تستقبل
الصورة والصوت من جديد..

إحنا بنحب الراحة.. مُدربين على الاستسها.. مش عاوزين نبذل مجهد نشوف بيه أي حاجة جديدة ممكن تلبط تصوراتنا القديمة.. أو تهد بنيان بنيناه على مدار سنين أو حتى أيام.. لأن ده معناه إني أنا كمان أتغير طالما اللي قدامي بيتغير.. وأتحرك زي اللي قدامي ما بيتحرك.. ويبقى عندي استعداد أراجع نفسي في كل تصوري وأفكاري ومعتقداتي، وأكتشف إني غلط.. وأصحح نفسي.. وده صعب وعاوز مجهد ومسئولة..

فيبيقى الأسهل إني في علاقاتي أخلي كل واحد زي ما هو، يتغير ويتشال ويتحط.. وأنا مش شايف تغييره، ومش باتعامل إلا مع نسخته القديمة اللي في دماغي..

زي ما بيتعمل أب - ديت لبرامج الكمبيوتر..

إحنا محتاجين نعمل أب - ديت يومي لنفسنا وللآخرين..

في علاقاتنا مع بعض..

(٢٤)

علاقتك بدورك في المجتمع

إحنا بنتولد وجوانا برنامج إلهي اسمه الفطرة، بيحدد حقيقتنا و هو يويننا..

الآباء والأمهات بعد شوية بيحطوا فينا برنامج تاني اسمه التربية،
بيحدد كتير من شخصيتنا وسلوكنا..

شوية كمان وييجي المجتمع اللي إحنا عايشين فيه يزرع جوانا
برنامج ثالث أخطر.. اسمه (الدور المجتمعي).. وده بتتوارثه
الأجيال المتعاقبة لغاية ما ينسوا أصله وأهدافه ومعناها
وتوقيتها ومدى مناسبتها لكل زمان ومكان..

من أهم الأدوار المجتمعية اللي اتزربعت فينا (ولا زالت طبعاً)
دور الرجل ودور المرأة - خاصة في مجتمعاتنا الشرقية..

في العادة.. أنا باتكلم عن اللي بتتعرضه الأنثى في مجتمعاتنا
الشرقية من قهر وظلم وتشويه واحتزاز.. وعن الرسائل النفسية
السيئة والمؤذية اللي بتوصلها عن نفسها وعن جسمها وعن
أنوثتها من البيت والمدرسة والشارع.. وكل حلة.. واللي بتفضل
تدفع قنها بعد كده طول عمرها.. إلا من رحم ربى.

بس دلوقت.. مهم أتكلم عن الجانب الآخر.. وعن طرف
المعادلة الثاني.. عن الرجل.. اللي بيدو للوهلة الأولى، وبالنظرية
السطحية غير المتعقدة إنه هو الجاني، وهو الظالم.

أيها الرجل.. لقد ظلمتك أمك.. وظلمك أبوك.. وظلمك هذا المجتمع الفصامي..

ظلمتك أمك (مع حفظ كل الألقاب والاحترام وكل حاجة) لما وصلت ليك بقصد أو بدون قصد إنك أفضل من إخواتك البنات، وإنك من حقك تعلي صوتك على أختك، وتؤمرها، وتحكم فيها، وترافقها، وفي بعض الأوقات قد إيذك عليها.

ظلمتك لما فضلت هي وغيرها تحمل وتولد وتحمل وتولد لغاية ما تخلف ولد.. راجل.. ينادوها باسمه، وتتشرف بوجوده وسط أهلها وقرايبها..

ظلمتك لما فضلتك على أختك في المعاملة، والتعليم، وحرية الحركة، ومنحتك حقوق كتير جداً منعتها عنها..

ظلمتك لما خلت أختك تنصف وراك، وترتب أوضتك، وتغسلك هدومنك.

ظلمتك لما وصلت ليك إن وجودك في البيت هو المصدر الوحيد للأمان والحماية والقوة والستر بعد أو بدل وجود أبوك..

اللي ظلمك هو كمان..

ظلمك.. لما علمك إن الرجولة هي الصوت العالي والخشونة والقسوة..

ظلمك.. لما كان بيمسك إيذك ويخرج معاك ويؤديك كل حته هو بيروحها، وما بيعملش كده مع إخواتك البنات..

ظلمك ملأ فهمك إن الرجال مش بيضعف ومش بيبكي ومش
بيحن ومش بيرق ومش بيغرس عن مشاعره..

ظلمك ملأ وصلك إن الأنوثة ضعف، ومياعة، ودلع..

ظلمك ملأ قالك إن شرفك مكانه خارجك.. وإنه يقع في جسد..
هو أصلاً غير جسد..

وزي ما أبوك وأمك ظلموك.. فالمجتمع كان ظلمه ليك أشد
وأعظم..

ملأ خرجت الشارع لقيت ضل راجل ولا ضل حيطة، والرجل ما
يعيدهوش غير جيبيه، والكلام الجد يعني- فقط- كلام الرجال..

ملأ لقيت نفسك بتعمل اللي إنت عاوزه، تعرف دي وقمي مع
دي، وأصحابك يصقولك، وأهلك يفرحوا بييك، وتبقى واد جدع
مقطّع السمرة وديها.

ملأ اتعلمت إن الزوجة الشاطرة الجدعة هي ست البيت المطيبة
اللي بتغسل وتمسح وتتنضف وتسحل نفسها كل ليلة وكل يوم
علشان خاطر سيادة سعادة جنابك..

ملأ لقيت الرجل بيتمشي قدام مراته وأمه وإخواته البنات..

ملأ وصلك إن السبب في التحرش هو البت ولبسها وكلامها
ومشيتها..

ملأ وصلك إن كل وظيفة المرأة عبر التاريخ هي إنها كائن جنسي
مخلوق لإشباعك ومتعرّفك، علشان حضرتك تؤدي دورك المقدس
في الحياة..

مَلَّا وصلك

إن الأنوثة إغواء وإغراء وانحلال، وإن الأنثى شيطان رجيم
يُيسِّعُ دائِمًا لِإفسادك وإفساد مجتمعك المتدين بطبعه..

مَلَّا وصلك إن المرأة هي أصل كل الشرور..

وحاجات تانية كتير أوي.. أصعبها على الإطلاق هو إن كل ده
أو معظمه على الأقل وصلك زورا وبهتانا باسم الدين، اللي تم
تسطيحه واختزاله وسوء فهمه إلى أقصى درجة.

أنا بقول إنك مظلوم.. لكن مش بقول إنك ضحية.. لأنك
مسئول عن تصديقك لكل الرسائل دي، وعدم مقاومتها، بل
وممارستها بكل إصرار ورعونة..

إنت صدقت كل ده لغاية ما بقى حته منك، ومن تفكيرك،
ومشارعرك، وسلوكك، وبقى أي صوت مختلف معناه هدم
منظومة هائلة من تكوينك الداخلي، وإعادة مراجعة رهيبة
لكثير من مسلمات حياتك، ومسئوليَّة إنسانية كبيرة جدًا ناحية
نفسك وناحية غيرك..

عزيزي الرجل..

ارفع الغمامه من على عينيك..

وشوف المصيبة اللي (إنت).. أقصد اللي (إحنا) فيها..

(٢٥)

العلاقة مع شخص مستغل Abuser

طبعاً دي الماده الخام للعلاقات الخطرة والمؤذية، لأن ممكن أي حد من اللي بيعملوا العلاقات الخطرة اللي اتكلمنا عليها قبل كده، يتحوّل في علاقته إلى حد مستغل.. Abuser يعني..

النرجسي بيكون مستغل، السيكوبات طبعاً مستغل، المدمن.. آه.. من غير كلام، وغيرهم وغيرهم..

أي حد من دول، بيقدر بكل أشكال التلاعب ساعات، والضغط ساعات، والحيلة ساعات، والرشوة العاطفية ساعات، إنه يستغلك ويستهلك مشاعرك ووقتك وفلوسك وطاقتكم، حياتك كلها، لغاية ما تلاقي نفسك في الآخر.. مش لاقي نفسك أصلًا..

أكبر وأغرب مشكلة شوفتها في العلاقات دي، مش بتكون في المستغل، لا.. بتكون في الشخص الثاني.. الشخص المستغل.. اللي يخضع للاستغلال يعني.. وهي إنه بيكون اختار العلاقة دي، والبني آدم المؤذي ده من بين كل الدنيا، علشان يلزق فيه، ويرتبط بيها، ويقول يا ده.. يا بلاش.. وويرفض كل وجهات النظر والنصائح ومحاولات اللي حواليه لإنهاء العلاقة دي.. وبيفضل مُصر إنه يكمل فيها.. بيكونوا عاملين زي المفتاح والقفل.. ب مجرد ما بيلاقوا بعض، بيعرفوا بعض، ومش بيستغنووا عن بعض تاني..

الشخص ده (المستغل).. بيكون جوّاه إحساس عميق إنه ما يستاهلش، إن قيمته قليلة جدًا، إن وجوده مالهوش لازمة.. إنه آخره كده.. وأحسن ما يمكن الحصول عليه هو ده.. علشان كده بينتقم من نفسه بأنه يعمل علاقة مع حد مؤذي يؤكده بالظبط المعنى ده.. إنت قليل.. إنت ما تستاهلش غير الأذى.. ده آخرك.. وعلشان كده برضه بيكمel في العلاقة دي، ويفرض يقطعها، لأنه ما صدق لقى اللي يؤذيه بالنيابة عن نفسه..

حكاية صعبة ومعقدة، وبتتعجب كل المعالجين والمحللين النفسيين..

اللي يحميك من العلاقة اللي زي دي ٣ حاجات..

الحاجة الأولى هي إن حدودك تبقى واضحة، وأي علاقة يكون فيها أي أذى من أي نوع تنهيها فوراً..

الحاجة الثانية هي إنك تعرف تقول (لا) عند اللزوم لأي حد مهما كان.. علشان (لا) دي هي اللي هاتحми بيها حدودك من أي اختراق..

الحاجة الثالثة والأهم.. هي إنك تصدق طول الوقت إنك تستاهل، وتعامل نفسك بكده.. وتوكده لنفسك كل شوية.. تستاهل تتحب، وتستاهل تفرح، وتستاهل تعيش، وتستاهل تُحترم.. وطول ما إنت مصدق ده، كل اختياراتك هاتكون في نفس اتجاهه.. وطول ما أنت مش مصدقه، اختياراتك هاتكون دايئماً في اتجاه الأذى والضرر والانكسار..

إحنا بنختار اللي إحنا مصدقين إننا نستاهله..

بنختار.. اللي إحنا مصدقين.. إننا نستاهله..

(٢٦)

علاقة التقمص الإسقاطي

اسمها صعب.. مش كده؟

معلهش.. هانفهمه دلوقت..

كام مرّة حسيت إنك مستغرب مشاعرك؟

كام مرّة سألت نفسك السؤال ده: هو أنا حاسس كده ليه مع
إن ما فيش حاجة حصلت تستدعي الإحساس ده؟

كام مرّة ظبطت نفسك وإنْت متألم من غير سبب للألم.. غضبان
من غير سبب للغضب.. كاره بدون مُبرر للكره.. أو حتى بتحب
بدون مبرر للحب..؟

كتير جدًا من مشاعرنا هي في الحقيقة مش مشاعرنا.. هي
مشاعر اتزرت فينا.. حد تاني رماها من جواه عليك.. يعني
أصلها مش بتاعتك.. بتاعة حد غيرك..

ساعات بيكون فيه حد جواه مشاعر زهق أو ضيق، وهو مش
قابلها أو مش مستحملها، أو أصلًا بينكرها.. تقدر سيادتك قدامه
دققتين.. يقولك بص إنْت زهقان.. شوف إنْت متضايق.. أديك
مش مستحمل.. عَمَالْ تبص في الساعة.. مكشر.. مالك كده
مكتئب؟ إنْت حزين ليه؟ أو حتى من غير ما يتكلم أصلًا..
تلaci نفسك زهقت.. وقرفت.. واكتئبت.. ومتش طايق نفسك..

ساعات حد يكون مليان من جواه خيانة وكدب وخداع.. ويبدأ
يرمي ده عليك ويحسسك إنك دايمًا مشكوك فيك ودايمًا موضع
اتهام.. لغاية ما حضرتك تبدأ تعمل ده فعلًا..

ممکن حدّ يكون مليان غضب، بس مش بيعبّر عنه، أو حب
ومش بيعبّر عنه، أو حتّى كره وبرضه مش بيعبّر عنه.. وبنفس
طريقة الضغط والإقناع دي يوصلك إنت إنك تعبّر عن اللي
جواه هو.. ولا إنت واحد بالك.. ولا هو كمان واحد بالله..

الموضوع ده اسمه (التمقمع الإسقاطي).. يعني حضرتك (بتتمقمع) اللي غيرك (بيسقطه) عليك.. وده بيحصل كتير في بعض العلاقات.. على مستوى الأفراد وعلى مستوى المجموعات أو العائلات..

يعني واحد يزرع مشاعره اللي مش عارف يقبلها في نفسه أو يحتويها، جوّه واحد تاني.. أو مجموعة (أو عيلة) تزرع مشاعر مُعينة جوّه واحد أو جوّه مجموعة تانية.. عيلة تزرع جوّه واحد إنه فاشل.. إنه سيئ.. إنه ما يستاهلش.. وهو يصدق ده، وممكن يعيش حياته كلها بيء..

وَقَعْتُ فِي الْفَخِ دَهْ قَبْلَ كَدْه؟ حَسِيْتِي قَبْلَ كَدْه بِأَحَاسِيْسِ غَرِيبَةٍ
عَلَيْكِ وَمَشْ بِنَاعِتَكَ؟

طب نعمل ايه؟!

خلي في علاقاتك فلتر.. أيوه فلتر.. واستخدمه كل يوم، وبعد
شويف هاتتعلم تستخدمنه كل ساعة.. وكل دقيقة.. وكل ثانية..

أول ما تلاقي فيه مشاعر جواك غريبة عليك وعلى فطرتك
وطبيعتك.. على طول استرجع إيه اللي حصل قبلها.. قابلت مين؟
اتصلت بمن؟ شوفت إيه في التليفزيون.. أو السينما.. أو الشارع..
أو الشغل؟ اتعاملت مع مين.. فين.. ليه.. إزاي؟ وابدء استخدام
الفلتر.. ونقّي نفسك من شوائب الآخرين اللي اتخلصوا منها
عندهك.. وارمي لكل حد حاجته اللي رماها جواك.. وابدء دورة
جديدة من تنقية نفسك.. كل يوم..

دورة جديدة.. من تنقية نفسك.. كل يوم..

(٢٧)

علاقة الزواج

هل الزواج علاقة؟

طبعاً علاقة الزواج من أهم العلاقات اللي ممكن نتكلّم عنها..
بس الأول تعالوا نسأل نفوسنا.. هو الزواج أصلاً علاقة؟ هو
الزواج في حد ذاته معناه نجاح العلاقة بين اتنين؟ هو الزواج
ضمان لاستمرارية الحب؟

الحقيقة إن الزواج في حد ذاته مش علاقة أصلاً.. الزواج مجرد
إطار لعمل علاقة..

يعني إيه؟

يعني الزواج هو بس فرصة لعمل علاقة.. وسط ملائم لعمل
علاقة بين اتنين..

وكل اللي قبل الزواج (من حب أو استلطاف أو معرفة صالونات
أو غيره) يستوي ويتشبه في أنه طريق يهدّ لوضع الطرفين في
المكان والظروف المناسبة لصنع وإنجاح (أو إفشال) العلاقة دي..
وهما وشطارتهم بقى..

يا إما ي عملوا مع بعض علاقة حقيقة.. يعني إن كل واحد
فيهم يكون نفسه، بكله وبكامله، بدون رتوش ولا مخاوف ولا
حسابات.. ويكون قابل الطرف الثاني قبول كامل بدون شروط
ولا تعجيزات ولا تهديدات..

علاقة فيها كل واحد حرّ، وفي نفس الوقت منتمي للزواج وللأسرة وللبيت ..

علاقة فيها كل واحد عايش وسامح للثاني إنه يعيش..

علاقة فيها كل واحد راضي وسامح للثاني إنه يرضي..

علاقة كل واحد فيها ليه دوايره وذاتيه واستقلاله، مع كتير من خطوط التلاقي والتوازي والاختلاف والتماس مع الطرف الآخر..

أو تكون العلاقة دي مش حقيقة..

فيختزلوا بعض.. وكل حد فيهم يعيش مع الثاني بجزء منه، ويداري عنه باقي نفسه.. وأجزاءه..

أو يخنقوا بعض.. وكل حد فيهم يلف حوالين رقبة الثاني حبل غليظ من الهموم أو المشاكل أو الشكوك..

أو يعجزوا بعض.. وما حدّش فيهم يقنع ولا يرضي ولا يبطل مطالب وشروط..

أو يتشعّبوا في بعض.. وكل حد فيهم يعلق حياته وجوده وسعادته ورضاه على الثاني.. مش على ربنا ولا على العلاقة نفسها..

الزواج هو اختبار لكونك حقيقي أو مزيف..

الزواج هو إنك تختار ما بين إنك تكرر سيناريوهاتك القديمة، أو سيناريوهات أسرتك أو قرائيك أو معارفك أو أصحابك.. أو إنك تكتب سيناريو جديد تماماً ليك ولشريك حياتك بكامل وعيك وإرادتك ومسئوليتك..

الزواج (ونجاحه أو فشله) قرار.. بيتجدد كل يوم وكل دقيقة وكل لحظة.. زي النَّفَس.. وزي نبضات القلب..

الزواج.. مش هو نهاية القصة زي الأفلام العربي..
الزواج بداية..

بداية حياة.. أو بداية موت..
الزواج إما أرض خصبة لزرع الحب..
أو أرض وعرة لزرع الكراهية..

الزواج.. إما روضة من رياض الجنة..
أو حفرة من حفر النار..

فيه كلمتين عاوزكم تحفظوهم.. وتردوهم.. وتعتربوهم قسم
وعهد قدام نفسكم وقدام ربنا لما تيجوا تتجوزوا.. ممكن حتى
تقولوهم بعد الصيغة الرسمية للزواج مباشرة.. الكلام ده لكل
المقبلين على الزواج.. ولكل المتجوزين اللي عاوزين يجددوا قرار
جوازهم مع بعض..

قول ورايا (وإنى قولي بصيغة المؤنث) :

"أشهد الله وأشهدكم ..."

إني قابلك كلّك على بعضك .. قبول موقف، ما يتغيّر بتغيير
أحوالك .. قبول لحسابك مش لحسابي، قبول بدون شروط ..
وإني مش هاخنقك ولا أطبقك ولا أعجزك ولا أختزلك، ولا أسمح لك
تعملني معایا ده ..

وإني مش هامارس معاي في يوم من الأيام ولا هاسمحلك تمارسي
معايَا دور الضحية ولا دور الجاني ولا دور المنقذ.. ولا غيرهم ..
وإني أحترمك وأقدرك وأهتم بيكي .. وأحبك وأسامحك وأعذرك
وأديلك فرص وسماح وبراااااح ..

وإني ما اتشعبطش فيكي ولا أسمحلك تتسبّب فيا .. وإننا نكبر
وننضج ونتحمل المسئولة من خلال علاقتنا ببعض ..

وإني أقبل معاي وأساعدك تقبلي معاي ضعفي وضعفك، وألمي
وأملك، وموقي وموتك ..

وإني أحيا معاي بنسخي الحقيقة، وأساعدك تحبي معاي بنفسك
الحقيقة، في وجود الناس وفي وجود ربنا .. من غير ما نلغي أو
نجب أو نشوّه علاقتنا بأي حد فيهم ..

وإني أفضل مصدق إني أستاهل، وأساعدك تفضلي مصدقة إنك
تستاهلني ..

وإن حيّاتي معاي تكون بداية جديدة في طريق النور .. وخطوة
جديدة في سكة الحقيقة ..

آمين .. آمين ..

(٢٨)

العلاقة الجنسية

مبدئيًّا مهم إننا نعرف إن الجنس حاجة، والعلاقة الجنسية حاجة تاني خالص..

الجنس هو فعل جسدي، ميكانيكي في معظمه، مش لازم يكون مرتبط بأي مشاعر أو التزامات نفسية أو معنوية بين الطرفين.. يعني في ثقافات مختلفة عننا، ممكن واحد يمارس الجنس مع واحدة ما يعرفهاش، ممكن واحدة تمارس الجنس مع واحد مش هاتشوفه تاني، ممكن تتم ممارسة الجنس بمقابل مادي.. وفي بعض الأحيان، ساعات بيحصل الجنس تحت الضغط أو الإكراه أو بالقوة أو الاغتصاب.. كل ده اسمه جنس.. وبس..

أما العلاقة الجنسية، فهي علاقة بكل تفاصيل ومعاني الكلمة.. يعني فيها مشاعر، وأفكار، والتزامات أخلاقية ونفسية وجسدية، وقبلها طبعًا - في مجتمعنا وثقافتنا- دينية، والجنس فيها جزء مش كل.. الجنس هنا أداة للقرب وللتواصل وللتعبير.. مش هدف أو غاية في حد ذاته..

ورغم إن الاتنين من بعيد شكلهم زي بعض.. لكن تفاصيلهم ومحتواهم غير بعض تمامًا..

العلاقة الجنسية من أدق وأخطر وأعمق العلاقات الإنسانية، لأنها ممكن تكون أحد وسائل وطرق السعادة الحياتية بين الطرفين، وممكن تكون أحد أسباب التعasse والبغض والكراهية وساعات الانفصال بينهم..

ممکن ترتفع بيهم وبأرواحهم لسابع سما، وممکن تنزل بيهم وبأجسادهم لسابع أرض.. ممکن تكون جزء من رحلة جسدية وروحية للجنة، وممکن كمان تكون خطوات منزلقة متسرعة للجحيم..

ما ينفعش أقول على علاقة جنسية إنها (علاقة) من غير ما طرفيها يكونوا يحترموا احتياجات بعض، وكل طرف فيهم يكون مهتم بتلبية احتياجات واحتياجات الطرف الثاني على حد سواء.. مش حد منهم يستخدم الثاني شوية دقايق، بشكل أولاني ذاتوي، من غير أي مراعاة أو انتباه أو اهتمام حقيقي، وبعددين يلف وشه الناحية الثانية، ويغوص جوه نفسه..

مهم كمان إن الطرفين يحترموا جسم بعض، ويتعاملوا معاه معاملة آدمية راقية، مش طرف فيهم يتعامل مع جسم الثاني على إنه مكان متاح لتفریغ رغبة سريعة أو غريزة ملحة.. و.. خلاص..

كمان ضروري إن الطرفين يكونوا حابين اللي بيعملوه وموافقين عليه ومستمتعين بييه.. وإنه محدش منهم يعتبر جسد الثاني ملك ليه دون صاحبه/صاحبته الأصلية، يعمل بييه اللي هو عاوزه، وقت ما هوا عاوز، وزى ما هوا عاوز، بدون استعداد وموافقة الطرف الآخر..

وما ينفعش طبعاً تكون (علاقة) لو أي طرف فيها مش مستعد لتحمل مسئوليته الأخلاقية عنها، وانها تكون هي نفسها جزء من علاقة إنسانية وحياتية أكبر بين طرفيها (الزواج).. مش مجرد اتصال عابر مافيش قبله ولا بعده أي شكل وأي درجة من المسئولية.

في (العلاقة الجنسية) الحقيقية، الجنس مش بيكون ليه الأولوية، إنما العلاقة نفسها هي اللي بيكون ليها الأولوية.. الجنس هنا بيكون بس زي اللغة، بيوصل معاني الحب والقرب والمؤودة والرحمة بأشكال وأدوات مختلفة.. لكنه أبداً مش بيكون هو المضمون ولا المحتوى.. لأن ده لو حصل.. يبقى العلاقة الجنسية اتفرغت من حقيقتها، واختزلت في فعل حركي مُمل.. وبكل أسف، ده الواقع في معظم الأحيان..

في كثير من مجتمعاتنا، تم اختزال كل ما هو (علاقة جنسية) إلى (جنس).. وما فيش موضوع حياتي يومي حصل فيه تشويه وتضليل وسوء فهم وسوء تعامل زي ما حصل في في الموضوع ده.. ولغاية دلوقت، ما فيش أي وسيلة طبيعية عادية مقبولة لتعليم وتنوير وتوعية العامة بخصوصه، غير بعض الاجتهادات الفردية من خلال مواقع انترنت أو محاضرات أو ورش عمل.. وطبعاً النتيجة واضحة جداً..

إحنا عندنا هوس شديد (بالجنس) على حساب (العلاقة الجنسية).. ونهم غريب (ل الجنسنة) أي شئ وأى فعل، وأى حد.. لدرجة إننا بننظر للمرأة مثلاً على إنها (كائن جنسى)، وبنعتبر جسمها (آداة مثيرة جنسياً)، وبنتعامل معها على إنها (موضوع جنسى).. وبقى أحد أهم أهداف الارتباط أو الزواج منها (هدف جنسى)..

وفي الناحية الثانية، كثير من الرجال بيشفوفوا إن رجولتهم مستمددة من آداءهم الجنسي، وأن ده لوحده هو مقياس أهميتهم ونجاحهم وساعات وجودهم كله..

وي يكن ده يكون أحد أسباب الاستخدام الرهيب للمنشطات الجنسية في مجتمعاتنا، واننا من أكثر الناس اللي بتبحث عن كلمة (جنس) على الانترنت.. ده احنا حتى اقتصرنا مفهوم (الشرف) لمعنى جنسي، وتتجاهلنا تماماً باقى معانيه وجوانبه..

اختزال (العلاقة الجنسية) إلى (جنس) جزء لا يتجزأ من اختزالنا لكتير من المعانى والمفاهيم لصورتها البدائية الأولى..

لكن بيقى في الآخر إن (العلاقة الجنسية) أسمى وأشمل وأبقى بكثير من مجرد (الجنس).. وإنها علاقة إنسانية ليها مواصفات ومراحل ودرجات وتفاصيل ومستويات.. مش مجرد لقاء جسدي بين اتنين، أو خيال مراهق بيتحقق على أرض الواقع، أو حبة زرقة توصل لبعض المتعة..

المفتاح في (العلاقة الجنسية)..
هو (العلاقة).. ومعناها.. وتفاصيلها..
مش الفعل.. وببدايتها.. و نهايتها..

الجنس وحده مش علاقة..
الجنس فقط لغة..
وآداة للتوصيل المعنى..
بين طرفين..
بينهم مودة.. ورحمة..

(٢٩)

إيه فيك اللي بيعمل علاقة؟

كل واحد فينا بيولد وجواه احتياجات نفسية بسيطة جدًا..

احتياج إنك تتقبل.. إنك تتحبب.. إنك يهتم بيـك.. إنك تُحترم..
إنك تتشاف.. إنك تتحسـ.. إنك تتقدـر.. إنك تقول لأـ.. وغيرها..

وبتكون الوظيفة الأساسية للألم والأب أثناء التربية هي تلبية
الاحتياجات دي بشكل مناسب وبقدر كافي.. علشان يحصل النمو
النفسي السليم وتكتمل الصحة النفسية السوية..

لكن في الحقيقة.. مش ده اللي بيحصل دايـاً..

الطفل عادةً بيكتشف أثناء التربية إنه علشان تتم تلبية
احتياجاته الأساسية لازم يكون فيه مقابل.. يعني (اسمع الكلام
علشان أحبـك).. (اشرب اللبن علشان تبقى شاطـر).. (ما تقولوش
لأ علشان ربنا يحبـك).. كل حاجة بشروط.. كل حاجة بمقابل..

يعمل إيه الطفل الغلـبان بقى علشان يتحبـ ويـتقبل ويـتحـسـ
ويهـتم بيـه؟!

يضطر بيـقـ زـي ما هـما عـاوزـين..

لأنـه.. ببسـاطـة شـديـدة.. مـحتاجـ..

يقرر الطفل في سن مُعين (النَّظريات والأبحاث بتقول حوالي خمس سنين) إنه يعمل عملية تجميل لنفسه.. آه عملية تجميل.. علشان يناسب الوضع المُحيط بيها.. يعني يعدّ نفسه ويضبطها على مقاس اللي حواليه.. عاوزينه مقاس ٣٧ يبقى ٣٧، عاوزينه مقاس ٣٩ يبقى ٣٩.. علشان يوصله منهم بعض الحب، وقليل من الاهتمام، وربما شيء من الاحترام والتقدير لإنسانيته واحتياجاته.

يقرّر يدفن (نفسه الحقيقية) الفِطرية الخالصة اللي خلقها ربنا، علشان يحميها ويحافظ عليها في مكان سري عميق.. ويعيش بـ(نفس مُزيفة) مُصطنعة، تعرف تعامل مع اللي حواليه..

اللي يقرّر يدفن تلقائيته، واللي يقرّر يدفن صوته العالي، واللي يقرّر يدفن تفكيره وإبداعه، واللي تقرر تدفن أنوثتها، واللي تقرر تدفن علاقتها بجسمها، واللي تقرر تدفن كلمة (ألا) اللي ما اتقبلتش واترفضت واتعاقبت عليها..

طبعاً ده بيحصل في أشكال وعلاقات تانية كتير، أشهرها علاقات الحب، اللي كل واحد من الطرفين بيقولك -قال إيه- هأتغير علشانه/علشانها..

ونكر ونحب ونتجوز ونخلف، ونعمل علاقات مع الناس بنفس مزيفة هي أبعد ما تكون عن نفسنا الحقيقة.. علاقات ناقصة ومشوهه.. ونعيش ونموت.. وإننا لسه ما بقيناش نفسنا أصلا.

تفتكر.. إنت في علاقاتك وحياتك وشغلك وبيتك..

عايش بنفسك الحقيقية..

والا نفسك المزيفة؟

طيب تفتكـر إيه اللي يخلي (النفس الحقيقـة) اللي اندفـنـت
تطـمـن وتتوـنس وتقرـر تعود للحياة من جـديـد؟ إـيه اللي يخـلـينـي
أبـقـى إـنسـان حـقـيقـي كـامـل عـاـيـش بـنـفـسـي الـحـقـيقـة كـلـها بـدـونـ
تشـوـيه أو اـختـزال أو اـنتـقاـص..

إـقـرـا مـعـايـا.. الفـصـل الجـايـ..

الفـصـل الأـخـير..

(٣٠)

العلاقة الحقيقية

بعد رحلتنا الطويلة في العلاقات الخطيرة.. آن الأوان إننا نتكلّم عن العلاقة الصحية الحقيقة.. العلاقة اللي تغيّرنا وتكتّبنا وتخليّنا أحسن.. العلاقة اللي وجودها مهم وأساسي لأي إنسان على وجه الأرض.. العلاقة اللي تساعدنّا بقى نفسنا الحقيقة مش نفسنا المزيفة.. هو مش اللي بيّبوظ في الناس علاقة؟ بقى اللي يصلّحهم ويُساعدّهم ويُعالجّهم ويغيّرّهم برضه علاقة..

فيه دراسة اتعلّمت في جامعة هارفارد وانتشرت قرّيب.. الدراسة دي استمرّت ٧٥ سنة، أجيال من الباحثين وأجيال من البشر.. كانوا بيّشوفوا هو إيه اللي فرق في حياة الناس بعد السنين الطويلة اللي عاشوها هما وأولادهم وأحفادهم.. معظمهم كانوا متّصورين في الأول إن اللي هايفرق في حياتهم هو الفلوس والشهرة وغيرها.. بس اكتشف الباحثون في آخر الدراسة إن أكثر حاجة فرقت في صحة الناس النفسيّة والجسديّة، وطول أعمارهم ومدى سعادتهم وقدرتهم على مقاومة الأمراض والأحزان والشيخوخة وغيرها.. هي وجود علاقات طيبة في حياتهم.. علاقات فيها قرب وحب وترابّم وتفاهم.. علاقات كان الطرف الثاني فيها متاح موجود في عز الأوقات الصعبة.. وعلى العكس.. الناس اللي ما كانش عندّهم علاقات بالشكل ده في حياتهم.. أعمارهم كانت أقصر.. نسبة إصابتهم بالأمراض المختلفة كانت أكثر.. قدرتهم على تحمل الألم النفسي والجسدي كانت أقل.. وجالّهم كمان ألهـايمـر في شيخوختهم..

إيه يا ترى مواصفات العلاقة اللي بالشكل ده؟ وإيه تفاصيلها؟
وإيه أهم ما فيها؟

باختصار شديد.. العلاقة الطيبة الصحية الحقيقية المغيرة بين
البني آدمين، مهم يكون فيها سبع حاجات..

أولاً.. إن الطرف الثاني في العلاقة يحسسك إنه حاضر و موجود
ومهتم، حتى لو كان مش معاك بجسمه دائمًا.. مهم تكون
متطمئن إنك في وعيه وإنك بتخطر على باله من وقت للثانية،
يفتدركك، يسأل عليك.. يدعيلك.. وهكذا..

الحاجة الثانية.. هي إنه يجيد سماعك والإصغاء ليك وقت ما
تحتاج ده.. ويبقى متابع ومهتم ومتفاعل، مش ودانيه معاك،
ودماغه في ألف حنة تانية، ده يوصلك قد إيه هو حاسس بيك
وفاهمك ومهتم بوجودك ومقدره.

الحاجة الثالثة.. هي إنه يقبلك ويحترمك بدون شروط، مش
معنى كده إنه يوافق على كل اللي بتعمله، القبول حاجة
والموافقة حاجة تانية خالص.. لكنه قابل وجودك، وقابل عيوبك
وأخطاءك ومواطن ضعفك وعجزك وفشلك، وعنه استعداد
يساعدك علشان تتغير، من غير ما يضغط عليك، ولا يحسسك
بالذنب، ولا يهددك بالبعد.. ولو ما اتغيرتش، هايقبل ويصبر وما
يستعجلش عليك..

رابعًا.. مش هايحكم عليك أي حكم ديني أو أخلاقي أو قانوني
تحت أي ظرف من الظروف.. هو هايشاورلك ببساطة وبالراحة
على بعض الحاجات، لكنه مش هايعامل معاك على إنه قاضي
أو مصلح اجتماعي أو رجل دين..

خامسًا.. هايحط نفسه مكانك دايمًا، فيحس بيكم، ويفهمكم،
ويشوف احتياجاتكم، ويرجع مكانه تاني علشان يعذركم، ويسامحكم،
ويساعدكم.. وفي نفس الوقت يسمحلك تعمل كده معاه.. انتوا
اتنين في علاقة رايحة جاية، مش واحد في علاقة مع مرأة..

الحاجة السادسة.. إنكم تكونوا حقيقين في العلاقة، يعني كل واحد فيكم يكون نفسه، ما مثلكم على بعض، مش كل واحد فيينا لابس قناع قدام الثاني، يقلعه بمجرد بعده عنه.. اللي جوانا نقوله لبعض.. اللي نحسه نشاركه مع بعض.. اللي نشووفه في نفسنا نوريه لبعض.. من غير تزييف أو تلوين..

الحاجة السابعة والأخيرة.. هي إن العلاقة ما تكونش بين اتنين وبس.. علاقة مقوولة على اتنين وخلاص، والاتنين دول قرروا يعزلوا نفسهم عن العالم والناس والعيلة والأصحاب.. وقال إيه بقوا مكتفيين ببعض عن كل حاجة.. وأنا وإن كنت ولا حد تالتنا.. وإنني الدنيا وإنك الكون.. وما ليش في الدنيا غيرك.. وأنا من غيرك أموت.. علشان النوع ده من العلاقات بيؤذى أصحابه وبيخليهم بعد شوية يخنقوا بعض ويعدوا على بعض الأنفاس ويوقفوا نمو بعض، ومحدثش فيهم يسمح للثاني بالحياة والحرية والحركة.. وده بيصيّب أي علاقة في مقتل.

وطبعًا قبل وبعد كل دول.. مهم ربنا يكون طرف ثابت في أي علاقة، نحب بعض فيه، ونحس بوجوده معانا، ونتقيه في بعض..

السبعين حاجات دول لو موجودين في أي علاقة، فهي هاتكون علاقة صحية مغيرة للطرفين إلى الأحسن.. علاقة صداقة، علاقة حب، علاقة جواز، علاقة عمل، علاقة علاجية.. أي علاقة..

ساعتها هاتبقى نفسك.. نفسك الحقيقة.. أنت زي ما إنت..
 بكلك وبكاملك.. بدون رتوش.. بدون تجميل.. بدون حسابات..
 وبدون تخوفات.. لأنك عارف إن الطرف الثاني قابلك زي ما
 إنت.. وبيحبك بدون شروط.. وبيحترمك وبيحترم رحلتك.. وموقفه
 منك مش بيتغير بتغير أحوالك..

دي اسمها علاقة حقيقة..
تحس فيها إنك موجود.. ومتقدرا..
وجودك فارق.. وإنك تستاهل..
وإنك مش مضطر تدفع أي قمن.. علشان ترضي أي حد..

العلاقة دي تطمئن، وتفرّح، وتغيّر..
العلاقة دي تقرّبنا من نفسها ومن الناس ومن ربنا..
العلاقة دي فيها الدوا وفيها الشفا..

هي المفتاح، وهي الباب،
وهي البيت النفسي الأصيل المنور الدافي..

ربنا يوهبها ليكم، ويرزقكم بيهـا..

آمين..
آمين..

للتواصل مع د.محمد طه



mohamedtsidik@yahoo.com



Dr. Mohamed Taha





